



unfolding**Word**<sup>TM</sup>

---

Open Bible Stories



## **50 tejarita nu'Alata'ala sanu mabebas mepake ane maala eilalong tebasa-basa ntaninya**

(<http://openbiblestories.com>)

Open Bible Stories, v. 3.0

Pinogutu nuDistant Shores Media (<http://distantshores.org>) ane tetoo-too numisi nujuniaa Door43 (<http://door43.org>)



### **Checking level 3**

*find out more at <https://unfoldingword.org/quality>*

#### **Te'isin:**

Tebuku eini sinadia nepake teisin Creative Commons Attribution-ShareAlike 4.0 International License (<http://creativecommons.org/licenses/by-sa/4.0/>)

Si'oo mabebas:

- **Mombee eitoo-too ntaninya** — maala mogutu selilio ane mombee eitoo-too ntaninya mepake tebuku, tevideo, tekaset atau ntaninya
- **Moniang/mopo'okurang** — maala mogutu vuou atau mogutu ntaninya, maala valii mobaluk.

Tapi mepake tesyarat-syarat eini:

- **Mongular lamai eipao** — Si'oo kanaboi mongular lamai eipao tepokarajaong eini sima eini: "Sanu asli maala no'ita ei (<http://openbiblestories.com>).)" Jio maala mongular si'ami nombee tekuasa eisi'oo atau nombee tekuasa eisi'oo mepake tebuku eini
- **ShareAlike** — Ane si'oo mogutu vuou lamai tebuku eini, si'oo kanaboi mombee atau mobaluk mepake teisin sanu selilio sima sanu pinake sanu teasli.

Mepake temerek dagang: **unfoldingWord** he'ua temerek dagang nu Distant Shores Media ane jio maala nopake eilalong sanu nopogutu vuou lamai sanu eilalong tebuku eini. Ane nopogutu selilio lamai (<http://openbiblestories.com>) si'oo kanaboi mongembe tegambar **unfoldingWord** watu si'oo mombee atau mombaluk eitoo-too ntaninya. Tapi ane teisi nubuku jio nopogutu selilio, si'oo jio maala mongembe tegambar **unfoldingWord** eibuku sanu vuou.

Lamai paio tegambar-gambar: Jojoo tegambar-gambar sanu pinake eilalong tejarita-jarita eini lamai © Sweet Publishing ([www.sweetpublishing.com](http://www.sweetpublishing.com)) ane pinake teisin Creative Commons Attribution-Share Alike License (<http://creativecommons.org/licenses/by-sa/3.0>)

Eiruru-rusus ni'ami sanu nomarcaya eisiKristus sanu momoia eipapaio eijuniaa. Si'ami nonggane ei'Alata'ala si'oo mepake tebuku eini lamai tejarita-Nya antau mombarakai, mopo'uig ane map'aasanang teambok ni'oo.


# OPEN BIBLE STORIES

1. Tepogutuong .....	5
2. Tedosa Nentama Eijuniaa .....	14
3. Teogo Sanu Mooge .....	21
4. Tepejanjiong Nu'Alata'ala Concoono Si'Abram .	30
5. Teunga Sanu Jinanjia .....	36
6. Si'Ishak Na'aala Telapi Ane Rotoo Teunga .....	42
7. Te'Alata'ala Nombarakai SiYakub .....	47
8. Te'Alata'ala Nonyalamata SiYusup Ane Teruru-rurusnya .....	53
9. Te'Alata'ala Noleva SiMusa .....	62
10. Sompulu Te'abalaan .....	71
11. TePaska Nutoo-too NuYahudi .....	78
12. Tepesuvung .....	83
13. Tepejanjiong Nu'Alata'ala Concoono Tetoo-too Nu'Israel .....	91
14. Nongalalampa Eitana Sanu Jio Pinomoiai Nutoo .....	100
15. Tetoo-too Nu'Israel Nentama EiTana Sanu Jinanjia. ....	109
16. SiGideon Ane Tetopolapas-topolapas Ntaninya .....	117
17. Tepejanjiong Nu'Alata'ala Concoono SiDaud	127
18. Tepomarenta Sanu Netetilal .....	135
19. Tenabi-nabi .....	143
20. Tinania Ane Netencileonye Tetoo-too Nu'Israel .....	153
21. Te'Alata'ala Nojanjia TeMesias .....	161

22. Si'Elisabet Ane SiMaria Majari Molumalo Karna Terancana Nu'Alata'ala .....	170
23. SiYesus Pinoguungaa .....	175
24. SiYohanes Nombaptis siYesus .....	181
25. Tepuang Nuseetan Nonyo'arai SiYesus .....	187
26. SiYesus Nompamula Tepokarajaaong-Nya ...	192
27. Tetuturong NuToo NuSamaria Sanu Mombosi	198
28. Sotoo Sanu Makaya Najaok EisiYesus .....	205
29. Tejarita Sima Tevotuang Sanu Jio Mongampuni .....	211
30. SiYesus Nombee Noma'inang Limaributoo ..	217
31. SiYesus Nelampa Eibabok Nuogo .....	223
32. SiYesus Nepe'eondok Tetoo Sanu Pinentamai Nu'alus Sanu Majaat Ane Tebengkel Sanu Nepees .....	228
33. Tejarita Sima Apabagiong Tetana .....	237
34. SiYesus Nomagurua Tejarita-jarita Ntaninya .	243
35. Tepogurapanong Sima Tesiama Sanu Mombosi .....	249
36. Te'alae NiYesus Vinenii Terava Nusuruga ....	257
37. SiYesus Netuvua SiLasarus Lamai Te'amateong .....	262
38. SiYesus Ira'op .....	269
39. SiYesus Inadili .....	278
40. SiYesus Sinalipa .....	285
41. Te'Alata'ala Netuvua'onye SiYesus Lamai Te'Amateong .....	291
42. SiYesus Nopo'uig Temurit-murit-Nya Jijiompo Netencile Eisuruga .....	296

43. Noniang Te'ababari Tetoo-too Sanu Nomarcaya .....	303
44. SiPetrus Ane SiYohanes Nepe'eondok Sotoo Sanu Kingkido .....	311
45. SiStepanus Ane SiPilipus .....	317
46. SiSaulus Nomarcaya EisiYesus .....	325
47. SiPaulus Ane SiSilas EiPilipi .....	331
48. SiYesus He'ua TeMesias Sanu Jinanjia .....	339
49. Tepejanjiong Sanu Vuou Nu'Alata'ala .....	347
50. SiYesus Kana Momarenta Tejuniaa Sanu Vuou	357


# 1. Tepogutuong




Tejarita eini sima iama'o jojoo sanu eijuniaa majari. Iama'o te'Alata'ala nogutu telangit ane tejuniaa ncoono jojoo teisinya. Watu pamulaongnya tejuniaa eini jiompo najari. Jojoo nondoung ane te'Alus nu'Alata'ala eibabok nuogo.




Lamai he'ua te'Alata'ala nomarenta, "Jarimo terava!" Lamai he'ua terava najari. Te'Alata'ala nonopei terava he'ua "meeleo" ane tendoung he'ua "mondoung." Te'Alata'ala nogutu terava he'ua eieleo pamulanya.



Lamai he'ua teeleo rorua, te'Alata'ala nomarenta ane nogutu telangit eibabok nujuniaa. Tecaranya, Siia nongantaa teogo sanu umai eibabok lamai teogo sanu umai eiangkopnya.



Lamai he'ua teeleo totolu, te'Alata'ala nomarenta ane nongantaa teogo lamai tetana sanu mo'ogal. Siia nonopei tetana he'ua "tebaowan," ane Siia nonopei teogo "tedagat." Te'Alata'ala nengita tesapa sanu pinogutu-Nya he'ua nombosi.



Lamai he'ua te'Alata'ala nomarenta, "Jarimo tejuniaa mohasila jojoo nengangaya tepuu ane tetudaong." He'uamo sanu najari. Te'Alata'ala nengita tesapa sanu pinogutu-Nya he'ua nombosi.




Lamai he'ua teeleo aapat, te'Alata'ala nomarenta ane nogutu teeleo, tevulang ane tevituong-vituong. Te'Alata'ala nogutu jojoo he'ua antau nombeena terava eijuniaa ane nogutu tetanda watu meeleo ane mondoung, tewatunya ane tetoung. Te'Alata'ala nengita tesapa sanu pinogutu-Nya he'ua nombosi.




Lamai he'ua teeleo lelima, te'Alata'ala nomarenta ane nogutu jojoo sanu melolon eilalong nuogo ane jojoo temamanuk. Te'Alata'ala ne'ita tesapa sanu pinogutu-Nya he'ua nombosi, ane Siia nombarakainya.




Lamai he'ua teeleo oonong, te'Alata'ala nomarenta, "Jarimo jojoo nengangaya tebinaatang eibaowan!" Lamai he'ua jojoo najari sima sanu jinaritaa nu'Alata'ala. Sanggaat najari tebinaatang nopiara, sanggaat najari tebinaatang noporagab ane sanggaat najari tebinaatang meila. Te'Alata'ala ne'ita tesapa sanu pinogutu-Nya he'ua nombosi.



Lamai he'ua te'Alata'ala nonjarita, "Si'ita mogutu temanusia sima selio-lio Si'ita, antau siira okuasa eibabok nujuniaa ane eijojo tebinaatang."



Lamai he'ua te'Alata'ala nongala tetana, nogutu sotoo telangkai, ane nonyubaa tenyaa netuvu eilalong nutoo he'ua. Telangkai he'ua tinopei si'Adam. Te'Alata'ala nogutua tejo'ong eipaio si'Adam maala momoia, ane nongembea siia eiri'ua antau siia maala nomiara tejo'ong he'ua.



Eitanga nujo'ong, te'Alata'ala nonuda romata tepuu sanu magaya. Samata, tevuanya maala mogutu tetoo metuvu seende-endenya. Samata ntaninya, tevuanya maala mogutu tetoo mo'otoi sanu mombosi ane sanu majaat. Te'Alata'ala nombeena tevua sanu mombee te'otutuvu untuk no'inang. Tapi te'Alata'ala nolarang si'Adam menginang tevua sanu mombee tepo'otoi. Ane tevua he'ua no'inang, tetoo kana maate.



Lamai he'ua te'Alata'ala nonjarita, "Ane temanusia boi simotoonya, jio mombosi." Tapi jio umai sotoo lamai jojoo tebinaatang maala majari tetopondulu ni'Adam.



Lamai he'ua te'Alata'ala nogutu si'Adam nete'oturu mororok. Lamai he'ua te'Alata'ala nongala sobua teusuk ni'Adam ane nogutu sotoo tebengkel ane nongomung siia eisi'Adam.



Watu he'ua si'Adam ne'ita tebengkel he'ua, siia nonjarita, "Ponou'ongnya, siia sima sia'u! Siia kana notope 'teBengkel,' karna siia pinogutu lamai teLangkai." Eini tesabanya sotoo telangkai molinjo'i siama ane siinanya ane majari sotoo concoono telapinya.



Te'Alata'ala nogutu telangkai ane tebengkel sima tegambar ane terupa nu'Alata'ala. Te'Alata'ala nombarakai siira ane nonjarita eisiira, "Ounga-omo'upu ane moniang mabari ane bu'eit tejuniaa." Te'Alata'ala nengita jojoo sanu pinogutu-Nya he'ua nombosi tutuu. Jojoo he'ua najari eieleo oonong.



Watuteeleo pepitu najaok, te'Alata'ala notouko tepokarajaong-Nya. Karna he'ua, te'Alata'ala nengondok lamai jojoo sanu ginauka'o-Nya. Siia nombarakai teeleo pepitu he'ua ane pinogutu-Nya mapacing, karna eieleo eini Siia nongondok lamai tepokarajaong-Nya. Eini iama'o te'Alata'ala nogutu tejuniaa ane jojoo ntaninya.

*Eini tejarita nu'Alata'ala lamai teKejadian 1-2.*

## 2. Tedosa Nentama Eijuniaa



Si'Adam ane telapinya nomoia eijo'ong nu'Eden sanu mombosi sanu pinogutu nu'Alata'ala untuk siira. Siira jio mepake tepakean, tapi siira jio mesili. Siira biasa melampa eijo'ong ane nonjarita concoono te'Alata'ala.



Tapi umai sambaang tesaa sanu majaat eijo'ong he'ua. Siia no'utanya eibengkel he'ua, "Te'Alata'ala tututuu nonjarita si'emu jio maala menginang tevua lamai tepuu-puu eijo'ong eini?"



Tebengkel he'ua nonyimbat, "Te'Alata'ala nonjaritaa si'ami maala menginang tevua lamai jojoo tepuu eiri'ini, tapi jio lamai tepuu sanu mogutu si'ita mo'otoi sanu mombosi ane sanu majaat. TeSiopu nonjaritaa eisi'ami, 'Ane si'emu menginang tevua he'ua atau boi monggamanya, si'emu kana maate.'"



Tesaa he'ua nonyimbat, "He'ua jio tutuu! Si'emu jio maate. Te'Alata'ala mo'otoi touk si'emu menginangnya, si'emu kana mo'otoi jojoo sima Siiia. Si'emu kana majari sima te'Alata'ala, mo'otoi sima sanu mombosi ane sima sanu majaat."



Tebengkel he'ua ne'ita tevua he'ua magaya ane mombosí. Karna siia valii seilu majari mapande, siia nongala tevua he'ua ane nenginangnya. Lamai he'ua siia nombeena tevua he'ua eisilapinya, sanu concoono siia, ane silapinya valii nenginangnya. Siira rotoo nenginang maampo jio pinajujut.



Selengaan, temata niira netebo'a, ane siira mo'otoi siira nelalaumo. Siira nogutu tepakean lamai teroong-roong untuk nopake ei'alae niira.



Lamai he'ua si'Adam ane silapinya ne'eepe tesuara nu'Alata'ala lalampa eijo'ong he'ua. Siira nencoyok lamai te'Alata'ala. Touk he'ua te'Alata'ala noleva si'Adam, "Eipaio si'oo?" Si'Adam nonyimbat, "Sia'u ne'eepe Si'oo lalampa eijo'ong eini, ane sia'u nobule, karna sia'u nelalaumo. Karna he'ua Sia'u nencoyok."



Lamai he'ua te'Alata'ala no'utanya, "Sisee nongular si'oo nelalaumo? Si'oo nenginang tevua sanu pinarentaa'U jio untuk no'inang?" Si'Adam nonyimbat, "Si'oo nombee tebengkel eini, ane siia nombee tevua he'ua." Lamai he'ua te'Alata'ala no'utanya ei bengkel he'ua, "Tesapa sanu ginauka ni'oo?" Tebengkel he'ua nonyimbat, "Tesa he'ua nongakal sia'u."




Te'Alata'ala nonjarita eisaa he'ua, "Si'oo Ukutuk! Si'oo kana melampa mepake te'ompong ni'oo ane menginang boi tetana. Si'oo ane tebengkel eini kana mengkengkelesong, teunga-ungamu ane teunga-unganya kana memumusuong. Tebija nubengkel he'ua kana mopo'orua teva'imu, ane si'oo kana moma'iti tetojungnya."



Lamai he'ua te'Alata'ala nonjarita eibengkel he'ua, "Sia'u kana mogutu si'oo mepees tutuu eiwatu moguungaa. Si'oo kana seilu monguasai telapimu, ane siia kana momarenta si'oo."




Te'Alata'ala nonjarita eisi'Adam, "Si'oo no'inapea'omo silapimu ane jio monuruk eiSia'u. Lamai eini tetana eini kinutuk, ane si'oo kanaboi mokarajaa tutuu untuk melolo sanu no'inang. Lamai he'ua si'oo kana maate. Karna te'asal ni'oo lamai tetana, si'oo kana majari vavalii tetana." Lamai he'ua si'Adam nonopea silapinya siHawa, sanu tebatuanya "Tetopombee Te'otutuvu," karna siia kana majari siina jojoo tetoo. Lamai he'ua te'Alata'ala nombee eisi'Adam ane eisiHawa tepakean lamai te'uli nubinaatang.



Lamai he'ua te'Alata'ala nonjarita, "E'eini karna temanusia najarimo sima Si'ita concoono mo'otoi sanu mombosi ane sanu majaat, siira jiongo maala menginang tevua lamai tepuu nu'otutuvu ane metuju seende-endenya." Karna he'ua te'Alata'ala nonuju si'Adam ane siHawa nesuvung lamai tejo'ong sanu mombosi he'ua. Te'Alata'ala nonuju sanggaat temalaekat-malaekat sanu mooge ane mo'uiq eipentamaong he'ua nonjagai tejo'ong he'ua antau jio otoo menginang tevua lamai tepuu te'otutuvu.

*Eini tejarita nu'Alata'ala lamai teKejadian 3.*

3. Teogo Sanu Mooge



Metoung-toung lamai he'ua, nabari tetoo netuvu eijuniaa. Tetoo-too he'ua majari majaat tutuu ane nonggauka sanu majaat. Te'otutuvu eijuniaa majari majaat sima he'ua jaok te'Alata'ala nonantua untuk monganjula jojoo eijuniaa nepake teogo buntul sanu mooge.



Tapi siNuh nopa'asanang teambok nuSiopu. Siia sotoo-toonya sanu mondolong eiilot jojoo nutoo-too majaat he'ua. Te'Alata'ala nongulara eisiNuh simamo teogo buntul sanu mooge sanu Siia morancanaa, sanu kana monou'i otutuvu jojoo nubinaatang. Siia nonuju siNuh mogutu sobua tepayangan sanu mooge.




Te'Alata'ala nonuju siNuh mogutu tepayangan sanu te'elelendanya kira-kira 140 meter, tebilaynya 23 meter, ane tepangkatnya 13,5 meter. Tepayangan he'ua kanaboi nopolgutu lamai te'ayu ane umai tejandela, teatok, tolusalo ane mabari tekamar. E'endenyteogo buntul tepayangan he'ua kana monyalamata siNuh, telapinya, teunga-unganya ane teapaar-paar lamai jojoo nengangaya tebinaatang ane temanuk.



SiNuh nonuru'i te'Alata'ala. Siia ane tolutoo teunganya nogutu tepayangan iama'o sanu pinarentaa nu'Alata'ala eisiira. Karna tepayangan he'ua mooge tutuu, metaang tewatu metoung-toung nogutu tepayangan he'ua.




Te'Alata'ala nomarentaa valii siNuh, telapinya ane teunga-unganya nonginconga naganamo sanu no'inang niira mboto ane tebinaatang-binaatang he'ua. Watu jojoo nesiapo, te'Alata'ala nongulara eisiNuh najaoko tewatunya siia, silapinya, tolutoo teunganya, ane telapi-lapi niira mentama eilalong nupayangan. Siira jojoo oalutoo.




Te'Alata'ala nonuju sambaang telangkainya ane sambaang tebengkelnya lamai jojoo tebinaatang ane temanuk uma'o eisiNuh jaok siira maala momenek eipayangan ane na'amana e'endenya teogo buntul. Te'Alata'ala nonuju pitupaar lamai jojoo tebinaatang ane temanuk sanu maala nosambale sima tepombee ei'Alata'ala. Watu siira jojoo eiri'uamo eilalong nupayangan, te'Alata'ala mboto nonauba tebamba nupayangan he'ua.



Lamai he'ua nenyau teujang sanu jio nengongondok. Teujang e'endenya apampulueleo ane apampulumbengi jio nengondok! Teogo valii nesuvung makancang lamai tetana. Jojoo tesasagara eijuniaa nalapoy nuogo, maampo tebubuut sanu mapangkat tutuu.




Jojoo sanu netuvu eibaowan naate, tapi jio tetoo-too ane tebinaatang-binaatang sanu umai eipayangan he'ua. Tepayangan lalantapo eiogo ane sima he'ua jojoo sanu eiri'ua eilalong nupayangan he'ua tataap ma'aman.




Touk teujang nengondok, tepayangan lalantap eibabok nuogo e'endenya limambulang, ane lamai he'ua seeleo tepayangan netetaango eibabok eisobua tebuut. Tapi tetana ulengi nobu'e nuogo. Touk tolumbulang, tebuntuan nubuut nompamulamo inita.




Touk apampulueleo, siNuh nolapasa sambaang te'aloaga antau mongita teogo nooti atau jiompo. Te'aloaga he'ua neleak menekai uma'o melolo tebaowan sanu mo'ogal, tapi jio maala na'ajaok tesapa-sapa.



Lamai he'ua siNuh nolapasa sambaang temerpati. Tapi jio maala valii na'ajaok tebaowan sanu mo'ogal, jaok netencile eisiNuh. Sodumingga lamai he'ua sia nolapasa'onye sambaang temerpati, ane netencile nongomung teroong nusaitun eingunjunya! Teogo he'ua noole jaok tetutudaong pamulamo metuvuonye!




SiNuh netaangonye sodumingga ane nolapasa sambaang temerpati otolungkanina'onya. Sangkaning eini, temerpati he'ua na'ajaok pomoiaong ane jio najaok menekai. Teogo no'ogalo!




Rombulang vavalinyamai te'Alata'ala nonjarita eisiNuh, "Si'emu ane jojoo tebinaatang he'ua maala molinjo'imo tepayangan e'eini. Mo'oungamo ane omo'upumo sanu mabari ane bu'eimo tejuniaa." Karna he'ua siira nonuru'i teparenta nu'Alata'ala ane nolinjo'imo tepayangan.



Touk menyau lamai tepayangan, siNuh nonusung tevatuvatu ane nogutu teporampunong tepombee ane nombeena lasiambaang lamai jojoo tebinaatang sanu maala nosambale sima tepombee. Tepombee nopa'asanang teambok nu'Alata'ala ane Siia nombarakai siNuh, telapinya ane teunga-unganya.




Te'Alata'ala nongular, "Sia'u nojanji Sia'u jio kana mongutukonye tetana eini karna temanusia atau mopo'orua tejuniaa mepake tebuntul, maampo temanusia odosa lamai olulumbi niira."




Lamai he'ua te'Alata'ala noguntu tepulagian pabibia simamo tetanda tejanji-Nya. Ane tepulagian mesuvung eilangit, te'Alata'ala ane tetoo-too-Nya kana molambot tesapa sanu jinanjia nu'Alata'ala.

*Eini tejarita nu'Alata'ala lamai teKejadian 6-8.*


4. Tepejanjiong Nu'Alata'ala  
Concoono Si'Abram



Metoung-toung touk teogo buntul he'ua nontiangonye te'ababari numanusia ejuniaa, ane siira jojoo monjarita tebasa sanu selio-lio. Tapi tetoo-too he'ua jio nonuruk ei'Alata'ala. Maampo siira mo'ounya ane omo'upu siira jio mombu'ei tejuniaa, siira neincong jojoo ane nombaung selibok tekota.




Siira tututuu maangka ane siira jio nomaduli tesapa sanu noulara nu'Alata'ala. Siira nogutu temenara sanu mapangkat tutuu untuk uma'o majaok eisuruga. Te'Alata'ala mo'otoi jojoo sanu norancanaa niira maala nogauka.



Jadi te'Alata'ala nombalik tebasa niira majari mabari tebasa ane nepudadag siira eijojo tejuniaa. Tekota sanu pinogutu niira tinope teBabel, sanu tebatuanya "meingu."



Monggatustoung lamai he'ua, te'Alata'ala nonjarita eisotoo sanu tinopei si'Abram. Te'Alata'ala nongulara eisiaa, "Na'omo linjo'i tekampung ni'oo ane terururus ni'oo ane na'omo eipomoiaong sanu Utujuja eisi'oo. Sia'u kana mombarakaimu ane mogutu si'oo majari tebangsa. Sia'u kana mogutu tetopemu mooge. Sia'u kana mombarakai tetoo sanu mombarakai si'oo ane mongutuk tetoo sanu mongutuk si'oo. Jojoo terurus eijuniaa kana nobarakai malabat si'oo."



Lamai he'ua si'Abrah nonuru'i te'Alata'ala. Siia uma'omo concoono silapinya, si'Sarai, ane jojoo tevotuangnya ane jojoo tehartanya ane uma'omo eitana sanu tinujua nu'Alata'ala, he'ua ei'Tana nu'Kana'an.




Watu si'Abrah najaok ei'Kana'an, te'Alata'ala nonjarita, "Itai eipapalit ni'oo. Jojoo tetana sanu inita ni'oo kana Uveena eisi'oo ane eibija ni'oo simamo tewarisan." Lamai he'ua si'Abrah nomoia eitana he'ua.



Vavalii seeleo, si'Abrahm netepojaok si'Melkisedek, te'imam nu'Alata'ala. Te'Alata'ala sanu Mapangkat he'uapa tedewa-dewa sanu ntaninya. Si'Melkisedek nombarakai si'Abrahm ane nongular, "Patuvaya te'Alata'ala sanu nogutu telangit ane tetana mombarakai si'Abrahm." Lamai he'ua si'Abrahm nombee si'Melkisedek sompulu perseen lamai jojoo sanu umai eisiia.




Mabari tetoung malabat, tapi si'Abrahm ane si'Sarai jiompo ouna langkai. Vavalii sembengi te'Alata'ala nongulara'onye eisi'Abrahm ane nojanjionye si'Abrahm kana ouna ane tebjia te'ababari selilio tevituong eilangit. Si'Abrahm nomarcaya tejanji nu'Alata'ala. Te'Alata'ala nonganggap si'Abrahm he'ua tetoo sanu tutuu karna sia nomarcaya tejanji nu'Alata'ala.




Lamai he'ua te'Alata'ala nogutu tepejanjiong concoono si'Abram. Te'Alata'ala nongular, "Sia'u kana mombee eisi'oo sotoo teunga lamai te'alaemu mboto. Sia'u mombeena tetana nuKana'an eibijamu." Maampo sima he'ua, metoung-toung si'Abram jiompo na'aala teunga langkai.

*Tejarita nu'Alata'ala lamai teKejadian 11-15.*

## 5. Teunga Sanu Jinanjia




Touk sompuluntoung si'Abrahm ane si'Sarai najaok eiTana nuKana'an, siira jiompo vinenii teunga. Karna he'ua, si'Sarai, telapi ni'Abrahm, nongular eisiia, "Karna jiompo tinuluni nuSiopu sia'u molumalo ane sia'u neisimo, alamo tetujuongu si'Hagar. Polapi siiia antau sia'u maala ounga lamai siiia."




Jadi si'Abrahm no'oturu concoono si'Hagar. Siombulang lamai he'ua si'Hagar noguungaa teunga langkai, ane si'Abrahm nonopeinya si'Ismael. Tapi si'Sarai nogirang eisi'Hagar. Watu si'Ismael sompulu toluntoung, te'Alata'ala nongular eisi'Abrahm.




Te'Alata'ala nongular, "Sia'umo teSiopu Sanu Mabarka. Sia'u kana mogutu tepejanjiong concoono si'oo." Lamai he'ua si'Abram nopolosuncul. Te'Alata'ala nongular eisi'Abram, "Si'oo kana majari tesiamma mabari tesuku. Sia'u kana mombee eisi'oo ane eibija ni'oo teTana nuKana'an simamo tetana ni'emu ane Sia'u kana majari te'Alata'ala niira seende-endenya. Sima tetanda tepejanjiong he'ua, si'oo kanaboi monyuna jojoo telangkai eilalong nururusmu."



"Telapimu, siSarai, kana mo'ounga sotoo telangkai. Siia kana majari teunga sanu jinanjia. Topei siia si'Ishak. Sia'u kana mogutu tepejanjiong concoono siia, ane siia kana majari tebangsa sanu mooge. Sia'u kana mogutu si'Ismael majari tebangsa sanu mooge valii, tapi tepejanjiong he'ua concoono si'Ishak." Lamai he'ua te'Alata'ala nombolos tetope ni'Abram, sanu tebatuanya "siama sanu pinuji" majari si'Abraham, sanu tebatuanya "siama nutoo bari." Te'Alata'ala valii nombolos tetope niSarai majari siSara, sanu tebatuanya "teunga bengkel nupuang."




Te'Alata'ala nojanji eis'i Abraham siia kana ouna ellalong sontoung. Eieleo he'ua si'Abraham nonyuna jojoo telangkai nururusnya. Kira-kira sontoung lamai he'ua, watu si'Abraham no'umur sagatusntoung ane siSara siompu-luntoung, siSara no'ouna teunga langkai. Siira nonopeinya si'Ishak sima sanu tinuuna nu'Alata'ala eisiira.



Watu si'Ishak najarimo sotoo teunga logas, teSiopu nonyo'arai te'aparcayaong ni'Abraham ane nongulara, "Alamo si'Ishak, teunga sotoo-tooana'onya, ane sambalemo siia sima tepombee eiSia'u." Si'Abraham nonuru'ionye te'Alata'ala ane nesiap monyambale teunganya.




Pepees si'Abraham ane si'Ishak nelampa nonunggai teporampunong tepombee, si'Ishak no'utanya, "Papa, si'ita umaimo te'ayu nuapi, tapi eipaio tedomba?" Si'Abraham nonyimbat, "Uti, te'Alata'ala kana monyadiaa tedomba."



Watu siira najaok eiporampunong tepombee, si'Abraham nomungui telima ane tepaa ni'Ishak ane dinulina'onya eibabok nuporampunong. Tapi watu siia sede'ipo monyambale teunganya, te'Alata'ala nonjarita, "Pengondok! Inyaa nopatei teunga he'ua! Eleo eini Sia'u mo'otoi si'oo mobule eiSia'u karna si'oo jio montaana teungamu mboto lamai Sia'u."




Ei'osuk ri'ua si'Abraham ne'ita sambaang tedomba langkai sanu tetanduknya netesait ei'oruiong. Te'Alata'ala nonyadiaa'omo tedomba langkai he'ua untuk majari tepombee tepombolos ni'Ishak. Si'Abraham nasanang teambok. Siia nolapasa si'Ishak ane nombeena tedomba langkai he'ua sima tepombee.



Lamai he'ua te'Alata'ala nonjarita eisi'Abraham, "Karna si'oo nesiap mombeena ei'Sia'u jojoo, maampo teungamu sotoo-tooana'onya, Sia'u nojanji kana mombarakaimu. Tebijamu kana melabi lamai tevituong-vituong eilangit. Karna si'oo nonuru'i teparenta'U, jojoo tebangsa eijuniaa kana nobarakai malabat tebijamu."

*Eini tejarita nu'Alata'ala lamai teKejadian 16–22.*

6. Si'Ishak Na'aala Telapi Ane Rotoo Teunga



Watu si'Abraham neisimo tutuu ane si'Ishak teunga logaso, si'Abraham nonuju sotoo tevotuangnya netencile ipaio te'asal nurururusnya untuk ma'ajaok sotoo telapi nuunganya si'Ishak.



Touk lamai tepelampa sanu maavar tutuu, te'Alata'ala nonujua tevotuang he'ua eisiRibka, sanu temo'upu nusia'a ni'Abraham.



Sii nosintuvui untuk molinjo'i terurusnya ane nonuut tevotuang he'ua. Si'Ishak selengaan nolapinya watu siia najaok.




Metoung-toung lamai he'ua, si'Abraham naate ane jojoo tejanji sanu pinogutu nu'Alata'ala eisiai eilalong nupejanjiong he'ua tinarusa eisi'Ishak. Tapi telapi ni'Ishak, siRibka, jio umai ounga. Ane si'Ishak jio umai sotoo teunga langkai siia jio maala majari siama mabari tebangsa.



Si'Ishak nongganea siRibka, ane teSiopu nombeena siia nolumalo teunga he'ua nepinga. Rotoo teunga he'ua negiging eilalong nu'ounagaong niRibka, jadi siRibka nonjarita concoono te'Alata'ala.



Te'Alata'ala nongulara eisiRibka, "Robangsa kana metuvu lamai rotoo sanu eilalong nu'ounagaongmu. Siira kana netetenggelong ane tesia'a kanaboi monuru'i tetuai."




Watu siira pinoguungaa, tesia'a mododa ane ovulu, ane siira nonopeinya si'Esau. Tetuai nesuvung pepees nondiit tetojung ni'Esau, ane siira nonopeinya siYakub.

*Eini tejarita nu'Alata'ala lamai teKejadian 24:1–25:26.*


## 7. Te'Alata'ala Nombarakai SiYakub



Pepees teunga-unga maba'ay, siRibka nagalang eisiYakub, tapi si'Ishak nagalang eisi'Esau. SiYakub seilu nomoia eivonua, tapi si'Esau seilu mogubas.



Vavalii seeleo, si'Esau netencile lamai pogubasong, siia noorok tutuu. Si'Esau nonjarita eisiYakub, "Tuluni sia'u venii sede'i sanu pinogabu ni'oo he'ua." SiYakub nonyimbat, "Venii luulu tewarisan ni'oo sima teunga sanu pabibia eisia'u." Jadi si'Esau nombee tehaak-haaknya sima teunga sanu pabibia eisiYakub. Lamai he'ua siYakub nombee sanu no'inang he'ua.




Jijiompo maate, si'Ishak seilu mombarakai si'Esau sima tetoo sanu monarima tehartanya. Tapi jijiompo siia monggauka'onya, siRibka ane siYakub nongakal siia. SiYakub nongakal najari si'Esau. Si'Ishak neisimo ane nobuta. SiYakub nepake tepakean ni'Esau ane nepake te'uli nubembe eigorogot ane eilimanya.




SiYakub najaok eisi'Ishak ane nonjarita, "Sia'u si'Esau. Sia'u najaok antau si'oo maala mombarakai sia'u." Watu si'Ishak nonyalaop tevulu nubembe ane nonganyok tepakeannya, siia nomikir he'ua si'Esau ane nombarakainya.




Si'Esau nengkeles eisiYakub karna siYakub nongago tehaak-haaknya sima teunga sanu pabibia ane valii binarakai niamanya. Jadi siia norancanaa momate siYakub touk siama niira maate.




Tapi siRibka ne'eepe terancana ni'Esau he'ua. Jadi siRibka nonuju siYakub melampa maavar untuk momoia concoono terururusnya.



SiYakub nomoia concoono terururus niRibka rompuluntoung. Watu siia nomoia ampi he'ua, siia nolapi ane ouna sompulu rotoo teunga telangkai ane sotoo tebengkel. Te'Alata'ala nogutu siia nakaya.



Touk rompuluntoung siYakub naavar lamai tevonuanya eiKana'an, siia netencile uma'o concoono telapi-lapinya, teunga-unganya, tevotuang-votuangnya, ane jojoo tebinaatangnya.



SiYakub nobule tututuu karna sia nomikir si'Esau ulengi seilu momate sia. Jadi jijiompo siia majaox ampi he'ua siia noma'atu eisi'Esau mabari tebinaatang untuk tepombee. Tevotuang-votuang sanu nongomung tebinaatang-binaatang he'ua nonjarita eisi'Esau, "Tevotuang ni'oo, siYakub, nombeemo tebinaatang-binaatang eini eisi'oo. Siia eipupuri."




Tapi si'Esau nongampunimo siYakub, ane siira nadandalan netepo-jaokonye. SiYakub nomoia nasanang eiKana'an. Lamai he'ua si'Ishak naatemo, siYakub ane si'Esau nongubura siia. Tepejanjiong sanu jinanjia nu'Alata'ala eisi'Abraham ane si'Ishak e'eini tinarusa niYakub.

*Eini tejarita nu'Alata'ala lamai teKejadian 25:27-33:20.*


8. Te'Alata'ala Nonyalamata  
SiYusup Ane Teruru-rurusnya



SiYakub umai sompulu rotoo teunga. Teunga sanu no'agalaninya he'ua, siYusup. Vavalii seeleo siYakub nonuju siYusup mongita teruru-rurusnya sanu pepees nomiara tebinaatang.




Teruru-rurusnya nengkeles eisiYusup karna siama niira melabi magalang eisiia ane siYusup nongupi siia kana majari tetopomimpin niira. Watu siYusup najaok eiruru-rurusnya, siira nera'op ane nobaluk siia eitopobaluk-topobaluk tevotuang.




Jijiompo siira metencile uma'o eivonua, teruru-rurus nîYusup nonjeaka tepakeannya ane nongembea teraa nubembe eipakean he'ua. Lamai he'ua siira nombee tepakean he'ua eisama niira ane nongakal eisiiat tebinaatang nomine siYusup. SiYakub noondong tutuu.




Tetopobabaluk tevotuang nongomung siYusup uma'o eiMesir. TeMesir he'ua tenegara sanu mooge ane mo'uig sanu umai eipipit nuBangkalang nuNil. Tetopobabaluk tevotuang nobaluk siYusup eisotoo tetopomimpin nupomarenta sanu makaya. SiYusup molayani mombosi tetopomimpinnya, ane te'Alata'ala nombarakai siYusup.



Silapi nutopomimpinnya me'eseilua ane monyo'arai monyaapi concoono siYusup, tapi siYusup jio seilu monggauka tedosa ei'Alata'ala. Telapi nutopomimpin najari nongoungkul ane nolampoa antau siYusup nora'op ane nontamaa eipanjara. Maampo siYusup pinanjaramo tataap boi nonuru'i te'Alata'ala, ane te'Alata'ala nombarakai siia.



Rontoung lamai he'ua, siYusup ulengi eipanjara, maampo siia jio nonggauka te'asasala. Vavalii seeleo tePuang nuMesir, sanu tinope siPiraun, nongupi rongkaning. Siia nobule ane neingu. Jio sotoo lamai tepenasehatnya maala mombatuaa teupiong he'ua.



Te'Alata'ala nombeemo eisiYusup te'apapande untuk mombatuaa teupiong he'ua, jadi siPiraun nonuju tetoo mongomung siia lamai tepanjara. SiYusup nombatuaa teupiong he'ua ane nonjarita, "Te'Alata'ala kana mombee pituntoung watunya melolu sanu mombosi ane pituntoung teorok."



SiPiraun masanang tutuu eisiYusup ane siia nogutu siia najari tetoo sanu mokuasa ororua'onya eijojoo teTana nuMesir!




E'endenya pituntoung watunya melolu sanu mombosi, siYusup nongulara eitoo-too untuk mongembea rompulu perseen tepelolu sontoung sangkaning. Lamai he'ua pituntoung teorok najaoko, siYusup nobaluk sanu no'inang eitoo-too antau siira umai sanu no'inang!




Teorok majaat he'ua jio boi eiMesir, tapi valii eiKana'an eipaio siYakub ane teruru-rurusnya nomoia.




Lamai he'ua siYakub nonuju sompulutoo teunga-unganya uma'o eiMesir untuk mongoli sanu no'inang. Watu teruru-rurusnya najaok eisiYusup, siira jio mo'otoi siia. Tapi siYusup mo'otoi siira.




Touk nonyo'arai siira antau mo'otoi siira natobamo atau jiompo, siYusup nonjarita eisiira, "Sia'u terurus ni'emu siYusup! Inyaa mobule. Si'emu nonyo'arai untuk mogutu te'ajajaat ane si'emu nobaluk sia'u sima tevotuang, tapi te'Alata'ala nomake te'ajajaat untuk te'ombombosi! Pajaoko ane pomoia eiMesir antau sia'u maala mombee te'aniong eisi'emu, telapi-lapi ane teunga-unga ni'emu."



Lamai he'ua teruru-rurusnya netencile uma'o eivonua ane nonjaritaa eisiYakub. SiYakub nasanang tutuu ne'eepe siYusup ulengi netuvu.




Maampo siYakub neisimo, siia nombalik uma'o eiMesir concoono pitumpulu limatoo terurusnya, ane siira jojoo nomoia eiri'ua. Jijiompo siYakub naate, siia nombarakai jojoo teunganya.




Tepejanjiong sanu vineena nu'Alata'ala eisi'Abraham tinarusa eisi'Ishak, ane eisiYakub, lamai he'ua eisompulu rotoo teunga-unga niYakub ane eirurus niira. Tebija lamai sompulu rotoo he'ua majari sompulu rorua tesuku nu'Israel.

*Eini tejarita nu'Alata'ala lamai teKejadian 37-50.*

## 9. Te'Alata'ala Noleva SiMusa




Touk siYusup naate, jojoo terurusnya nomoia eiMesir. Siira ane tebija niira tatarus nomoia eiri'ua e'endenya metoung-toung ane umai mabari teunga. Siira notope tetoo-too nu'Israel.



Apagatusntoung lamai he'ua, terekenong nutoo-too nu'Israel najari mabari tutuu. Tetoo-too nuMesir nongelinganimo siYusup ane jojoo sanu ginauka'onya nondulu siira. Siira najari nobule eitoo-too nu'Israel karna sira mabari tutuu. Karna he'ua, siPiraun sanu nokuasa watu he'ua, nogutu tetoo-too nu'Israel najari tevotuang-votuang niira.



Tetoo-too nu'Mesir nomajujut tetoo-too nu'Israel nombaung mabari tebanganan ane jojoo tekota. Nokarajaa tutuu he'ua nogitu te'otutuvu niira masesa. Tapi te'Alata'ala nombarakai siira, ane siira umai nelabi mabari teunga.



SiPiraun ne'ita tetoo-too nu'Israel noguungaa mabari teunga mede'i, jaok siia nomarentaa jojoo teunga langkai nu'Israel norampaka niira eilalong nuBangkalang nuNil antau teunga-unga he'ua maate.



Sotoo eiolot nubengkel nu'Israel noguungaa teunga langkai. Siia ane silapinya nonyoyoka teunga he'ua.



Watu tetosia'ang nuunga he'ua jiongo maala nonyoyoka siia, siira nongembea siia eilalong nukaranji sanu melantap eipipit nuBangkalang nuNil antau siia jio nopatei. Tlesia'a bengkelnya mongita-ngitai antau mo'otoi tesapa sanu kana majari eisiia.



Sotoo teunga bengkel niPiraun ne'ita tekaranji he'ua ane nongita eilalong. Watu siia ne'ita teunga he'ua, sia nongalanya sima teunganya mboto. Siia nonambo sotoo tebengkel nu'Israel antau momiara siia. Sanu tinambo he'ua siinanya mboto. Watu teunga he'ua netuvu maba'ayo ane jiongo nonusu, siinanya nombeena'onye eiunga bengkel niPiraun he'ua, sanu nonopeinya siMusa.




Vavalii seeleo, watu siMusa no'umur apampuluntoung, siia ne'ita sotoo tetoo nuMesir nombobog sotoo tevotuang nu'Israel. SiMusa nonyo'arai monyabataa tetagu sababangsa siia.



Watu siia nomikir jio umai sanu me'ita, siia nomate tetoo nuMesir he'ua ane nongubura tebatangnya. Tapi sotoo ne'ita tesapa sanu ginauka niMusa.



Watu siPiraun mo'otoi sima tegauk he'ua, siia nonyo'arai momate siMusa. SiMusa nelinjok lamai teMesir uma'o tetana sanu jio pinomoiai nutoo eipaio siia kana ma'aman.




SiMusa najari tetopomiara tedomba eitana sanu jio pinomoiai nutoo naavar lamai teMesir. Siia nolapi sotoo tebengkel lamai tetana he'ua ane ounge rotoo telangkai.




Vavalii seeleo watu siMusa pepees nongangatu tedombadombanya, siia ne'ita te'oruiong nelegang. Tapi te'oruiong he'ua jio na'arampunong. SiMusa uma'o mongita nelabi mo'osuk. Watu siia nongosu'i te'oruiong sanu nelegang he'ua, tesuara nu'Alata'ala nongular, "Musa, lapasa tesandalmu. Si'oo ne'oro eitana sanu mapacing."



Te'Alata'ala nongular, "Sia'u ne'ita te'asesesa nutoo-too'U. Sia'u kana monujumu eisiPiraun jaok si'oo maala mongomung tetoo-too nu'Israel mesuvung lamai te'asesesa niira eiMesir. Sia'u kana mombeena siira teTana nuKana'an, tetana sanu Sia'u nojanjia eisi'Abraham, eisi'Ishak, ane eisiYakub."




SiMusa no'utanya, "Ane siira seilu mo'otoi sisee sanu nonuju sia'u, tesapa sanu uulara?" Te'Alata'ala nongular, "Sia'umo seende-endenya. Ulara eisiira, 'Sanu seende-endenya nonuju sia'u eisi'emiu.' Nongular valii eisiira, 'Sia'u siYahweh, te'Alata'ala nusiopumu si'Abraham, si'Ishak ane siYakub.' Eini tetope'U seende-endenya."



SiMusa nobule ane jio seilu uma'o eisiPiraun karna siia nomikir siia jio maala nonjarita mapande, jadi te'Alata'ala nonuju tesia'a niMusa, siHarun, antau monduluinya. Te'Alata'ala nolambota siMusa ane siHarun, siPiraun jio kana me'eepe tetutuunong-Nya.

*Eini tejarita nu'Alata'ala lamai teKeluaran 1-4.*

## 10. Sompulu Te'abalaan



SiMusa ane siHarun uma'o nonoloi siPiraun. Siira nonjarita, "Sima eini tejarita nu'Alata'ala nutoo-too nu'Israel, 'Patuvaya tetoo-too'U uma'o!" Tapi siPiraun jio no'inepea siira. Siia jio momatuwaya tetoo-too nu'Israel mabebas, tapi siia nogutu tepokarajaaong niira melabi movoat.




SiPiraun tatarus jio seilu momatuwaya tetoo-too nu'Israel uma'o, jaok te'Alata'ala noma'atu sompulu te'abalaan eiMesir. Malabat lamai te'abalaan eini, te'Alata'ala nonujua eisiPiraun Siia mo'uig he'uapa siPiraun ane jojoo tedewa eiMesir.



Te'Alata'ala nombalik teBangkalang nuNil najari teraa, tapi siPiraun jiompo momatuvaya tetoo-too nu'Israel uma'o.




Te'Alata'ala nonjaoka tetumpang-tumpang eiMesir. SiPiraun nomongi eisiMusa untuk mongalina tetumpang-tumpang he'ua. Tapi touk jojoo tetumpang he'ua naate, siPiraun boi ma'adal teamboknya ane jio nomatuvaya tetoo-too nu'Israel uma'o.




Jadi te'Alata'ala nonjaoka te'abalaan nusisiok ane lamai he'ua te'abalaan nulale. SiPiraun noleva siMusa ane siHarun ane nongulara eisiira, ane siira mengondoka te'abalaan he'ua, tetoo-too nu'Israel maala uma'o. SiMusa nonggane, antau te'Alata'ala mope'ilang jojoo telale eiMesir, tapi siPiraun nopa'adal teamboknya ane jio momatuvaya tetoo-too nu'Israel uma'o.



Lamai he'ua, te'Alata'ala nonjaoka tepees momate jojoo tebinaatang nutoo-too nuMesir. SiPiraun nopa'adal teamboknya, ane siia jio momatuvaya tetoo-too nu'Israel uma'o.



Lamai he'ua te'Alata'ala nonuju siMusa morampaka teavu eitolo niPiraun. Watu siia nonggauka'onya tepees nu'uli sanu mogutu mepees nembu'a eiMesir, tapi jio umai sotoo tetoo-too nu'Israel inana nupees he'ua. Te'Alata'ala nopa'adal teambok niPiraun, ane siPiraun jio momatuvaya tetoo-too nu'Israel uma'o ane mabebas.




Touk he'ua te'Alata'ala nonjaoka teujang nu'ees sanu no'oropu tetutudaong eiMesir ane nomate sissee-see sanu nesuvung lamai tevonua. SiPiraun noleva siMusa ane siHarun ane nongulara eisiira, "Sia'u nonggauka'omo tedosa. Si'emiu maalamo melampa." Lamai he'ua siMusa nonggane ane teujang nu'ees nengondok.




Tapi siPiraun nonggauka'onye tedosa ane nopa'adal teamboknya ane jio momatuvaya tetoo-too nu'Israel uma'o.



Jadi te'Alata'ala nonjaoka mabari te'alipapaa sanu najaok eiMesir. Te'alipapaa eini nenginang tetoro sanu jio pino'oropu nuujang nu'ees he'ua.




Lamai he'ua te'Alata'ala nonjaoka tendoung sanu tatarus e'endenya tolueleo. Karna nondoung sima he'ua tetoo-too nuMesir jio maala molinjo'i tevonua niira. Tapi eipomoiaong nutoo-too nu'Israel umai terarat sanu narava.



Maampo najarimo sesio te'abalaan he'ua, siPiraun jiompo seilu momatuvaya tetoo-too nu'Israel uma'o ane mabebas. Karna siPiraun jio seilu mo'inepe, umai sangaya te'abalaan sanu ponou'ongnya te'Alata'ala norancanaa monjaoka. Te'abalaan eini kana mombalik tepikiran niPiraun.

*Eini tejarita nu'Alata'ala lamai teKeluaran 5-10.*


11. TePaska Nutoo-too NuYahudi



Te'Alata'ala nolambota eisiPiraun, ane siia jio mombeena tetoo-too nu'Israel uma'o, te'Alata'ala kana momate jojoo teunga langkai sanu pabibia lamai temanusia maampo tebinaatang ejojoo tepomoiaong eiMesir. Watu siPiraun ne'eepe eini siia tataap jio nonarima tejarita nu'Alata'ala.




Te'Alata'ala nombeena tecara monyalamata teunga langkai sanu pabibia nutoo-too sanu nomarcaya eiSiia. Jojoo tesoungaong kanaboi momile sambaang teunga nudomba atau nubembe sanu jio mengkido. Tebinaatang he'ua kanaboi nosambale.




Lamai he'ua siira kanaboi monggeleli sanggaat lamai teraanya eisabata oigi, eisabata oanong ane eibabok nubamba nuvonua niira. Siira monapa te'anesnya ane no'inang molongkang, concoono teroti sanu jio oragi. Siia valii nongulara siira kanaboi mesiapo molinjo'imo teTana nuMesir watu siira menginang.



Tetoo-too nu'Israel nonggauka jojoo sanu pinarentaa'omo nu'Alata'ala eisiira. Watu tanga ndoung he'ua te'Alata'ala uma'o eisosombonua eiMesir ane nomate sosotoo teunga niira langkai sanu pabibia.




Jojoo tetoo nu'Israel umai oraa eipapalit nubamba nuvonua niira, karna he'ua te'Alata'ala nolabata tevonua-vonua niira ane jojoo tetoo eilalongnya nasalamat. Siira sinalamat karna teraa nuunga nudomba.



Tapi tetoo-too nuMesir jio nomarcaya te'Alata'ala ane jio nonuru'i teparenta-parenta-Nya. Karna he'ua te'Alata'ala jio nolabati tevonua-vonua niira. Te'Alata'ala nomate jojoo teunga langkai sanu pabibia eiMesir.




Jojoo teunga langkai sanu pabibia nutoo-too nuMesir naate, lamai valii teunga langkai pabibia nutoo sanu tinaani eipanjara, jaok teunga langkai pabibia niPiraun valii naate. Nabari tetoo notumangis eiMesir karna siira noondong tutuu.



Watu ndoung he'ua valii siPiraun noleva siMusa ane siHarun ane nonjarita, "Incona'omo tetoo-too nu'Israel ane linjo'imo teMesir lolongkang!" Tetoo-too nuMesir valii nonuju tetoo-too nu'Israel selengaan nelampa.

*Eini tejarita nu'Alata'ala lamai teKeluaran 11:1–12:32.*

## 12. Tepesuvung



Tetoo-too nu'Israel tututuu masanang nolinjo'i teMesir. Siira pine'ebebas lamai tepevotuanong, ane siira uma'o monunggai teTana sanu Jinanjia nu'Alata'ala eisiira! Tetoo-too nu'Mesir nombenii tepombee eitoo-too nu'Israel tesapa-sapa sanu pinomongi niira maampo tebulaan ane teperak ane tesasagara sanu ooli ntaninya. Lasiatoo lamai tetana ntaninya nomarcaya ei'Alata'ala ane nosigalot concoono tetoo-too nu'Israel watu siira nolinjo'i teMesir.




Te'Alata'ala nomimpin siira nelampa eitolo niira eilalong nuerii nuru'ong sanu mapangkat eiwatu eleonya, sanu majari teerii nuapi eiwatu ndoungnya. Te'Alata'ala kalepu concoono siira ane nonuju siira watu siira nonarusa tepelampa. Sanu kanaboi nogauka niira boi monuut Siiia.



Jio neende lamai he'ua, siPiraun ane tetoo-toonya nabalik tepikiran niira ane seilu tetoo-too nu'Israel majorionye tevotuang niira. Te'Alata'ala nopa'adal teambok niPiraun valii antau tetoo-too ne'ita boi Siamo te'Alata'ala sanu Tutuu. Te'Alata'ala nopa'adalonye teambok niPiraun antau siira mo'otoi Siia, teSiopu, mo'uig he'uapa siPiraun ane tedewa-dewanya.



Jadi siPiraun ane tetantaranya nesave eiroda nolilivur tetoo-too nu'Israel untuk monjaria'onye siira tevotuang. Watu tetoo-too nu'Israel ne'ita tetantara nuMesir najaok, siira nasadar siira neteipit eiilot nutantara niPiraun ane teDagat sanu Mododa. Siira nobule tutuu ane neroroa, "Nete'uya si'ita nolinjo'i teMesir? Si'ita kana maate!"



SiMusa nongulara eitoo-too nu'Israel, "Inyaa mobule! Te'Alata'ala kana monyabataa si'emu eleo eini ane monyalamata si'emu." Lamai he'ua te'Alata'ala nongulara eisiMusa, "Tuju tetoo-too he'ua monungga teDagat sanu Mododa."




Lamai he'ua te'Alata'ala nombalik teerii nuru'ong he'ua eiolot nutoo-too nu'Israel ane tetoo-too nuMesir. Karna he'ua tetoo-too nuMesir jiongo maala mongosu'i tetoo-too nu'Israel.




Te'Alata'ala nonuju siMusa nongengkat telimanya eibabok nudagat ane nongantaa teogo. Lamai he'ua, te'Alata'ala nogutu tebarat nonyumpar ndoung he'ua ane nonjurut teogo. Tedagat nete'anta ma'o te'oigi ane ma'o te'oanong, jaok nogutu tejalang molabati tedagat.



Tetoo-too nu'Israel nelampa netava tedagat eitana sanu mo'ogal concoono tevombong teogo eisabata nu'oigi ane eisabata nu'oanong niira.



Lamai he'ua te'Alata'ala nogutu teerii nuru'ong he'ua neteengkat  
ane tetoo-too nuMesir he'ua ne'ita tetoo-too nu'Israel nelinjok.  
Tetoo-too nuMesir nolilivur siira.




Jadi, tetoo-too nuMesir nonuuta tetoo-too nu'Israel eijalang sanu  
molabati tedagat, tapi te'Alata'ala nogutu tetoo-too nuMesir  
majari nobule ane nogutu teroda niira neteondok. Siira neroroa,  
"Pelinjok! Te'Alata'ala nonyabataa eitoo-too nu'Israel!"




Touk jojoo tetoo nu'Israel nasalamato eisantava nudagat, te'Alata'ala nonuju siMusa mongengkata'onye telimanya. Touk siia nonuru'i-Nya, teogo noni'upi tetantara nuMesir ane netencile uma'o nosoincong vavalii. Jojoo tetantara nuMesir nolodong.



Watu tetoo-too nu'Israel ne'ita tetoo-too nuMesir naatemo, siira nomarcaya ei'Alata'ala ane nomarcaya eisiMusa sotoo tenabi nu'Alata'ala.



Siira valii nadandalan tutuu karna te'Alata'ala nonyalamata siira lamai te'amateong ane tepevotuanong! Siira pa'ali nabebas monyomba ane monuru'i te'Alata'ala. Tetoo-too nu'Israel nogumbuya teumbuyong antau noramea te'ebebas niira ane nomuji te'Alata'ala karna Siiia nonyalamata siira lamai tetantara nuMesir.



Te'Alata'ala nomarentaa tetoo-too nu'Israel moramea teEleo nuPaska sontoung sangkaning antau molambot iama'o te'Alata'ala nombee siira nondaag tetoo-too nuMesir ane te'ebebas niira lamai tepevotuanong. Siira moramea concoono nonyambale tedomba sanu jio napapa'itonong, ane menginangnya concoono teroti sanu nopogutu jio mepake teragi.

*Eini tejarita nu'Alata'ala lamai teKeluaran 12:33–15:21.*


13. Tepejanjiong Nu'Alata'ala  
Concoono Tetoo-too Nu'Israel



Lasiambulang touk nesuvung lamai teMesir, te'Alata'ala nomimpin siira nalabat tetana sanu jio pinomoiai nutoo. Siira uma'o eibuut sanu tinope teBuut nuSinai. Eini tebuut sanu selio-lio eipaio siMusa ne'ita terui sanu na'arampunong. Tetoo-too nongoroa tetenda-tenda eipuu nubuut he'ua.




Te'Alata'ala nonjarita eisiMusa ane eitoo-too nu'Israel, "Ane si'emu monuruk Sia'u ane tepejanjiongU, si'emu kana majari tebangsa sanu Upilei, tepomarenta nu'imam-imam, ane tebangsa sanu mapacing."



Tolueleo lamai he'ua, touk tetoo-too mesiapo teambok niira, te'Alata'ala nenyau eiBuut nuSinai concoono tegorung, te'ilat, tebol ane tesuara nutorompel sanu noporos. Boi siMusa sanu vinee nolala'e eibuut he'ua.



Lamai he'ua te'Alata'ala nogutu tepejanjiong concoono siira ane nonjarita, "Sia'umo teSiopu, te'Alata'ala ni'emiu, sanu nonyalamata si'emiu lamai tepevotuanong eiMesir. Inyaa monyomba tedewa ntaninya."



"Inyaa mogutu tebarhala antau monyombanya, karna Sia'u, teSiopu, te'Alata'ala sanu me'irihati. Inyaa momake tetope'U tecara sanu jio inoongkoi. Molambot ane monjagai te'apacing eiEleo nuPengondok. Gauka jojoo tepokarajaanong ni'oo eilalong onoeleo, karna eieleo pepitu he'ua teeleo si'emiu mengondok untuk molambot Sia'u."



"Po'ongko eisiamamu ane eisiinamu. Inyaa momate. Inyaa monyaapi. Inyaa mongangga. Inyaa mongakal. Inyaa me'eselua telapi nutagumu, tevonuanya, atau tesapa umai eisiia."



Lamai he'ua te'Alata'ala nonulis Sompulu teParenta-Nya, eirombo'a tevatu ane nombeena'onya eisiMusa.



Te'Alata'ala nonuju tetoo-too nu'Israel mogutu sobua tetenda sanu kusus. He'ua notope teTenda nuPejajao'ong. TeTenda nuPejajao'ong umai rokamar, inontoi tekaing ntinoena sanu mooge. Boi te'Imam sanu Mooge sanu maala mentama eisabata nukaing he'ua sontoung sangkaning, karna eilalong nukamar sanu mapacing he'ua inembea tepejanjiong nu'Alata'ala eisobua tepeti sanu mapacing tinope tepomoiaong nu'Alata'ala.



Tetoo sanu jio monuruk tehukum nu'Alata'ala kanaboi mongomung tebinaatang eiporampunong tepombee sanu eitolo nuTenda nuPejajao'ong untuk mombee tepombee ei'Alata'ala. Sotoo te'imam otugas monyambale sambaang tebinaatang no'omung ane norampuni eiporampunong tepombee he'ua. Teraa nupombee he'ua tepombayar tehukuman nudosa nutoo sanu mombeena tepombee he'ua ane mogutu siiia melivas eimata nu'Alata'ala. Te'Alata'ala nomile tesia'a niMusa, siHarun, ane tebijanya majari te'imam-imam-Nya.



Tetoo-too nu'Israel nonarima tepejanjiong nu'Alata'ala ane seilu monuruk tehukum sanu vineena nuAlata'ala eisiira, boi monyomba te'Alata'ala, ane majari tetoo-too sanu pinilei-Nya. Tapi jio neende touk siira nojanji untuk nomarcaya ei'Alata'ala, siira odosa majaat tututuu.



Apampulueleo, siMusa umai eiBuut nuSinai netepojaok concoono te'Alata'ala. Tetoo-too nu'Israel mabasa metaang siMusa metencile. Karna he'ua siira nongomung tebulaan eisiHarun ane nomongi mogutua tebarhala untuk siira!



SiHarun nogutu tebarhala lamai tebulaan sima teunga nusapi. Tetoo-too nu'Israel nompamulamo nonyomba ane nombee tepombee eibarhala he'ua! Te'Alata'ala nongoungkul tututuu karna tedosa niira ane morancanaa momate siira. Tapi siMusa nongganea siira, ane te'Alata'ala nomo'inepea tegananya ane jio nomeate siira.



Watu siMusa menyau lamai tebuut ane ne'ita tebarhala he'ua, siia nongoungkul tututuu ane siia nopo'orua rombo'a tevatu eipaito te'Alata'ala nonulis Sompulu teParenta-Nya.



Lamai he'ua siia nopo'orua tebarhala he'ua jaok najari teavu, norampaka teavu he'ua eilalong nuogo ane nomajujut tetoo-too nu'Israel nenginung teogo he'ua. Te'Alata'ala nonjaoka tepees eitoo-too he'ua ane nabari sanu naate.




SiMusa nogutu rombo'a tevatu sanu vuou mombolosi sanu pino'oruanya. Lamai he'ua siMusa nolala'eonye tebuut ane nonggane ei'Alata'ala antau mongampuni tetoo-too he'ua. Te'Alata'ala nomo'inepea siMusa ane nongampuni siira. SiMusa nenyauonye lamai tebuut concoono Sompulu teParenta nu'Alata'ala eirombo'a tevatu sanu vuou. Lamai he'ua te'Alata'ala nomimpin tebangsa nu'Israel nompamula tepelampa lamai teBuut nuSinai uma'o eiTana sanu Jinanjia. Te'Alata'ala nombee valii mabari tehukum ane te'aturan ntaninya sanu kanaboi noturu'i. Ane tetoo-too he'ua monuru'i tehukum-hukum eini, te'Alata'ala nojanji Siiia kana mombarakai ane monjagai siira. Ane siira jio monuru'i tehukum-hukum he'ua, te'Alata'ala kana mohukum siira.

*Eini tejarita nu'Alata'ala lamai teKeluaran 19-34.*

14. Nongalalampa Eitana  
Sanu Jio Pinomoiai Nutoo




Te'Alata'ala nongulara eitoo-too nu'Israel tehukum-hukum sanu kanaboi siira monuru'i sima sanggaat lamai tepejanjiong concoono siira. Touk he'ua siira nolinqo'i teBuut nuSinai. Te'Alata'ala nompamulamo nomimpin siira monunggai teTana sanu Jinanjia, sanu valii tinope teKana'an. Teerii nuru'ong nonujua tejalang sanu kanaboi nolabati niira.



Te'Alata'ala nojanji eisi'Abraham, eisi'Ishak, ane eisiYakub, Siia kana mombeena teTana sanu Jinanjia eibija niira, tapi watu he'ua ulengi mabari tesuku ntaninya sanu nomoia eiri'ua. Siira notope tetoo-too nuKana'an. Tetoo-too nuKana'an jio monyomba atau monuruk ei'Alata'ala. Siira nonyomba tedewa-dewa sanu jio tutuu ane nonggauka mabari tegauk sanu majaat.



Te'Alata'ala nonjarita eitoo-too nu'Israel, "Si'emu kanaboi monyuvuna jojoo tetoo nuKana'an eitana nupejanjiong. Inyaa mogutu te'ombombosiong concoono siira ane inyaa molapi concoono siira. Si'emu kanaboi meruaa jojoo tebarhala niira. Ane si'emu jio monuruk Sia'u, si'emu kana monyomba tebarhala niira ane jio monyomba Sia'u."




Watu tetoo-too nu'Israel najaok eipeontoong nuTana nuKana'an, siMusa nomile sompulu rotoo, sosotoo lamai sompulu rosuku nu'Israel. Siia nombeena teparenta uma'o ane momamatai tetana he'ua antau mongita sima tesapa tetana he'ua. Siira valii momamatai tetoo-too nuKana'an antau mongita siira mo'uib atau molunttoy.




Sompulu rotoo he'ua nomamatai teKana'an e'endenya apampulu'eleo, lamai he'ua siira netencile. Siira nongulara eitoo-too nu'Israel, "Tetananya mombosi tutuu, ane tehasilnya mabari!" Tapi sompulu temata-mata nongular, "Tekota-kotanya tututuu morosong, ane tetoo-toonya tututuu mooge! Ane si'ita mongeva siira, si'ita nodaag. Siira kana momate si'ita!"




Selengaan siKaleb ane siYosua, rotoo temata-mata ntaninya, nongulara, "Tutuu tetoo-too nuKana'an mapangkat ane mo'uig, tapi si'ita tutuu maala mondaag siiral! Te'Alata'ala kana monyabataa si'ita!"




Tapi tetoo-too he'ua jio me'eepe siKaleb ane siYosua. Siira nongoungkul eisiMusa ane eisiHarun ane nonjarita, "Nete'uya si'emu nongomung si'ami eipomoiaong mesilaka eini? Aginyamo si'ita nomoia eiMesir he'uapa nopatei eilalong nupepapateonong ane telapi ane teunga-unga ni'ita majari tevotuang." Tetoo-too seilu nomile tetopomimpin sanu vuou antau mongomung siira metencile eiMesir.




Te'Alata'ala tututuu nongoungkul, ane Siia najaok eiTenda nuPejajao'ong. Te'Alata'ala nonjarita, "Karna si'emu nongeva ane jio seilu monuru'i Sia'u, jojoo tetoo kana nongalalampa eitana sanu jio pinomoiai nutoo. Jojoo tetoo sanu no'umur rompuluntoung atau nelabi meisi kana maate eitana sanu jio pinomoiai nutoo ane jio melampai teTana sanu Jinanjia. Tapi boi siYosua ane siKaleb maala momoia eitana he'ua."




Watu tetoo-too nu'Israel he'ua ne'eepe tesaba he'ua, siira nonosol karna siira no'odosa. Siira nesiap uma'o mongeva teKana'an. SiMusa molambota siira antau jio uma'o karna te'Alata'ala jio monuut siira, tapi siira jio mo'inepea siia.



Te'Alata'ala jio nonuut siira eilalong nupepapateonong eini, karna he'ua siira dinaag ane nabari lamai siira naate. Lamai he'ua tetoo-too nu'Israel sanu jio naate netencile lamai teKana'an ane nongalalampa nolabati tetana sanu jio pinomoiai nutoo e'endenya apampuluntoung.



E'endenya apampuluntoung tetoo-too nu'Israel nongalalampa eitana he'ua sanu jio pinomoiai nutoo, te'Alata'ala nonyadiaa jojoo sanu noparluua niira. Te'Alata'ala nombenii siira teroti lamai tesuruga, sanu tinope "mana." Siia valii nonjaoka mabari tepuyu (sangaya temanuk) ma'o eipomoiaong niira antau siira maala menginang te'anes. E'endenya apampuluntoung he'ua, te'Alata'ala tatarus nonjagai tepakean ane tesapatu niira antau jio majari nopuungo.




Te'Alata'ala nonggauka sanu mabaraka nombenii siira teogo lamai tevatu. Maampo sima he'ua, tetoo-too nu'Israel notinti'ual ane nonasu eitolo nu'Alata'ala ane eitolo niMusa. Maampo siira sima he'ua, te'Alata'ala ulengi nesetia eijanji-janji-Nya eisi'Abraham, eisi'Ishak, ane eisi'Yakub.



Sangkaning, watu tetoo-too nu'Israel no'otou'ong teogo, te'Alata'ala nonjarita eisiMusa, "Ponjarita eivatu he'ua, ane teogo mesuvung lamai eiri'ua." Tapi siMusa jio nonuru'i teparenta nu'Alata'ala eitontoongo nutoo jojoo concoono nombobog tevatu he'ua rongkaning nepake teto'on. Siia jio nonjarita eivatu he'ua. Teogo nesuvung lamai tevatu antau jojoo tetoo maala menginung, tapi te'Alata'ala nongoungkul eisiMusa ane nonjarita, "Si'oo jio momimpin siira mentama eiTana sanu Jinanjia."



Siira nongalalampa eitana sanu jio pinomoiai nutoo e'endena apampuluntoung, jaok jojoo tetosia'ang niira maate. Te'Alata'ala nomimpin tesuku nu'Israel uma'oonye eipeontoong nuTana sanu Jinanjia. Watu he'ua siMusa tututuu meis, karna he'ua te'Alata'ala nomile siYosua antau mondulu siia momimpin tetoo-too. Te'Alata'ala nojanji eitoo-too nu'Israel, vavalii seeleo Siia kana monuju sotoo tenabi ntaninya sima siMusa.




Lamai he'ua te'Alata'ala nonuju siMusa nolala'e eibabok nubuut antau siia maala me'ita teTana sanu Jinanjia. SiMusa ne'ita teTana sanu Jinanjia tapi te'Alata'ala jio momatuvaya nopentamainya. Lamai he'ua siMusa naate, ane tetoo-too nu'Israel noondong e'endenya tolumpulueleo. SiYosua najari tetopomimpin niira sanu vuou. SiYosua he'ua tetopomimpin sanu mombosi karna siia nomarcaya ane nonuru'i te'Alata'ala.

*Eini tejarita nu'Alata'ala lamai teKeluaran 16–17; teBilangan 10–14; 20; 27; te'Ulangan 34.*


15. Tetoo-too Nu'Israel  
Nentama EiTana Sanu Jinanjia.




Ponou'ongnya najaok tewatunya tetoo-too nu'Israel mentama eiKana'an, teTana sanu Jinanjia. SiYosua nonuju rotoo temata-mata uma'o eikota nutoo-too nuKana'an sanu tinope teYerikho. Tekota he'ua sanu otembok sanu morosong. Eikota he'ua nomoia sotoo telonte tetopenya siRahab sanu nonjagai temata-mata he'ua ane nondulu siira nelinjok. Siia nonggauka'onya karna siia ne'eepemo sima te'Alata'ala ane nomarcaya eiSiia. Siira nojanji untuk monjagai siRahab, siamanya, siinanya ane teruru-rurusnya watu teYerikho nopo'orua nu'Alata'ala.



Untuk mentama uma'o eiTana sanu Jinanjia eitoo-too nu'Israel kanaboi metava eiBangkalang nuYordan. Te'Alata'ala nongulara eisiYosua, "Tujumo te'imam uma'o mongaliuru." Watu tepaa nu'imam nongumpag teBangkalang nuYordan he'ua, teogo neondok naanjul jaok tetoo-too nu'Israel maala nelampa eitana sanu no'ogal.




Touk tetoo-too nelampa eiBangkalang nuYordan, te'Alata'ala nongulara eisiYosua iama'o tecaranya untuk mongeva teKota nuYerikho sanu morosong. Tetoo-too nu'Israel nonuru'i te'Alata'ala. Jojoo tetantara ane te'imam nomaliti teKota nuYerikho sangkaning seeleo e'endenya onoeleo.




Eieleo opepitua'onya, tetoo-too nu'Israel nomaliti tekota he'ua pitungkaning. Watu siira notouk nomaliti tekota he'ua ponou'ong ngkanina'onya, tetantara neroroa pepees te'imam nonyuba tectorompel niira.




Lamai he'ua tetembok eipapalit teKota nuYerikho nagali noguar! Tetoo-too nu'Israel nopo'orua jojoo tesagara eikota he'ua simamo sanu pinarenta nu'Alata'ala. Boi siRahab siamanya, siinanya ane teruru-rurusnya sanu pina'asalamat. Siira neincong concoono tetoo-too nu'Israel. Lamai he'ua tetoo-too nuKana'an sanu ntaninya ne'eepe tetoo-too nu'Israel nopo'orua teYerikho, siira nobule tetoo-too nu'Israel kana mongeva siira valii.




Te'Alata'ala nomarentaa'omo tetoo-too nu'Israel inyaa medadameong concoono tetoo-too nuKana'an. Tapi tetoo-too nuKana'an lamai teGibeon nolampoa eisiYosua ane nongular siira najaok lamai pomoiaong sanu naavar lamai teKana'an. Siira nomongi siYosua antau medadameong concoono siira. SiYosua ane tetoo-too nu'Israel jio no'utanya ei'Alata'ala lamai paio tetoo-too nuGibeon he'ua nomoia. Jadi siYosua nedadameong concoono siira.




Tetoo-too nu'Israel nongoungkul watu siira mo'otoi tetoo-too nuGibeon nonipumo siira, tapi siira tataap nonjaga tejanji nupedadameong sanu pinogutu niira concoono siira karna tejanji he'ua pinogutu eitolo nu'Alata'ala. Lamai he'ua tepuang-puang nutoo-too nuKana'an sanu ntaninya, tetoo-too nu'Amori, ne'eepe simamo tetoo-too nuGibeon nogutumo nedadameong concoono tetoo-too nu'Israel. Tepuang-puang nu'Amori nongincona tetantara niira najari tetantara sanu mooge tutuu ane nongeva tetoo-too nuGibeon. Tetoo-too nuGibeon nom'a'atu tetutuunong eisiYosua nomongi nodului.




Karna he'ua siYosua nongincona tetantara nu'Israel, ane siira nelampa e'ende nundoung untuk uma'o majaoek eitoo-too nuGibeon. Eiwatu titieleo siira nonarigut tetoo-too nuKana'an temusu-musu niira ane nongeva siira.



Te'Alata'ala nonyabataa untuk tetoo-too nu'Israel teeleo he'ua. Te'Alata'ala nogutu tetoo-too nuKana'an neingu ane Siia nonjaoka teujang nuvatu-vatu nu'ees sanu mooge sanu nopa'aate nabari tetoo nuKana'an.



Valii te'Alata'ala nogutu teeleo nongondok eilangit jaok tetoo-too nu'Israel magana tewatu nondaag tetoo-too nu'Amori. Teeleo he'ua te'Alata'ala nondulu tetoo-too nu'Israel nondaag tutuu.



Touk te'Alata'ala nondaag tetantara he'ua, mabari tetoo-too nuKana'an sanu ntaninya neincong antau mongeva te'Israel. SiYosua ane tetantara nu'Israel nongeva ane nomate siira.



Notouk mabari nepapateong eini, te'Alata'ala nombeena eisuku-suku nu'Israel tetilal niira mboto lamai teTana sanu Jinanjia. Lamai he'ua te'Alata'ala nombeena tetoo-too nu'Israel nedadameong eijojoo tepebataong.




Watu siYosua neisimo, siia noleva jojoo tetoo nu'Israel. Lamai he'ua siYosua nolambota siira kanaboi monuruk tepejanjiong sanu pinogutu nu'Alata'ala concoono tetoo-too nu'Israel eiSinai. Tetoo-too nojanji untuk tataap nesetia ei'Alata'ala ane monuru'i tehukum-hukum-Nya.

*Eini tejarita nu'Alata'ala lamai siYosua 1-24.*


16. SiGideon Ane  
Tetopolapas-topolapas Ntaninya




Touk siYosua naate, tetoo-too nu'Israel jio nonuru'i te'Alata'ala ane jio nombugo tetoro tetoo-too nuKana'an ane jio nonuru'i tehukum-hukum nu'Alata'ala. Tetoo-too nu'Israel nompamulamo nonyomba tedewa-dewa nuKana'an, jio umai boi nonyomba teSiopu, te'Alata'ala sanu tutuu. Tetoo-too nu'Israel jio umai tepuang, karna he'ua jojoo tetoo nonggauka tesapa sanu pinikira niira sanu tutuu eisiira.




Karna tetoo-too nu'Israel jio nonuru'i te'Alata'ala, Siia nohukum siira ane nomatuvaya siira dinaag numusu-musu niira. Temusu-musu eini nongangga lamai tetoo-too nu'Israel, nopo'orua tesasagara niira, ane nomate nabari tetoo niira. Notouk netoung-ntoung jio nonuru'i te'Alata'ala ane sinesai numusu-musu niira, tetoo-too nu'Israel natoba ane nomongi te'Alata'ala nonyalamata siira.



Lamai he'ua te'Alata'ala nombee tetopolapas sanu nonyalamata siira lamai temusu-musu niira ane nogutu najari nembombosiong eitana he'ua. Tapi lamai he'ua tetoo-too nongelingani te'Alata'ala ane nompa-mulamo nonyomba eintaninya valii. Jadi te'Alata'ala nomatuvaya tetoo-too nuMidian, tesuku sanu nomoia ne'o'osu'ong ncoono siira, antau mondaaga siira.




Tetoo-too nuMidian nongala jojoo tehasil nelolu tetoo-too nu'Israel e'endenya pituntoung. Tetoo-too nu'Israel tutuu nobule, siira nencoyok eilulu nuvatu antau tetoo-too nuMidian jio ma'ajaok siira. Ponou'ongnya, siira nonggane ei'Alata'ala antau Siia monyalamata siira.




Vavalii seeleo, sotoo tetoo nu'Israel tetopenya siGideon nomauta tegando eipomoiaong sanu mosoyok antau tetoo-too nuMidian jio mongangganya. TeMalaekat nuSiopu najaok eisiGideon ane nonjarita, "Te'Alata'ala monaguimu, tetantara sanu malangkai. Uma'o ane monyalamata tetoo-too nu'Israel lamai tetoo-too nuMidian."




Watu he'ua siama niGideon jio nonuru'i te'Alata'ala ane umai opatung tebarhala. Te'Alata'ala nonuju siGideon mongguara tepatungnya. SiGideon nobule eitoo-too, jadi siia netaang jaok ndoungnya. Lamai he'ua siia nongguara tepatung he'ua ane pino'oruanya. Siia nongoroa teporampunong tepombee eipomoiaong nubarhala he'ua ane nombeena tepombee ei'Alata'ala eiporampunong he'ua.




Modondongnyamai tetoo-too ne'ita tebarhala he'ua touko gnuara, ane siira tutuu nongoungkul. Siira uma'o eivonua niGideon seilu momatenya, tapi tesiamma niGideon nonjarita, "Nete'uya si'emiu monyo'arai mondulu tedewa ni'emiu? Ane siia tedewa, patuvaya siia monyabataa te'alaenya mboto!" Karna siamanya nonjarita sima he'ua, tetoo-too he'ua jio momate siGideon.




Lamai he'ua tetoo-too nuMidian najaokonye seilu mongangga lamai tetoo-too nu'Israel. Terekenong niira nabari tutuu jio maala norekeng. SiGideon nonginconga tetoo-too nu'Israel antau mongeva siira. SiGideon nomongi rorua tetanda lamai te'Alata'ala antau siia maala nomarcaya te'Alata'ala kana mepake siia monyalamata tetoo-too nu'Israel lamai tetoo-too nuMidian.




Pamulaongnya, siia nongembea tevulu nudomba eitana ane nomongi ei'Alata'ala nomatuvaya tengolu titieleo manavu eivulu nudomba he'ua tapi jio eitana eiri'ua. Te'Alata'ala nonggauka he'ua. Mondoungnyamai, sisia nomongi antau tetana eiri'ua monjou tapi tevulu nudomba he'ua no'ogal. Te'Alata'ala nonggauka he'ua valii.




Tolumpulu roribu tetantara nu'Israel najaok eisiGideon, tapi te'Alata'ala nongulara eisiia nabari tutuu tetoo ane jio maala sima he'ua. Jadi siGideon nonencilea rompulu roribu sanu nobule mepapateong. Te'Alata'ala nongulara'onye eisiGideon nabari tutuu tetoo ane jio maala sima he'ua. Jadi siGideon nonuju netencile tetoo-too, netetoro jamo siira tolugatustoo tetantara.




Ndoung he'ua te'Alata'ala nongulara eisiGideon, "Na'omo eitenda-tenda nutoo-too nuMidian ane watu si'oo me'eepesapa sanu noulara niira, si'oo jiongo mobule." Jadi ndoung he'ua, siGideon uma'o eitenda-tenda nutoo-too nuMidian ane ne'eepesotoo tetantara nuMidian nongulara eitagunya sima teupiong. Tetagu nutantara he'ua nonyimbat, "Teupiong eini tebatuanya sima siGideon kana mondaag teMidian!" Watu siGideon ne'eepesotoo he'ua, siia nonyomba ei'Alata'ala.




Lamai he'ua siGideon netencile eitantaranya ane nombee sosotoo sobua teterompet, tepongembeong nuogo lamai tetana, ane te'obor. Siira nekopung tepomoiaong nutoo-too nuMidian pepees no'oturu. Tolugatustoo telangkai nongomung te'obor eilalong nupongembeong lamai tetana antau jio no'ita nutoo-too nuMidian.



Lamai he'ua, selio-lio siira jojoo nombeseka tepongembeng-pongembeng sanu pinonyoyo'i te'obor he'ua. Siira nonyuba tetorompel-torompel niira ane neroroa, "Untuk teSiopu ane untuk siGideon!"



Te'Alata'ala nogutu tetoo-too nuMidian neingu, sima he'ua tetoo-too nuMidian najari neeva-evaong ane nompamula nepapateong. He'uapa, tetoo-too nu'Israel sanu ntaninya ilevai lamai tevonua niira antau majaok mondulu molilivur tetoo-too nuMidian. Siira nomate nabari tetoo nuMidian ane nolilivur tectoronya nesuvung lamai tetana niira. Sagatus rompuluributoo tetoo nuMidian naate eieleo he'ua. Te'Alata'ala nonyalamata'omo te'Israel.



Tetoo-too seilu monjaria siGideon tepuang niira. SiGideon jio nonarima tepomongiong niira, tapi siia nomongi sanggaat tesincing-sincing tebulaan sanu inalamo niira lamai tetoo-too nuMidian. Tetoo-too nombee siGideon nabari tebulaan.



Lamai he'ua siGideon nepake tebulaan he'ua nogutu tepakean sima pinake nu'Imam sanu Mooge. Tapi tetoo-too nompamula nonyomba tepakean he'ua sima tebarhala. Karna he'ua te'Alata'ala nohukumonye te'Israel karna siira nonyomba tebarhala. Te'Alata'ala nomatuvaya temusu-musu niira nondaaga siira. Ponou'ongnya siira nomongi tulungonye ei'Alata'ala, ane te'Alata'ala nonuju siira sotoo tetopolapas sanu ntaninya.



Tecara eini mongulit nengkaning-ngkaning. Tetoo-too nu'Israel nogutu tedosa, te'Alata'ala nohukum siira, siira natoba, ane te'Alata'ala nonuju tetopolapas nonyalamata siira. E'endenya netoung-ntoung te'Alata'ala nonuju nabari tetopolapas sanu nonyalamata te'Israel lamai temusu-musu niira.



Ponou'ongnya, tetoo-too nomongi ei'Alata'ala sotoo tepuang, sima sanu eibangsa-bangsa ntaninya. Siira seilu sotoo tepuang sanu mapangkat, mo'uig, ane maala momimpin siira eilalong mepapateong. Te'Alata'ala jio seilu tepomongiong eini, tapi Siia nombenii siira tesapa sanu seilu niira.

*Eini tejarita nu'Alata'ala lamai teHakim-hakim 1-3,6-8.*

17. Tepejanjiong Nu'Alata'ala  
Concoono SiDaud



SiSaul he'ua tepuang pabibia tetoo-too nu'Israel. Siia mapangkat ane magaya, iama'o sanu no'eseilua nutoo-too nu'Israel. Eipamulaongnya, siSaul nomarenta mombosi, tapi neende-ende siia nopo'okurang teambok nu'Alata'ala karna jio nonuruk tependenta-Nya. Karna he'ua te'Alata'ala nomile tetoo sanu ntaninya untuk majari tepuang mombolos siia.



Te'Alata'ala nomile sotoo teunga logas nu'Israel tetopenya siDaud untuk majari tepuang touk siSaul. Jijimpo siDaud majari tepuang, siia sotoo tetopomiara tedomba lamai teKota nuBetlehem. Pepees nonjaga tedomba-domba niamanya, siDaud nomatemo sambaang tesinga ane sambaang teboruang sanu seilu momate tedomba-dombanya. SiDaud valii sotoo sanu mombosi teambok ane tutuu. Siia nomarcaya ane nonuru'i te'Alata'ala.




SiDaud najari sotoo tetantara ane tetopomimpin sanu mombosi. Watu siDaud ulengi molumbi, sia nongeva tetoo sanu mooge tetopenya siGoliat. SiGoliat he'ua sotoo tetantara sanu pinaundura, sanu mo'ug tutuu, ane tepangkatnya sede'ipo tolumeter! Tapi te'Alata'alaa nonggauka tegauk sanu mabaraka ane nondulu siDaud nomate siGoliat ane nopa'asalamat tetoo-too nu'Israel. Touk he'ua, siDaud nondaaga mabari temusu nu'Israel, karna he'ua tetoo-too nomujinya.



SiSaul najari mogirang teamboknya karna tetoo-too magalang eisiDaud. SiSaul mengkaning-kaningna'onya nonyo'arai untuk momate siDaud. Jadi siDaud nencoyok lamai siSaul. Vavalii seeleo, siSaul pepees nelolo siDaud antau siia maala nopateinya. SiSaul nentama eilulu nuvatu sanu selilio eipaio siDaud nencoyok. Tapi siSaul jio mo'otoi. SiDaud eleo eini no'osuko tutuu ncoono siSaul ane maala nopateinya, tapi siDaud jio momatenya. Tapi, siDaud nonibas songkolo tebjunyaa untuk nopo'itaa'onya eisiSaul karna siia jio seilu momate siSaul untuk majari tepuang.




Ponou'ongnya, siSaul naate ellalong nupepapateonong, ane siDaud najari tepuang nu'Israel. Siia he'ua sotoo tepuang sanu mombosi, ane tetoo-too seilu eisii. Te'Alata'ala nombarakai siDaud. SiDaud nongeva eilalong nabari tepepapateonong ane te'Alata'ala nondulu siia nondaaga temusumusu nu'Israel. SiDaud nondaaga tetoo-too nuYerusalem sanu watu he'ua jio tetoo-too nu'Israel. Siia nogutu tekota he'ua tekota nupomarenta. E'endenya siDaud he'ua tepuang, te'Israel najari mo'uig ane makaya.



SiDaud seilu mombaung teVonua nu'Alata'ala eipaio jojoo tetoo maala monyomba te'Alata'ala ane mombeena tepombee eisii. E'endenya kira-kira 400 toun, tetoo-too nonyombamo te'Alata'ala ane nombeena tepombee eisii eiTenda nuPeajao'ong sanu vinaungo niMusa.



Tapi te'Alata'ala nonuju siNabi Natan eisiDaud nongulara tetutuunong eini, "Karna si'oo tetoo sanu nepapateong, si'oo jio mombaung teVonua'U eini. Boi teungamu mombaungnya. Tapi, Sia'u kana tututuu mombarakai si'oo. Sotoo lamai tebijamu kana momarenta eibabok nutoo-too nu'Israel seende-endenya!" Sosotoo tepuang sanu pinilei nu'Alata'ala tinope 'temesias'. TeMesias sanu jinanjia eiPuang siDaud sotoo tebija numbotonya sanu kana momarenta seende-endenya.



Watu siDaud ne'eepe eini, siia selenganan nonyukur ane nomuji te'Alata'ala karna siia nojanjia'omo siDaud tepangka mooge ane mombarakai siia. SiDaud jiompo mo'otoi siambengi te'Alata'ala kana monggauka jojoo tesaba eini. Otutuunya, tetoo-too nu'Israel kanaboi metaang meende jiompo teMesias, tepuang sanu jinanjia, makaok, sede'ipo seribuntoung.



SiDaud nomarenta ma'adil ane mesetia e'endenya metoung-toung, ane te'Alata'ala nombarakainya. Tapi, mo'osuk ponou'ong otutuvunya siia nonggauka tedosa sanu majaat tutuu eitolo nu'Alata'ala.



Vavalii seeleo, watu jojoo tetantaranya ma'o mepapateong, siDaud nembaung lamai no'oturu ane ne'ita sotoo tebengkel magaya neliing. Tetopenya siBatsyeba. Siia telapi ni'Uria. Si'Uria sotoo sanu nesetia eilalong nutantara niDaud.



Jio umai negois, siDaud nonuju sotoo untuk mongomung tebengkel he'ua eisia. Maampo siDaud umaimo soso'uya telapi siia no'oturu ncoono siBatsyeba ane tinujunya netencile. Soso'uyambengi touk he'ua siBatsyeba noma'atu tetutuunong eisiDaud nongulara siia i'ompongo.



SiDaud noleva si'Uria metencile lamai tepepapateonong ane nonujunya uma'o eisilapinya. Tapi si'Uria jio selunya untuk metencile pepees tetantara sanu ntaninya pepees nepapateong. Touk rongkaning tinolaknya, siDaud nonuju si'Uria metencile eitepapateonong ane nonuju siia inembea eipaio temusu-musu sanu mo'ug jaok siia naate.



Touk si'Uria naatemo, siDaud nolapi siBatsyeba. Lamai he'ua, siBatsyeba noguungaa sotoo teunga langkai. Te'Alata'ala nongoungkul tutuu tesapa sanu ginauka niDaud, karna he'ua Siiia nonuju siNabi Natan eisiDaud untuk monujua tedosanya. SiDaud natoba lamai tedosa-dosanya ane te'Alata'ala nongampuninya tapi teunga sanu pinoguungaa he'ua maate.




Vavalii pe'o'oungkulonong eilalong sorurus niDaud e'endenya ponou'ong otutuvunya, tekuasa niDaud majari moluntoy tutuu. Maampo siDaud jio mesetia ei'Alata'ala, te'Alata'ala ulengi nesetia sima atejanji-janji-Nya. SiBatsyeba noguungaa teunga ntaninya, ane nonopeinya siSalomo.

*Eini tejarita nu'Alata'ala lamai 1 siSamuel 10; 15-19; 24; 31; 2 siSamuel 5; 7; 11-12.*

18. Tepomarenta Sanu Netetilal



Touk mabari ntoung, siDaud naate, ane teunganya, siSalomo nompa-mulamo nomarenta ei'Israel. Te'Alata'ala nonjarita eisiSalomo ane no'utanya tesapa sanu tutuu no'eseilua'onya. Watu siSalomo nomongi te'apapande, te'Alata'ala masanang ane nogutunya najari tetoo tutuu mapande ejuniaa. SiSalomo neguru mabari ane majari tehakim sanu mapande tutuu. Te'Alata'ala valii nogutunya makaya tutuu.




EiYerusalem, siSalomo nombaung teVonua nu'Alata'ala sanu irancaaa nepake tesasagara incona'omo niamanya siDaud. Tetoo-too nu'Israel watu he'ua nonyomba te'Alata'ala ane nombeena tepombee eiSiiia eiVonua nu'Alata'ala. Eiwatu he'ua te'ajajaok nu'Alata'ala inita sima teru'ong sanu nombu'ei tevonua he'ua.



Tapi siSalomo nongagalani tebengkel lamai tenegara ntaninya. Siia jio nonuru'i te'Alata'ala concoono nolapi mabari tebengkel, mo'osuk 1.000 too tebengkel sanu pinolapinya! Mabari lamai tebengkel eini lamai tenegara-negara ntaninya ane nongomung tedewa-dewa niira ane tatarus nonyomba tedewa-dewa he'ua. Watu siSalomo neisimo, siia valii nonyomba tedewa-dewa niira.




Te'Alata'ala nongoungkul eisiSalomo. Karna siSalomo jio nonuruk, te'Alata'ala nojanjia Siia kana monilal tepomarenta nu'Israel majari rorua touk te'amateong niSalomo.




Touk siSalomo naatemo, teunganya siRehabeam najari tepuang. SiRehabeam tetoo sanu modoyo. Jojoo tetoo nu'Israel neincong antau nongakui siia sima tepuang. Siira valii mondavivi karna siSalomo nomajujut siira nokarajaa tutuu ane nombayar teasel sanu mabari.




SiRehabeam he'ua modoyo. Siia nonyimbat eisiira, "Pinikir ni'emiu siama'u siSalomo nomajujut si'emiu nokarajaa tutuu, tapi sia'u kana mogutu si'emiu mokarajaa nelabi."



Sompulu tesuku nu'Israel jio nonuru'i siRehabeam. Boi rosuku tataap nesetia eisiiia. Rosuku he'ua tinope tepomarenta nuYehuda.



Sompulu tesuku ntaninya, sanu jio nonuru'i eisiRehabeam, nonjaria sotoo sanu tinopei siYerobeam tepuang niira. Siira nombaung tepomarenta niira eitana nu'utara. Siira tinope tepomarenta nu'Israel.



SiYerobeam jio nonuru'i te'Alata'ala ane nonyabaa tetoo nogugauk tedosa. Siia nombaung rorua tebarhala antau nosomba nutoo-too, ane jio uma'o teYerusalem antau nonyomba te'Alata'ala eiVonua nu'Alata'ala eipomarentaong nuYehuda.



Tepomarenta nuYehuda ane nu'Israel najari temusu ane kalepu nepapateong.



Eipomarenta nu'Israel sanu vuou, jojoo tepuangnya majaat siira jio nonuru'i te'Alata'ala. Mabari lamai tepuang-puang eini pinatei nutoo-too nu'Israel ntaninya sanu seilu majari tepuang mombolos siira.




Jojoo tepuang nu'Israel ane mabari tetoo nonyomba tebarhala sanu nengkaning-ngkaning notuuta concoono teponyaapiong ane sasangkaning nomate teunga niira sima tepombee.




Tepuang-puang nuYehuda he'ua tebija niDaud. Lasiatoo tepuang eini umai tetoo-too sanu mombosi sanu nomarenta ma'adil ane nonyomba te'Alata'ala. Tapi setilalong mooge tepuang nuYehuda majaat, nonggauka sanu majaat antau nongala te'eseseilu niira ane nonyomba tebarhala. Lasiatoo tepuang nonyambale teunga-unga niira sima tepombee eidewa-dewa. Mabari tetoo-too nuYehuda valii jio monuru'i ei'Alata'ala tapi boi nonyomba tedewa-dewa ntaninya.

*Eini tejarita nu'Alata'ala lamai 1 teRaja-raja 1-6; 11-12.*


## 19. Tenabi-nabi



Lamai tepamulaong tetoo-too nu'Israel, te'Alata'ala nonuju tenabi-nabi eisiira. Tenabi-nabi nopo'inepea tetutuunong he'ua lamai te'Alata'ala ane nonjaritaa eitoo-too.




Si'Elia he'ua sotoo tenabi watu si'Ahab najari tepuang nutoo-too nu'Israel. Si'Ahab he'ua tetoo sanu majaat ane nonuju tetoo-too untuk manyomba tedewa sanu jio tutuu tetope siBa'al. Si'Elia nojarita eisi'Ahab, "Jio umai oujang atau ongolu ei'Israel jaok utuju." Tegauk eini nogutu si'Ahab nongoungkul tutuu.



Lamai he'ua te'Alata'ala nonuju si'Elia mencoyok eitana sanu noodoy mo'osuk tengees karna si'Ahab seilu momateinya. Eleo ndoung, temamanuk nongomuna teroti ane te'anes. Si'Ahab ane tepasukannya nelolo si'Elia, tapi jio jinaok niira siia. Teondak watu he'ua tututuu najari ane tengees jiongo oogo.




Jadi si'Elia uma'o eitana ntaninya. Eitana he'ua umai sotoo tetimbala ane teunganya sanu notou'ong te'aniong karna teondak he'ua nonyabaa'omo mo'oro'ong. Tapi siira nongurus si'Elia, ane te'Alata'ala nogutua te'urong pongisiong telabu ane tebotol nulatab antau jio motou'ong. Siira jio notou'ong te'aniong e'ende nuondak he'ua. Si'Elia nomoia ampi he'ua lasia ntoung.



Touk tolu ntoung satanga, te'Alata'ala nonuju si'Elia metencile uma'o ei'Israel ane mojarita eisi'Ahab karna Siia kana menyaua'onye teujang. Watu si'Ahab ne'ita si'Elia siia nojarita, "Si'oo tetoo sanu majaat!" Si'Elia nonyimbat, "Si'oo boi tetoo sanu majaat! Si'oo nolinjo'imo te'Alata'ala sanu tutuu ane nanyomba teBa'al. Omung jojoo tetoo-too nu'Israel uma'o eiBuut nuKarmel."




Jojoo tetoo-too nu'Israel, concoono apa gatus too tenabi nuBa'al, najaok eiBuut nuKarmel. Si'Elia nonjarita, "Jaok siambengi si'emu kana mombalik te'aparcayaong ni'emu? Ane teSiopu sanu tutuu, Siia boi nosomba! Ane teBa'al sanu tutuu, siia boi nosomba!"



Lamai he'ua siElia nojarita einabi-nabi nuBa'al, "Sambale sambaang tebengga ane sadiaa tepombee, tapi inyaa metuvu teapi. Sia'u kana mogutu sanu selilio. Sanu monyimbat mepake teapi, he'ua sanu tututuu." Karna he'ua te'imam-imam nuBa'al nonyadiaa tepombee tapi jio metuvu teapi.




Touk he'ua tenabi-nabi nuBa'al nonggane eiBa'al. "Po'inepea si'ami, boBa'al!" Seseleo siira nonggane ane neroroa. Siira valii noma'iti te'alae niira, tapi teBa'al jio nonyimbat.



Watu beimbengi he'ua, si'Elia nonyadiaa tepombee ei'Alata'ala. Siia nonuju tetoo nu'Israel nondidiga teogo eisompulu robua tetampayan eipombee he'ua antau te'anes, te'ayu, ane tetana valii eipapalit numeja he'ua tututuu monjou.



Lamai he'ua si'Elia nonggane, "BoSiopu, te'Alata'ala ni'Abraham, ni'Ishak ane niYakub, popo'itaa eisi'ami eieleo eini ane Si'oo te'Alata'ala nu'Israel ane sia'u eini tetoponuut-Mu. Simbatia sia'u antau tetoo-too eini mo'otoi, Si'oo sanu tututuu."




Selengaan teapi nenyau lamai telangit norampung te'anes, te'ayu, tevatu, tetana ane teogo sanu eipapalit numeja he'ua. Watu tetoo-too ne'ita he'ua, siira nopolosuncul eitana ane nojarita, "TeSiopu he'ua sanu tututuu! TeSiopu he'ua sanu tututuu!"




Lamai he'ua si'Elia nojarita, "Inyaa nopalosuncul maampo sotoo lamai tenabi-nabi nuBa'al he'ua mosalamata te'alaenya!" Tetoo-too he'ua nera'op tenabi-nabi nuBa'al. Lamai he'ua si'Elia nongomung siira lamai ampi he'ua ane nomate siira.



Si'Elia nojarita eisi'Ahab tepuang, "Petencilemo e'eini uma'o tekota, karna teujang menyaumo." Selengaan telangit najari meitong, ane nenyaua teujang sanu morombak tutuu. Te'Alata'ala nonouka teondak ane nepopo'itaa Siia tututuu te'Alata'ala.



Touk siNabi Elia eijuniaa, te'Alata'ala nomile si'Elisa majari tenabi-Nya. Te'Alata'ala nepake si'Elisa noguntu mabari te'ababaraka. Sangkaning, siNa'amana, tekomandan tantara numusu, umai tepees ei'uli. Siia ne'epemo sima si'Elisa, jadi siia uma'o ane nomongi eisi'Elisa mepe'eondok siia. Si'Elisa nonuju siia uma'o moleep pitu ngkaning eiBangkalang nuYordan.



Watu tepamulaongnya siNa'aman nongoungkul ane jio seilu monggauka he'ua karna siia nomikir teparenta he'ua modoyo. Tapi siia netencile tepikiran ane noleep pitu ngkaning eiBangkalang nuYordan. Gananya pitu ngkaning, siia noleep te'alaenya tutuu neondoko! Te'Alata'ala neondoka siia.



Te'Alata'ala nonuju mabari tenabi ntaninya. Siira jojoo nonuju tetoo-too inyaa manyomba tebarhala. Monggauka sanu ma'adil ane sanu mombosi. Tenabi-nabi nolambota eitoo-too, ane siira jio mengondok monggauka sanu majaat ane jio monuruk teparenta nu'Alata'ala, te'Alata'ala kana majaok, ane Siia mehukum siira.




Biasa tetoo-too jio monuruk te'Alata'ala. Siira nonggauka sanu majaat einabi-nabi ane sasangkaning nomine siira. Sangkaning tenabi siYeremia inavua eilalong nubumbun antau sia maate. Sia nolodong eilalong nugogor sanu umai eilalong nubumbun. Tapi tepuan nonggalani sia ane nonuju tevotuang-votuangnya nonggiur siYeremia nesuvung lamai tebumbun jjiompo sia maate.




Tenabi-nabi he'ua tatarus nonjaritaa sima te'Alata'ala, maampo tetoo-too nengkeles siira. Siira nolambota eitoo-too, ane siira jio matoba, te'Alata'ala kana mopo'oropu siira. Siira nolambota valii eitoo-too sima teMesias sanu jinanjia nu'Alata'ala kana majaok. Eini tejarita nu'Alata'ala lamai 1 Raja-raja 16-18; 2 Raja-raja 5; Yeremia 38.

NOT FOUND


20. Tinania Ane Netencileonye Tetoo-too Nu'Israel




Tetoo-too nu'Israel ane tetoo-too nuYehuda roruanya odosa ei'Alata'ala. Siira jio nonuru'i tepejanjiung sanu pinogutu nu'Alata'ala ncoono siira ei'Buut nuSinai. Te'Alata'ala nonuju tenabi-nabi-Nya nolambota siira antau matoba ane monyombaonye Siia, tapi siira jio seilu mo'inepea tenabi-nabi he'ua.



Jadi te'Alata'ala nohukum rorua tebangsa he'ua ncoono nomatuwaya siira iruua numusu-musu niira. Te'Israel iruua tepomarenta nu'Asyur, tebangsa sanu mo'uig ane mabarani, noropu tepomarenta nu'Israel. Tetoo-too nu'Asyur nomate nabari tetoo eipomarenta nu'Israel, nongala jojoo tesagara sanu ooli, ane norampung nabari tekampung eitana he'ua.



Tetoo-too nu'Asyur nongincona jojoo tetopomimpin, tetoo-too sanu nakaya, ane tetoo-too sanu mapande ane nongomung siira ei'Asyur. Boi tetoo-too nu'Israel sanu tutuu nopukur sanu jio pinatei tataap nomoia eitana nu'Israel.




Lamai he'ua tetoo-too nu'Asyur nongomung tetoo-too tesuku ntaninya antau momoia eipomoiaong sanu luulu tetana tepomarenta nu'Israel. Tetoo-too vuou he'ua nombaungonye tekota-kota sanu iruaa ane nolapi tetoo-too nu'Israel sanu netetalau ampi he'ua. Tebija niira tinope tetoo-too nuSamaria.



Tetoo-too eipomarenta nuYehuda ne'ita iama'o te'Alata'ala nohukum tetoo-too eipomarenta nu'Israel karna jio nomarcaya ane jio nonuru'i-Nya. Tapi siira tataap nonyomba sanu jio teSiopu ane tepatung-patung nutoo-too nuKana'an. Te'Alata'ala nonuju tenabi-nabi antau molambota siira, tapi siira jio seilu mo'inepea.




Kira-kira sagatusntoung touk tetoo-too nu'Asyur meruaa tepomarenta nu'Israel, te'Alata'ala nonuju siNebukadnesar, tePuang nuBabel, antau mongeva tepomarenta nuYehuda. TeBabel he'uа tepomarenta sanu mo'uir. Tepuang nuYehuda nosintuvui siia kana majari tetujuung niNebukadnesar ane mombayar mabari tedoi sontoung sangkaning.




Tapi touk lasiantoung, tepuang nuYehuda orancana mongeva uma'o teBabel. Jadi, tetoo-too nuBabel najaokonye ane nongeva tepomarenta nuYehuda. Siira nongago teKota nuYerusalem, neruaa teVonua nu'Alata'ala, ane nongala jojoo tesagara sanu mosuli lamai tekota he'ua ane lamai teVonua nu'Alata'ala.



Karna tepuang nuYehuda nongeva, siia hinukum. Tetantara niNebukadnesar nomate teunga-unga nupuang eitolonya ane lamai he'ua pinogutunya nobuta. Lamai he'ua siira nongomung tepuang antau nopanjara jaok maate eiBabel.




Si Nebukadnesar ane tetantaranya nongomung sede'ipo jojoo tetoo nu Yehuda uma'o ei Babel, boi tetoo-too sanu nopukur nomoia ei Yehuda antau monuda eijo'ong. Watu tetoo-too nu' Alata'ala nomajujut nolinjo'i te Tana sanu Jinanjia tinope te porampa'ong.




Maampo te' Alata'ala nohukum tetoo-too-Nya karna tedosa niira watu Siia nongomung siira irampaka, Siia jio mongelingana siira atau tejanji-Nya eisiira. Te' Alata'ala tatarus nongingitai tetoo-too-Nya ane nonjarita uma'o eisiira nepake tenabi-nabi-Nya. Siia nojanji, notouk pitumpuluntoung, siira kana netencileonye ei Tana sanu Jinanjia.



Kira-kira pitumpuluntoung lamai he'ua, siKores, tePuang nuPersia, nondaaq teBabel. Karna he'ua tepomarenta nuPersia nombolosi tepomarenta nuBabel. Tetoo-too nu'Israel watu he'ua tinopei tetoo-too nuYahudi ane mabari lamai siira nomoia eiBabel jaok seende-endenya te'otutuvu niira. Boi laso'uyatoo tetoo nuYahudi sanu tutuu meisi sanu ulengi nolambot teTana nuYehuda.



Tepomarenta nuPersia he'ua mo'uig tapi magalang eitoo-too sanu dinaagnya. Jio neende siKores najari tepuang nuPersia, siia nombee teparenta sima eini. Tetoo-too nuYahudi sanu seilu metencile uma'o eiYehuda maala metencile. Siia valii nombee siira tedoi antau mombaungonye teVonua nu'Alata'ala! Karna he'ua notouk pitumpuluntoung irampaka, laso'uyatoo tetoo nuYahudi netencile uma'o eiYerusalem.




Watu siira najaok eiYerusalem, siira nombaungonye teVonua nu'Alata'ala ane tinembok eipapalit teKota nuYerusalem. Maampo siira ulengi kinuasai nupomarenta nuRoma, sima luulumai siira nomoiaonye eiTana sanu Jinanjia ane nonyombba te'Alata'ala eiVonua nu'Alata'ala.

*Eini tejarita nu'Alata'ala lamai 2 teRaja-raja 17:24–25; 2 teTawarikh 36; si'Esra 1–10; siNehemia 1–13.*

21. Te'Alata'ala Nojanjia TeMesias




Lamai tepamulaongnya, te'Alata'ala norancanaa monuju teMesias, tepuang seende-endenya sanu jinanjia nu'Alata'ala. Tejanji sanu pabibia sima teMesias sanu majaok vineena eisi'Adam ane eisi'Hawa. Te'Alata'ala nojanjia tebija niHawa kana nopalungaa sanu kana mopo'orua teva'i nusaa. Tesaa sanu nongakal eisi'Hawa he'ua tepuang nuseetan. Tejanji he'ua obatuanya teMesias kana mondaagi tutuu tepuang nuseetan.




Te'Alata'ala nojanjia eisi'Abraham jojoo tetoo eijuniaa kana nobarakai malabat siia. Eini kana majari watu teMesias majaok vavaliimai. Siia kana mombee tejalang ponyalamata eijojoo tesuku eijuniaa.




Te'Alata'ala nojanja eisiMusa, Siia kana nonuju sotoo tenabi ntaninya sima siMusa. Eini tejanji ntaninya sima teMesias sanu kana majaok.




Te'Alata'ala nojanja eisiDaud sotoo lamai tebija niDaud mboto kana momarenta eibabok tetoo-too nu'Alata'ala seende-endenya. Tebatuanya teMesias he'ua tebija niDaud mboto.



SINabi Yeremia nonjarita tejanji nuAlata'ala eitoo-too-Nya. TeAlata'ala nojanjia Siia kana mogutu tepejanjiong sanu vuou, tapi jio sima tepejanjiong concoono te'Israel eiBuut nuSinai. Eilalong tepejanjiong sanu vuou he'ua, te'Alata'ala kana monulisa teparenta-parenta-Nya eilalong nuambok nutoo-too, sanu momarcaya ei'Alata'ala ei'alaenya mboto, siira kana majari tetoo-too-Nya, ane te'Alata'ala kana mongampuni tedosadosa niira. TeMesias kana mompamula tepejanjiong sanu vuou.



Tenabi-nabi nu'Alata'ala valii nonjarita teMesias sanu kana majaok he'ua sotoo tenabi, te'imam ane tepuang. Sotoo tenabi he'ua mopo'inepea tejarita nu'Alata'ala lamai he'ua monjaritaa tejarita nu'Alata'ala eitoo-too. TeMesias sanu majaok he'ua, tenabi sanu tututuu.




Te'imam-imam nu'Israel nombee tepombee ei'Alata'ala untuk tetoo-too sima tepombolos nuhukuman tedosa-dosa niira. Te'imam-imam valii nonggane ei'Alata'ala untuk tetoo-too. TeMesias sanu majaox kana majari te'Imam sanu Mooge. Siia jio odosa ane kana mombee te'alaenya sima tepombee sanu tututuu ei'Alata'ala ane mombolos tedosa numanusia.




Sotoo tepuang he'ua tetoo sanu momarenta tepomarenta ane mongadili tetoo-too. TeMesias sanu majaox kana majari tepuang sanu tutuu ane mongodung eitahta niDaud tesiopunya. Siia kana monguasai eijojoo tejuniaa seende-endenya, mongadili mombosi ane kalepu momile sanu tutuu.




Tenabi-nabi nu'Alata'ala noramala mabari tegauk sima teMesias. SiNabi Maleakhi noramala sotoo tenabi sanu mombosi kana majaok jijiompo teMesias. SiNabi Yesaya noramala teMesias kana majaok ane nopolungaa lamai sotoo terandaa. SiNabi Mikha noramala Siia kana nopolungaa eiKota nuBetlehem.




SiNabi Yesaya noramala teMesias kana momoia eiGalilea, mopa'adandalan tetoo-too sanu moondong tutuu, mokarevaa tetoo-too sanu tinaani maala nope'ebebas, ane molapasa tetoo-too eilalong nupanjara. Siia valii noramala teMesias kana mepe'eondok jojoo nengangaya tepees, sima nobongol, nobuta, nobobo, atau nolunttoy.




SiNabi Yesaya valii noramala teMesias kana nopobaluk ane no'engkelesi maampo jio osala. Tenabi-nabi ntaninya noramala tetoo-too sanu momate teMesias nongundi untuk ma'aala tepakean-Nya ane Siia kana no'ajaati sotoo tetagu-Nya. SiNabi Sakharia noramala tetagu he'ua kana nobayari tolumpulumbo'a teperak untuk monjaati teMesias.




Tenabi-nabi valii nonjaritaa sima iama'o teMesias kana maate. SiNabi Yesaya noramala teMesias kana nopenyuui, nojajaati, notenggel ane nobouli. Lamai he'ua Siia kana notavala, ane Siia kana maate masesa ane mepees tutuu, maampo Siia jio nonggauka tesala.



Tenabi-nabi nonjaritaa valii teMesias kana tututuu, jio umai odosa. Siia maate antau monarima tehukuman lamai tedosa-dosa nutoo-too ntaninya. Tehukuman he'ua kana majari te'ombombosi nu'Alata'ala eimanusia. Karna he'ua, te'Alata'ala monyadiah teMesias sima tepombee untuk tedosa numanusia.




Tenabi-nabi noramala teMesias kana maate ane te'Alata'ala kana metuvua Siia lamai te'amateong. Karna te'amateong ane te'otutuvuonye nuMesias, te'Alata'ala kana monouka terancana monyalamata tetoo-too odosa ane mompamula tepejanjiong sanu vuou.



Te'Alata'ala nonujua einabi-nabi mabari tegauk sima teMesias, tapi teMesias jiompo majaoek eiwatu tenabi-nabi he'ua. Nelabi lamai apagatusntoung touk sanu iramala sanu ponou'ong, eiwatunya sanu mapaa te'Alata'ala nonuju teMesias majaoek eijuniaa.

*Eini tejarita nu'Alata'ala lamai teKejadian 3:15; 12:1-3; te'Ulangan 18:15; 2 siSamuel 7; siYeremia 31; siYesaya 59:16; siDaniel 7; siMaleakhi 4:5; siYesaya 7:14; siMikha 5:2; siYesaya 9:1-7; 35:3-5; 53; 61; teMasmur 22:18; 35:19; 69:4; 41:9; siSakharia 11:12-13; siYesaya 50:6; teMasmur 16:10-11.*

22. Si'Elisabet Ane SiMaria Majari  
Molumalo Karna Terancana Nu'Alata'ala



Eiwatu luulu, te'Alata'ala nonjarita eitoo-too nu'Israel nepake temalaekat-malaekat ane tenabi-nabi. Tapi nelabi apagatusntoung nalabat ane Siia jio nonjarita eisiira. Jio inototoi sotoo temalaekat najaok eisotoo te'imam sanu meisi tetopenya siSakharia. SiSakharia ane telapinya, si'Elisabet he'ua tetoo-too sanu nonuruk ei'Alata'ala, tapi siira neisimo ane si'Elisabet jiompo ounга.



Watu siSakharia nongganea tebangsa nu'Israel eiVonua nu'Alata'ala, sotoo temalaekat nonjarita eisiSakharia, "Telapimu kana moguungaa sotoo teunga langkai. Si'oo kana monopea siia siYohanes. Siia kana nokusai nu'Alus nu'Alata'ala, ane kana monyiapa tetoo-too molabot te'ajajaok nuMesias!" SiSakharia nonyimbat, "Sia'u ane telapi'u meisimo tutuu untuk mo'ounга! Iama'o sia'u kana mo'otoi tegauk eini kana majari?"



Temalaekat he'ua nonyimbat, "Sia'u tinuju nu'Alata'ala nokareva teKareva sanu Mombosi eini. Karna si'oo jio momarcaya eisia'u, si'oo kana mobobo jaok teunga ni'oo nopoigungaa." Selengaan siSakharia jiongo maala monjarita. Lamai he'ua temalaekat nolinjo'imo siia. Touk he'ua siSakharia netencile na'o eivonua. Jio neende lamai he'ua telapinya nolumalomo.



Nagana onombulang si'Elisabet ei'ompong, temalaekat sanu selilio najaok eirurus ni'Elisabet tetopenya siMaria. Siia ulengi marandaa ane dinutamo nusotoo telangkai tetopenya siYusup. Tapi siira jiompo mo'oturu concoono. Temalaekat he'ua nonjarita, "Si'oo kana molumalo ane moguungaa sotoo teunga langkai. Si'oo kana monopea Siia siYesus. Siia he'ua teUnga nu'Alata'ala sanu Mapangkat ane kana momarenta seende-endenya!"



SiMaria nonyimbat, "Iama'o eini majari, karna sia'u eini jiompo olapi?" Temalaekat he'ua nonjaritaonye, "Te'Alus nu'Alata'ala kana majaok eisi'oo, ane te'ababaraka nuSiopu kana monyabaa si'oo molumalo. Karna he'ua teunga ni'oo kana mapacing, teUnga nuAlata'ala." SiMaria nomarcaya ane nonarima tesapa sanu jinaritaa numalaekat he'ua.



Jio neende notouk temalaekat nonjarita eisiMaria, siMaria uma'o ane nonja'o'i si'Elisabet. Watu si'Elisabet ne'eepe tesalam niMaria, teunga eilalong nu'ounagaong ni'Elisabet nengkening-kening. Rotoo tebengkel he'ua masanang concoono sima tesapa sanu ginauka'omo nu'Alata'ala eisiira. Touk tolumbulang, siMaria netencile eivonua.




Touk si'Elisabet noguungaa teunganya, siSakharia ane si'Elisabet nonopea teunga he'ua siYohanes sima sanu pinarentaa numalaekat eisiira. Lamai he'ua siSakharia netejaritamo. Siia nonjarita, "Pinuji te'Alata'ala, karna Siia nolambot tetoo-too-Nya! Si'oo, teunga'u, kana notope tenabi nu'Alata'ala sanu Mabaraka! Si'oo kana mongular eitoo-too iama'o tedosa-dosa niira maala no'ampuni."

*Eini tejarita nu'Alata'ala lamai siLukas 1.*

## 23. SiYesus Pinoguangaa




SiMaria pepees netatamba'ong concoono sotoo sanu mondolong tinope siYusup. Watu siYusup ne'eepe sima siMaria nolumalo, siia mo'otoi he'ua jio teunganya. Siia jio seilu mogutu siMaria mesili, karna he'ua siaa orancana kana odo-odoy monggaata siMaria. Tapi, jijiompo siia monggauka he'ua, sotoo temalaekat nepopo'itaa te'alaenya eisiaa eilalong nuupiong.




Temalaekat he'ua nonjarita, "SiYusup, inyaa mobule mongala siMaria sima telapimu. Teunga sanu umai eilalong nu'ounaongnya lamai te'Alus nu'Alata'ala. Siia kana moguungaa teunga langkai. Topea'omo Siia siYesus (sanu tebatuanya, 'te'Alata'ala monyalamata'), karna Siia sanu monyalamata tetoo-too lamai tedosa-dosa niira."




Jadi siYusup nolapi siMaria ane nongomungnya netencile sima telapinya, tapi siYusup jio nonggauka tehubungan sima montoilapi concoono siia jaok siia noguungaa.



Eiwatu he'ua, tetana nu'Israel kinuasai nuRoma. Lamai he'ua, watu siMaria kana noguungaa, tepomarenta nuRomawi nonggauka nondavtar jojoo tetoo. Karna he'ua jojoo tetoo uma'o eikota nusiopu-siopu niira selilio antau mondavtar tetope niira. TeBetlehem he'ua tekampung nusiopu niira, siDaud. Karna he'ua siMaria ane siYusup kana monggauka tepelampa maavar lamai tepomoiaong niira eiNasaret jaok teBetlehem.




Watu siira najaok eiBetlehem, jio umai opomoiaong nopo'oturui. Boi umai tekandang sanu pinomoiai nubinaatang. Eiri'ua siYusup ane siMaria nomoia. TeUnga he'ua pinoguungaa'omo eiri'ua ane siinanya nongembea'onya eialong nupenginanong nubinaatang.



Eimondoung he'ua, umai soso'uya topomiara eibuut nugio ei'osuk pomoiaong he'ua pepees nonjaga tedomba-domba niira. Jio inototoi, sotoo temalaekat sanu nepunjaar nepopo'itaa te'alae uma'o eisiira ane siira tutuu nobule. Temalaekat he'ua nonjarita, "Inyaa mobule, karna sia'u umai okareva mombosi eisi'emiu. Tepuan sanu jinanjia, he'ua teMesias, teSiopu ni'ita, pinoguungaa'omo eiBetlehem!"



"Na'omo lolo teUnga he'ua. Si'emu ma'ajaok siia sino'opi tekaing ane inembea eilalong nupenginanong nubinaatang." Jio inototoi, binu'ei temalaekat eilangit sanu nomuji ei'Alata'ala, inularnya, "Nomuji te'Alata'ala eisuruga ane membombosiong eijuniaa eitoo-too sanu seilu-Nya!"



Jio meende lamai he'ua tetopomiara-topomiara najaok eipomoiaong nuUnga he'ua ane siira na'ajaoko eisiia inembea eipenginanong nubinaatang, sima inulara numalaekat he'ua eisiira. Siira tututuu nasanang. SiMaria tututuu nasanang, valii. Tetopomiara-topomiara netencile eibuut nugio eipaio tedomba-domba, nonyukur eiSiopu karna jojoo sanu inepe niira ane inita niira. Watu oalueleoa'onya teunga he'ua sinuna ane tinope siYesus sima pinarenta nu'Alata'ala.




Watu siYesus pinogungaa, tetoo-too sanu mapande mombasa tevituong lamai tepomoiaong sanu naavar eitimur ne'ita sobua tevituong sanu jio biasa eilangit. Siira he'ua nasadar sotoo tepuang nutoo-too nuYahudi sanu pa'ali pinogungaa. Jadi siira nonggauka tepelampa sanu tututuu maavar kana mongita tepuang eini. Lasiantoung lamai he'ua siira najaoko eiBetlehem ane najaoko eipomoiaong eipaio siYesus ane tetosia'angnya nomoia.




Watu tetoo-too sanu mapande he'ua ne'ita siYesus ncoono siinanya, siira nopo tu'u ane nopo suncul ane nonyomba eiSiia. Siira nombee tebulaan ane terampa-rampa sanu masuli eisiYesus. Lamai he'ua siira netencilem.

*Eini tejarita nu'Alata'ala lamai siMatius 2; siLukas 2.*


24. Si Yohanes Nombaptis si Yesus




SiYohanes, teunga niSakharia ane ni'Elisabet, naba'ay ane najari sotoo tenabi. Siia nomoia eitana sanu jio pinomoiai nutoo, nenginang temanisan ane te'alipapaa, ane nepake tepakean sanu pinogutu lamai tevulu nu'unta.



Nabari tetoo uma'o eitana sanu jio pinomoiai nutoo mopo'inepea siYohanes. Siia nokareva tejarita nu'Alata'ala eisiira, inularnya, "Patobamo, tePomarenta nu'Alata'ala kana mo'osuko mompamula!"




Watu tetoo-too no'inepea tetutuunong niYohanes, nabari tetoo natoba lamai tedosa niira ane binaptis niYohanes. Nabari tetopomimpin nu'agama valii majaoak antau nobaptis, tapi siira jio matoba atau mongakui tedosa-dosa niira.



SiYohanes nonjarita eitopomimpin-topomimpin nu'agama he'ua, "Si'emu tesaa sanu mebisa! Patobamo ane balik tegauk-gaukmu. Jojoo tepuu sanu jio nohasila tevua sanu mombosi, kana notovong ane norampaka eilalong nuapi." Monggatustoung luulumai te'Alata'ala nonjarita nepake siNabi Yesaya sima siYohanes sima eini, "Itaimo, Sia'u monuju tevotuangU mongaliurui teMesias. TevotuangU kana monyiapa tejalang nuMesias."




Laso'uyatoo tetoo nuYahudi no'utanya eisiYohanes siia he'ua teMesias atau jio. SiYohanes nonyimbat, "Sia'u jio teMesias, tapi umai sotoo sanu majaoq touk sia'u. Siia mombosi tutuu ane sia'u jio masipato mombu'as tesandal-Nya."



Modondong eleonya, siYesus najaoko kana nobaptiso niYohanes. Watu siYohanes ne'ita-Nya, siia nonjarita, "Itai! Einimo teUnga nuDomba nu'Alata'ala, sanu monggagisa tedosa-dosa nutoo-too eijuniaa."



SiYohanes nonjarita eisiYesus, "Sia'u jio masipato mombaptis Si'oo. Kanaboi Si'oo mombaptis Sia'u," Tapi siYesus nonjarita, "Si'oo kana mombaptis Sia'u, he'ua sanu tutuu kanaboi nogauka." Jadi siYohanes nombaptiso siYesus, maampo Siia jio umai odosa.




Watu siYesus nesuvung lamai teogo notouk binaptis, te'Alus nu'Alata'ala nogurupa sima temanuk temerpati menyau lamai tesuruga ane nesompo eidodompal-Nya. Watu he'ua valii tesuara nu'Alata'ala lamai tesuruga nonjarita, "Si'oo teunga'U sanu U'agalani, ane eiSi'oo Sia'u masanang tutuu."



Te'Alata'ala nongulara'omo eisiYohanes, "Te'Alus nu'Alata'ala kana menyau ane mesompo eisotoo sanu nobaptis ni'oo. Siia he'ua teUnga nu'Alata'ala." Boi sotoo te'Alata'ala. Tapi watu siYohanes nombaptis siYesus, siia ne'eepe tesuara nu'Alata'ala, ne'ita teUnga nu'Alata'ala nesuvung lamai teogo, ane ne'ita te'Alus nu'Alata'ala nenyau lamai tesuruga.

*Eini tejarita nu'Alata'ala lamai siMatius 3; siMarkus 1:9-11; siLukas 3:1-23.*

25. Tepuang Nuseetan  
Nonyo'arai SiYesus



Touk siYesus binaptis, te'Alus nu'Alata'ala selengaan nomimpin Siia nesuvung uma'o eitana sanu jio pinomoiai nutoo, eipaio Siia nepuasa e'endenya apampulueleo apampulumbengi. E'endenya watu he'ua siYesus noso'arai nupuang nuseetan.



Tepuang nuseetan nonyo'arai siYesus ane nonjarita, "Ane Si'oo teUnga nu'Alata'ala, balik tevatu-vatu eini majari teroti antau Si'oo maala menginang!"




SiYesus nonyimbat, "Umai netetulis eilalong nubuku niMusa, 'Temanusia jio boi momarluua teroti antau metuvu, tapi valii momarluua tiap tevirman sanu nojaritaa nu'Alata'ala!'"



Lamai he'ua tepuang nuseetan nongomung siYesus eivumbungan nuVonua nu'Alata'ala ane nonjarita, "Ane Si'oo teUnga nu'Alata'ala, navua te'alae-Mu umanyau, karna umai netetulis, 'Te'Alata'ala kana momarentaa temalaekat-Nya mora'op Si'oo antau tepaa-Mu jio monyundul tevatu."




Tapi siYesus nonyimbat, "Umai valii netetulis eilalong nubuku sanu Mapacing, 'Inyaa monyo'arai teSiopu, te'Alata'alamu."



Lamai he'ua tepuang nuseetan nonujuia eisiYesus jojoo tepomarentaong eijuniaa ane jojoo tekuasa ane te'akakaya ane nonjarita, "Ane Si'oo mopotu'u ane monyomba sia'u, sia'u kana mombeena jojoo eini eisi'oo."




SiYesus nonyimbat, "Na'omo lamai Sia'u, tepuang nuseetan! Umai netetulis eilalong nujarita nu'Alata'ala, ponyomba boi eiSIOPU, te'Alata'alamu ane boi monuruk eiSia."




SiYesus jio monggauka te'eseseilu nupuang nuseetan, karna he'ua tepuang nuseetan nolinjo'imo Siia. Lamai he'ua temalaekat-malaekat najaok ane nolayani siYesus.

*Eini tejarita nu'Alata'ala lamai siMatius 4:1-11; siMarkus 1:12-13; siLukas 4:1-13.*

26. SiYesus Nompamula  
Tepokarajaong-Nya



Touk Siia sino'arai nupuang nuseetan, siYesus netencile uma'o eiGalilea, tetana-Nya. Siia nobu'e concoono te'ababaraka nu'Alus nu'Alata'ala. Siia uma'o eipomoiaong-pomoiaong ane nomaguru. Siia pinuji jojoo tetoo simamo tetoo sanu mombosi.




Lamai he'ua siYesus uma'o eiNasaret eipomoiaong sanu inaba'ayi-Nya. Watu teEleo nuPengondok, Siia uma'o eipong-ganeong nutoo nuYahudi. Siira nombee eiSiia sanu tinulis niNabi Yesaya antau siia mombasamo he'ua. SiYesus nombo'a he'ua ane nombasa sanggaat eitoo-too eiri'ua.



Siiia nombasa, "Te'Alata'ala nombeemo eiSia'u te'Alus-Nya untuk mongulara teKareva sanu Mombosi eitoo-too sanu nopukur, nopa'abebas tetoo-too sanu tinaani, nepe'eondok tetoo-too sanu nobuta, ane nopa'abebas tetoo-too sanu nasesa."




Lamai he'ua siiia nongodung. Jojoo tetoo nongongontong tutuu Siiia. Siira mo'otoi sanu binasa he'ua sima teMesias. Lamai he'ua siiia nonjarita, "Eleo eini, sanu binasa'U pepeeso najari." Jojoo tetoo neherang ane nonjarita, "Eini boi teunga niYusup!"



Lamai he'ua siYesus nonjarita, "Tesapa sanu Uulara eini tutuu. Jio umai anabi sanu inoongkoi eikampung mbotonya. Umai nabari tetimbala ei'Israel eiwatu siNabi Elia. Tapi watu teujang jio nenyau e'endenya toluntoung onombulang, te'Alata'ala jio nonuju si'Elia mondulu sotoo tejanda eitana nu'Israel, tapi tetimbala eitana ntaninya."




SiYesus nonarusa, "Watu siNabi Elisa, umai nabari tetoo sanu nepees tepudung ei'Israel. Tapi si'Elisa jio mepe'eondok maampo sotoo lamai eiilot niira. Boi siNa'aman, tetopomimpin nutantara numusu nu'Israel, sanu pine'eondoknya." Tetoo-too nuYahudi lamai te'Israel sanu ne'eepe siYesus najari tutuu nongoungkul, karna siYesus nonjaritaa sima tenabibabi sanu jio nolayani tetoo-too nuYahudi.




Lamai he'ua tetoo-too nuNasaret nonyuvuna siYesus lamai tepongpaneong he'ua ane nongomung Siia jaok eipipit nupampang ane seilu monavua Siia uma'o tepampang he'ua antau momate Siia. Tapi siYesus boi nelampa nalabat lamai eiilot niira lamai he'ua Siia nesuvungo lamai teKota nuNasaret.



Lamai he'ua siYesus nelampa eiTana nuGalilea, ane mabari tetoo najaok eiSiia. Siira nongomung mabari tetoo sanu nepees ane sanu nolunttoy. Umai tetoo-too sanu nobuta, nobongol, nonggoyot atau jio maala nelampa. SiYesus nepe'eondok siira jojoo.



Mabari tetoo sanu pinentamai nu'alus-alus sanu majaat inomung eisiYesus. Watu siYesus nomarenta, te'alus-alus sanu majaat nesuvung lamai tetoo-too. Mabari ngkaningo te'alus-alus sanu majaat he'ua oroa-roa, "Si'oo eini teUnga nu'Alata'ala!" Mabari tetoo neherang siYesus maala nombugo te'alus-alus sanu majaat ane siira nomuji te'Alata'ala.




Touk he'ua siYesus nomile sompulu rotoo sanu tinope tetopongomung-topongomung tekareva. Siira nelampa concoono siYesus ane neguru lamai siYesus.

*Eini tejarita nu'Alata'ala lamai siMatius 4:12-25, siMarkus 1:14-15,35-39; 3:13-21; siLukas 4:14-30,38-44.*


27. Tetuturong NuToo NuSamaria Sanu Mombosi



Vavalii seeleo, sotoo teguru nuhukum nu'Alata'ala najaok eisiYesus ane seilu monyo'arai Siia, inularnya, "Guru, tesapa sanu kanaboi ugauka antau ma'aala te'otutuvu seende-endenya?" SiYesus nonyimbat, "Tesapa sanu netetulis eilalong nuhukum nu'Alata'ala?"




Inular nuguru nuhukum he'ua, "Agalanimo teSiopu, te'Alata'alamu, concoono jojoo teambok, te'alae, te'uig, ane tepikiranmu. Agalani terurusmu sima te'alaemu mboto." SiYesus nonyimbat, "Si'oo tutuu! Gauka he'ua ane Si'oo kana metuvu seende-endenya."




Tapi teguru nuhukum he'ua seilu mepopo'itaa siia tutuu, jaok siia no'utanya, "Sisee terurusu?"



SiYesus nonyimbat teguru nuhukum he'ua nepake tejarita. "Umai sotoo telangkai nuYahudi sanu nonggauka tepelampanya lamai teKota nuYerusalem uma'o teKota nuYerikho."




"Pepees siia nelampa, lasiatoo tetopongangga nongeva siia. Siira nongala jojoo tesagaranya ane nomboulinya jaok sede'ipo naate. Lamai he'ua siira uma'omo."



"Jio neende touk he'ua, sotoo te'imam nuYahudi jio inototoi nelampa nonunggai tejalang sanu selilio. Watu tetopomimpin nu'agama eini ne'ita tetoo sanu pinonganggai ane binouli he'ua, siia nombalik eisantava nujalang he'ua, nomatuvaya tetoo sanu momarluua tepondulu he'ua, ane tatarus nelampa."




"Jio neende lamai he'ua, sotoo tetoo nuLewi najaok nelampai tejalang he'ua. (Tetoo nuLewi he'ua tesuku nuYahudi sanu nondulu te'imam ei'Vonua nu'Alata'ala.) Tetoo nuLewi he'ua valii nombalik eisantava nujalang he'ua ane nomatuvaya tetoo sanu pinonganggai ane binouli he'ua."




"Tetoo ancuna'onya sanu nelampai tejalang he'ua tetoo nuSamaria, he'ua tetoo nuYahudi sanu inanggap inenciina karna netegalot nolapi concoono tesuku-suku sanu jio nomarcaya ei'Alata'ala. Tapi watu tetoo nuSamaria he'ua ne'ita tetoo he'ua, siia noondong. Karna he'ua siia nojampani tetoo he'ua ane nonglui tepa'it-pa'itnya."



"He'uapa tetoo nuSamaria he'ua nonyavea tetoo he'ua uma'o tekeledainya mboto ane nongomungnya uma'o tepesoong eipao siia nojampangnya."




"Vavalii seeleonya, tetoo nuSamaria he'ua kanaboi monarusa tepelampanya. Siia nombeena tedoi eitoo sanu togupesoong he'ua ane nonjarita, 'Jampani siia. Ane si'oo mongoli nelabi lamai tedoi eini, sia'u kana mombolosnya tetambo watu sia'u metencile."



Lamai he'ua siYesus no'utanya eiguru nuhukum he'ua, "Iama'o monurut si'oo? Sisee lamai tolutoo he'ua sanu sima terurus eitoo pinonganggai ane binouli he'ua?" Teguru nuhukum he'ua nonyimbat, "Tetoo sanu nonuluninya." SiYesus nonjarita eiguru nuhukum he'ua, "Na'omo ane gauka sima he'ua valii."

*Eini tejarita nu'Alata'ala lamai siLukas 10:25-37.*


28. Sotoo Sanu Makaya Najaok EisiYesus




Watu seeleo sotoo najaok eisiYesus. Tetoo he'ua nokuasa, molumbi ane nakaya. Siia no'utanya eisiYesus, "Guru sanu mombosi, monggauka tesapa sia'u antau ma'aala te'otutuvu sanu seende-endenya?" No'utanya siYesus eisilia, "Nete'uya si'oo nongular Sia'u mombosi? Boi umai sotoo sanu mombosi, ane he'ua te'Alata'ala. Tapi ane si'oo seilu ma'aala te'otutuvu sanu seende-endenya, turu'i tehukum-hukum nu'Alata'ala."




Pino'utanyainya, "Tehukum-hukum nusapa sanu kanaboi uturu'i?" SiYesus nonyimbat, "Inyaa momate. Inyaa monyaapi. Inyaa mongangga. Inyaa malampoa. Po'oongko eisiamamu ane siinamu ane galani jojoo temanusia sima si'oo nonggalani te'alaemu mboto."




Tetoo sanu makaya he'ua nonjarita, "Sia'u nonuru'imo jojoo tehukum eini lamai watu sia'u ulengi mede'i jaok e'eini. Tesapa sanu ulengi kanaboi ugauka?" SiYesus nongongontong siia ane nagalang eisia.



SiYesus nonyimbat, "Ane si'oo seilu majari melengaap, na'omo ane pobaluk jojoo sanu umai eisi'oo ane veena tedoinya eitoo-too sanu nopukur, ane si'oo kana oharta eisuruga. Lamai he'ua ponuuto Sia'u."



Watu tetoo sanu makaya he'ua ne'eepe tesapa sanu jinarita niYesus, siia najari tututuu noondong, karna siia tutuu nakaya ane jio seilu nodaag te'akakayanya. Siia negois ane nolinjo'i siYesus.




Lamai he'ua siYesus nonjarita eimurit-murit-Nya, "Tututuu nandasa tetoo sanu nakaya mompamula noparenta nu'Alata'ala! Melabi magampang sambaang te'unta mentama eilulu nujaru he'uapa sotoo sanu nakaya mompamula noparenta nu'Alata'ala."




Watu temurit-murit ne'eepe eini siira netetarigut ane nonjarita,  
"Ane sima he'ua, sisee sanu maala nosalamata?"



SiYesus nongongontong temurit-murit-Nya ane nonjarita,  
"Tetoo-too jio maala monggauka he'ua, tapi te'Alata'ala maala  
monggauka jojoo tegauk."




SiPetrus nonjarita eisiYesus, "Si'ami eini nolinjo'imo jojoo tesagara ane jojoo terurus ane nonuuto Si'oo. Tesapa sanu majari tetambo ni'ami?"



SiYesus nonyimbat, "Tetoo sanu nolinjo'imo tevonua, tesia'a, tetuai, tesiamama, tesiina, teunga, atau teharta karna tetope'U, kana monarima sagatus ngkaning nelabi nabari ejuniaa eini, concoono jinajaati. Tapi ejuniaa sanu kana majaok sia kana novenii tetambo sanu mooge ane te'otutuvu sanu seende-endenya. Tapi nabari tetoo sanu pamulanya kana majari tetoo sanu ponou'ong, ane tetoo sanu ponou'ong kana majari tetoo sanu pamulanya."

*Eini tejarita nu'Alata'ala lamai siMatius 19:16-30; siMarkus 10:17-31;  
siLukas 18:18-30.*


29. Tejarita Sima Tevotuang Sanu Jio Mongampuni




Watu seeleo siPetrus no'utanya eisiYesus, "Siopu, ane terurusu monggauka tedosa eisia'u, jaok siangkaning sia'u kanaboi mongampuni siia? Jaok pitungkaning?" Nongular siYesus, "Jio pitungkaning, tapi jaok pitumpulu pitungkaning!" Concoono eini, siYesus nongular si'ita kanaboi kalepu meampu-ampunong. Lamai he'ua siYesus nonjaritaa tejarita eini.




SiYesus nonjarita, "TePomarenta nu'Alata'ala he'ua sima sotoo tepuang sanu seilu monouka porekenong teinda concoono tevotuangnya. Sotoo tevotuangnya oinda tututuu nabari tetambo nokarajaa sagatus limampuluribuntoung."



"Karna tevotuang jio maala mombayar teindanya, tepuang he'ua nonjarita, 'Pobaluko tetoo eini ane telapi ane teunga-unganya sima tevotuang antau mombayar teindanya.'"




"Tevotuang sanu oinda mabari he'ua uma'o nopo'tu'u eitolo nupuang ane nonjarita, 'Pa'asabar eisia'u, ane sia'u kana mombayar jojoo valii.' Tepuang noondong teambok eivotuang he'ua ane nonggagisa jojoo teindanya ane nomatuvaya siia uma'o."




"Tapi watu tevotuang he'ua uma'o, siia nonja'o'i tevotuang ntaninya sanu oinda eisia tetambo nokarajaa apambulang. Tevotuang he'ua nerojot tevotuang sanu ntaninya ane nonjarita, 'Bayari teindamu eisia'u!'"



"Tetoo he'ua nopo'tu'u ane nonjarita, 'Pa'asabar eisia'u, ane sia'u kana mombayar jojoo valii.' Tapi tevotuang he'ua jio seilu ane nentamaa tetoo he'ua eipanjara jaok siia maala mombayar teindanya."



"Laso'uyatoo tevotuang ntaninya ne'ita tegauk he'ua ane nerasai tutuu noondong. Siira uma'o eipuang ane nonjaritaa jojoo tegauk he'ua."




"Tepuang noleva tevotuang he'ua ane nonjarita, 'Si'oo tevotuang sanu majaat! Sia'u nongampunimo teindamu karna si'oo nomongi tulung eisia'u. Si'oo kanaboi monggauka tegauk sanu selio-lio.' Tepuang tututuu nongoungkul jaok nentamaa tevotuang sanu majaat he'ua eilalong nupanjara jaok siia maala mombayar vavalii jojoo teindanya."




Lamai he'ua siYesus nonjarita, "Ane si'emiu jio mongampuni terurusmu lamai eilalong nuambokmu, teSiama'U sanu eisuruga valii jio mongampuni si'emiu."

*Eini tejarita nu'Alata'ala lamai siMatius 18:21-35.*


30. SiYesus Nombee  
Noma'inang Limaributoo



SiYesus nonuju temurit-murit-Nya mokareva tejarita nu'Alata'ala ane nomaguru tetoo-too eipomoiaong-pomoiaong sanu ntaninya. Watu siira netencile, siira nonjaritaa eisiYesus tesapa sanu ginauka niira. Lamai he'ua siYesus neubu siira uma'omo concoono Siia eipomoiaong sanu moodoy eisantava nubonto antau mengondok sampalai. Karna he'ua siira nesave eipayangan ane uma'o eisantava nubonto.




Tapi nabari tetoo sanu ne'ita siYesus ane temurit-murit-Nya he'ua uma'omo nelengkat uma'o eisantava. Tetoo-too he'ua nelinjok eipipit nubonto antau majao eisantava mongaliurui siira. Watu siYesus ane temurit-murit-Nya najaok, peinconong nutoo mabari umaimo eiri'ua, netaang siira.



Eilalong nupeinconong nutoo he'ua umai 5,000 too langkai, jiompo norekeng tebengkel-bengkel ane teunga-unga. SiYesus noondong tutuu eitoo-too he'ua. SiYesus mo'otoi, tetoo-too eini sima tedomba-domba sanu jio umai otopomiara. Karna he'ua Siia nomaguru siira ane nepe'eondok sanu nepees.




Watu teeleo nompamulamo mondoung, temurit-murit nonjarita eisiYesus, "Teeleo mondoungo ane jio umai okampung sanu mo'osuk eiri'ini. Tujumo tetoo-too he'ua pelampamo antau siira maala melampa melolo sanu no'inang."



Tapi siYesus nonjarita eisiira, "Si'emu kanaboi mombenii siira menginang!" Temurit-murit-Nya nonyimbat, "Iama'o si'ami maala monggauka he'ua? Si'ami boi umai limabua ateroti ane robua tebau."



SiYesus nonuju temurit-murit-Nya mongular eitoo-too he'ua mongodung seselibok eibabok nugugus. Selibok limampulutoo.



Lamai he'ua siYesus nongala limabua teroti ane robua tebau he'ua nopongaring eilangit ane nonyukur.




Lamai he'ua siYesus nompamulamo nononompig teroti ane tebau he'ua. Siia nombeena sosongkolo he'ua eimurit-murit-Nya antau noveena eitoo-too he'ua. Temurit-murit tatarus nonilala sanu no'inang he'ua, ane jiompo valii notou'ong! Jojoo tetoo nenginang jaok novosu.



Touk he'ua temurit-murit nongincona tetoro nuroti ane tebau magana sompulu rokarANJI. Jojoo tetoronya lamai limabua teroti ane robua tebau.

*Eini tejarita nu'Alata'ala lamai siMatius 14:13-21; siMarkus 6:31-44;  
siLukas 9:10-17; siYohanes 6:5-15.*

31. SiYesus Nelampa Eibabok Nuogo



SiYesus nonuju temurit-murit-Nya uma'o mesave eipayangan ane nolayag uma'o eisantava nubonto pepees Siia nonuju tetoo bari he'ua uma'omo. Touk siYesus nonuju tetoo bari he'ua, Siia nolala'e uma'o eibuut antau Siia nonggane. SiYesus ampi he'ua boi simotoonya, ane Siia nonggane neende tutuu jaok nondoung.




Watuh he'ua, temurit-murit-Nya pepees nongkaug tepayangan niira. Maampo siira nongkaugo meende, siira boi eitatanga nubonto. Siira nandasa tutuu nongkaug karna tebarat makancang mongeva siira.



Watu siYesus notouk nonggane, Siia uma'o eimurit-murit-Nya. Siia nelampa eibabok nuogo nonunggai uma'o tepayangan niira!



Temurit-murit nobubuleong watu siira ne'ita siYesus, karna pinikir niira ne'ita te'alus sanu majaat. SiYesus mo'otoi siira nobubuleong, jadi Siia nonjarita, "Inyaa mobule. Eini Sia'u!"



Lamai he'ua siPetrus nonjarita eisiYesus, "Guru, ane Si'oo eini, tujumo sia'u majaoe eiSi'oo melampa eibabok nuogo." Lamai he'ua siYesus nonuju siPetrus, "Pajaoko menekai."



Lamai he'ua siPetrus nenyau lamai tepayangan ane nompa-mulamo nelampa eibabok nuogo uma'o eisiYesus. Tapi jiompo bega naavar siia nelampa, siia nombalika teponylignya lamai siYesus ane nompamulamo ne'ita tebalayang ane nerasai tebarat nakancang.




Lamai he'ua siPetrus najari nobule ane nompamulamo nolodong. Siia neroroa, "Guru, salamata sia'u!" SiYesus menyaua telima-Nya ane nondiit telima niPetrus. Lamai he'ua Siia nonjarita eisiPetrus, "Hee si'oo sanu mokurang nomarcaya, nete'uya si'oo nabatabata?"



Watu siPetrus ane siYesus nesave eipayangan, tebarat selengaan nengondok. Temurit-murit he'ua tutuu neherang. Siira nonyomba siYesus ane nonjarita eiSiia, "Tututuu, Si'oo teUnga nu'Alata'ala."

*Eini tejarita nu'Alata'ala lamai siMatius 14:22-33; siMarkus 6:45-52;  
siYohanes 6:16-21.*


32. SiYesus Nepe'eondok Tetoo  
Sanu Pinentamai Nu'alus Sanu  
Majaat Ane Tebengkel Sanu Nepees



Watu seeleo, siYesus ane temurit-murit-Nya nesave tepayangan uma'o eisantava nubonto eitana nupomoiaong nutoo-too nuGerasa.




Watu siira najaok eisantava nubonto, sotoo telangkai, sanu pinentamai nu'alus sanu majaat, nelnjok najaok eitolo niYesus.




Tetoo he'ua mo'uing tutuu. Jio maala sanu montaang siiia. Maampo tetoo-too nombe'es nurante telima ane tepaanya, siiia boi nongkologa'onya.



Tetoo he'ua nomoia eigoa-goa pekuburong. Eleo ndoung tetoo eini oroa-roa. Siia jio nepake tebaju ane nengkaning-kaning nonyenyeit te'alaenya mboto nepake tevatu.



Watu tetoo he'ua najaok, siia nopo tu'u eitolo niYesus. SiYesus nonjarita ei'alus sanu majaat he'ua, "Pesuvung lamai tetoo eini!"




Tetoo sanu pinentamai nu'alus majaat he'ua neroroa noporos ane nonjarita, "Tesapa sanu no'eseilua ni'oo eisia'u, siYesus, teUnga nu'Alata'ala sanu mabaraka? Tuluni inyaa nosesai sia'u!" Lamai he'ua siYesus no'utanya ei'alus sanu nentamai tetoo he'ua, "Sisee tetopemu?" Siia nonyimbat, "Tetope'u siLegion, karna si'ami nabari." (Telegion he'ua tepeinconong nutantara sanu terekenongnya 3.000 jaok 6.000 too tetantara.)



Te'alus-alus sanu majaat he'ua nomongi eisiYesus, "Inyaa mombugo si'ami uma'o eipampang sanu ma'aate!" Umai souluong tevavi pepees nenginang eiselibok tebuntuan ei'osuk pomoiaong he'ua. Karna he'ua, te'alus-alus sanu majaat he'ua nomongi eisiYesus, "Tuluni tujumo valii si'ami mentama eilalong nuvavivavi he'ual!" SiYesus nonjarita, "Na'omo!"




Te'alus-alus sanu majaat he'ua nesuvung lamai tetoo he'ua ane nentama eilalong nuvavi-vavi he'ua. Tevavi-vavi he'ua nelinjok nenyau eipipit nupampang ane nanavu eilalong nubonto ane nolodong. Eilalong souluong he'ua umai kira-kira roribu mbaang.




Watu tetopomiara-topomiara tevavi-vavi he'ua ne'ita tegauk he'ua, siira nelnjok ane nongulara jojoo tetoo sanu jinaok niira tesapa sanu ginauka'omo niYesus. Tetoo-too najaok lamai tekota ane ne'ita tetoo sanu luulu pinentamai nu'alus-alus sanu majaat he'ua. Siia pepees nongodung, nepakemo tebaju, ane sima tetoo nonotomo.




Tetoo-too he'ua tututuu nobule ane nomongi siYesus metencile. Karna he'ua siYesus nesave eilalong nupayangan ane nesiap metencile. Telangkai sanu pine'eondoko nomongi uma'o concoono siYesus.



Tapi siYesus nonjarita eisiia, "Jio. Petencilemo eivonuamu ane ulara eitagutagumu ane teruru-rurusmu tesapa sanu ginauka'omo nuSiopu eisi'oo ane iama'o Siia nonggauka'omo sanu mombosi eisi'oo."




Lamai he'ua tetoo he'ua uma'o ane nongulara eijojoo tetoo sima tesapa sanu ginauka'omo niYesus eimbotonya. Jojoo tetoo sanu ne'eepe tejaritanya neherang ane netetarigut.



SiYesus netencile vavalii eisantava nubonto. Notouk Siia najaok eiri'ua, nabari tetoo neincong eipapalit-Nya ane nongipiti te'alae-Nya. Eilalong nupeinconong he'ua umai sotoo tebengkel sanu nasesa inanggasi nuraa e'endena sompulu rontoung. Siia nonouka jojoo tedoinya nombayar tedokter sanu nonyo'ar mepe'eondoknya, tapi te'alaenya boi noniang nepees.



Siia ne'eepemo sima siYesus nepe'eondoko nabari tetoo nepees ane nomikir, "Ane sia'u boi monggama tepakean niYesus, he'uapa sia'u valii kana meondok!" Siia uma'o eite'e niYesus ane nonggama tepakean-Nya. Watu siia nonggama tepakean niYesus, teraanya selengan nengondok!




SiYesus selengaan nasadar umai te'ug sanu nesuvung lamai te'alae-Nya. Jadi Siia negois ane no'utanya, "Sisee sanu nonggama Sia'u?" Nonyimbat temurit-murit-Nya, "Siopu, nabari tetoo sanu neincong eisevi-Mu ane nongipiti-Mu. Nete'uya Si'oo no'utanya, 'Sisee sanu nonggama Sia'u?'"



Tebengkel he'ua nopotu'u eitolo niYesus, gugugur ane tutuu nobule. Lamai he'ua sia nongulara tesapa sanu ginauka'onya ane siaa neondok. SiYesus nonjarita eisiaa, "Te'aparcayaongmu nepe'eondoko si'oo. Na'omo eilalong nu'ombombosiong."

*Eini tejarita nu'Alata'ala lamai siMatius 8:28-34; siMarkus 5:1-20; 25-34;  
siLukas 8:26-39,42b-48.*

33. Tejarita Sima Apabagiong Tetana



Vavalii seeleo, siYesus pepees nomaguru eipeinconong nutoo bari eipipit nubonto. Mabari tetoo najaok ne'eepe Siia jaok siYesus nesave eipayangan eipipit nubonto antau umai tepongodunong Siia maala monjarita eisiira. Siia nongodung eipayangan he'ua ane nomaguru tetoo-too he'ua.



SiYesus nonjaritaa tejarita eini. "Sotoo tetopejo'ong uma'o mombula tevu'u. Watu siia nongambura tevu'u, sanggaat tevu'u he'ua nanavu ejalang. Lamai he'ua najaok temamanuk ane nenginang jojoo tevu'u sanu nanavu ejalang he'ua."



"Sanggaat tevu'u sanu ntaninya nanavu eitana sanu ovatu, eipao jio mabari tetana. Tevu'u eitana ovatu he'ua molongkang netuvu, tapi terarinya jio bega malalok. Watu teeleo membu'a ane majari moondak, tepomulaong he'ua najari malante ane naate."




"Tevu'u ntaninya valii nanavu eitatanga nuvumbu sanu orui. Tevu'u he'ua nompamula netuvu, tapi tevu'u he'ua inipiti nuvumbu nurui. Karna he'ua tetutudaong sanu netuvu lamai tevu'u eivumbu nurui jio nohasila tevua."



"Sanggaat tevu'u sanu ntaninya nanavu eitana sanu mombosi. Tevu'u eini netuvu ane nohasila 30, 60, atau 100 ngkaning te'ababarinya lamai sanu pinombula. Sisee-see otelinga, patuvaya siia ne'eepel!"




Tejarita eini ne'eingu jojoo temurit. Karna he'ua siYesus nopa'apatas, "Tevu'u he'ua sima tejarita nu'Alata'ala. Tejalang he'ua sima tetoo sanu ne'eepe tejarita nuSiopu, tapi jio mo'otoi tebatuanya, ane tepuang nuseetan nongala tejarita he'ua lamai siira."



"Tetana ovatu he'ua sima tetoo sanu ne'eepe tejarita nuSiopu ane madandalan nonarimanya. Tapi watu mosusa atau jinajaati karna nomarcaya tejarita he'ua, siia jiongo nomarcaya."



"Tevumbu nurui sima tetoo sanu ne'eepe tejarita nuSiopu ane nomarcaya. Tapi lamai he'ua, te'agagalang niira ei'Alata'ala neteompot nugoyong, te'akakaya, ane te'asasanang nu'otutuvu. Tehasilnya, tepangajar sanu inepe niira jio nevua."



"Tapi tetana sanu mombosi he'ua sima tetoo sanu ne'eepe tejarita nuSiopu, nomarcaya, ane nohasila tevua sanu mabari."

*Eini tejarita nu'Alata'ala lamai siMatius 13:1-8,18-23; siMarkus 4:1-8 13-20; siLukas 8:4-15.*

## 34. SiYesus Nomagurua Tejarita-jarita Ntaninya



SiYesus nonjaritaa mabari tejarita ntaninya sima tePomarenta nu'Alata'ala. Siia nongular sima eini, "TePomarenta nu'Alata'ala sima tevu'u nubololaia sanu tinuda nutoo eijo'onnya. Si'emu mo'otoi tevu'u he'ua tevu'u tonede'i lamai jojoo nungangayaong nuvu'u."



"Tapi watu tevu'u he'ua netuvumo, tevu'u he'ua najari tonooge lamai jojoo tetutudaong eijo'ong, tututuu mooge jaok temamanuk najaok ane nesompo eipanga-panganya."




SiYesus nonjaritaa tejarita sanu ntaninya, "TePomarenta nu'Alata'ala he'ua sima teragi sanu pinopogalot nubengkel eilalong nu'adonan nuroti jaok nepudadag uma'o jojoo te'adonan he'ua."



"TePomarenta nu'Alata'ala valii sima teharta sanu netesoyok eijo'ong. Sotoo sanu ntaninya na'ajaok teharta he'ua ane lamai he'ua nontanongnyaonye. Siia masanang tutuu jaok siia uma'o nobaluk jojoo tehartanya lamai he'ua nongoli tejo'ong he'ua."



"TePomarenta nu'Alata'ala valii sima temutiara sanu mombosi tutuu ane mosuli teolinya. Watu tetopobaluk temutiara jinaoknya, sia nobaluk jojoo tehartanya antau nongoli temutiara he'ua."



Touk he'ua siYesus nonjaritaa eilasiatoo sanu moncalai tetoo ntaninya ane nomarcaya tegauk sanu mombosi sanu nogauka niira mboto maala monyalamata siira. "Umai rotoo uma'o monggane eiVonua nu'Alata'ala. Sotoo he'ua tetopongincong teasel sanu mokorupsi, ane sanu sotoo tetopomimpin nu'agama."




"Tetopomimpin nu'agama he'ua nonggane sima eini, 'Nonyukur boSiopu sia'u jio tetoo sanu nonggauka tedosa sima tetoo-too ntaninya - sima tetopongangga, telangkai sanu jio ma'adil, tetoponyaapi atau sima tetopongincong teasel sanu mokorupsi he'ua."



" 'Sia'u nepuasa rongkaning sodumminggu ane sia'u nombeena eisi'oo sompulu perseen lamai jojoo tedoi ane tesasagara sanu tinarima'u.' "




"Tapi tetopongincong teasel he'ua ne'oro maavar lamai tetopomimpin nu'agama he'ua, ane jio nabarani nonyiliga uma'o tesuruga. Siia boi nonimbolu tedodobnya ane nonggane, 'BoSiopu, agalani sia'u tetoo odosa eini.'"



Lamai he'ua siYesus nonjarita, "Sia'u nonjarita sanu tutuu eisi'emu, te'Alata'ala no'inepea tegane nutopongincong teasel he'ua ane nongampuni siia. Tapi Siia jio nonarima tegane nutopomimpin nu'agama he'ua. TeSiopu kana mopo'ororot tetoo sanu maangka, ane Siia kana nopa'apangkat tetoo sanu mopo'ororot te'alaenya."

*Eini tejarita nu'Alata'ala lamai siMatius 13:31–33,44–46; siMarkus 4:30–32; siLukas 13:18–21; 18:9–14.*

35. Tepogurapanong Sima Tesiama Sanu Mombosi




Vavalii seeleo, siYesus nomaguru mabari tetopongincung teasel ane tetoo odosa sanu neincong antau me'eepe Siia.



Tetopomimpin-topomimpin nu'agama sanu umai eiri'ua nonjaati, "SiYesus nonagui tetoo-too sanu odosa." Karna he'ua siYesus nonjaritaa tejarita eini.




"Umai telangkai sanu ounya rotoo telangkai. Teunga sanu tuai nonjaritaa eisiamanya, 'Siama'u, sia'u momongi tewarisanu e'eini!' Jadi siamanya he'ua nonilala tehartanya eirottoo teunganya."



"Lamai he'ua teunga sanu tuai nongincona jojoo tehartanya ane nelampa uma'o naavar nonouka tedoinya nonggauka tedosa."



"Touk he'ua najari teorok tututuu eitana he'ua, ane siia jiongo odoi untuk mongoli sanu no'inang. Karna he'ua siia melolo tepokarajaaong, boi na'ala tepokarajaaong moma'inang tevavi. Siia tututuu nandasa ane noorok jaok siia seilu menginang sanu no'inang nuvavi he'ua."




"Ponou'ongnya, siia nonjarita ei'alaenya mboto, 'Tesapa sanu ugauka eini? Jojoo tevotuang nusiam'a'u umai sanu no'inang mabari, tapi eiri'ini sia'u no'oro'ong. Sia'u kana metencile uma'o eisiam'a'u ane momongi eisilia majari sotoo tevotuangnya.'"




"Karna he'ua teunga sanu tuai he'ua nelampa metencile eivonua niamanya. Watu siia ulengi maavar, siamanya ne'ita siia ane noondong eisii. Siia nelinjok nolaboti teunga he'ua ginonggolinya ane mbinonggiinya."




"Teunga he'ua nonjarita, 'Siama'u, sia'u odosamo ei'Alata'ala ane eisi'oo. Sia'u jiongo masipato majari teunga ni'oo."




"Tapi siamanya nonjarita eisotoo tevotuangnya, 'Uma'o polongkang! Omung tepakean sanu mombosi ane pakea eisia! Ulea tesincing eilimanya ane pakea tesandal eipaanya. Lamai he'ua sambale teunga nubengga sanu mombosi antau si'ita maala mopesta, karna teunga'u naatemo, ane e'eini siia netuvuonye! Siia ne'ilango, tapi e'eini siia jinaoko!"'




"Karna he'ua tetoo-too nompamula nopesta. Jio neende lamai he'ua, teunga sanu sia'a netencilemo lamai tepokarajaongnya. Siia ne'eepe temusik ane tetoo-too nonari ane no'utanya tesapa sanu najari."



"Watu siia mo'otoi siira nopesita karna tetuainya netencilemo, siia nongoungkul tututuu jio seilunya mentama eilalong nuvonua. Lamai he'ua siamanya nesuvung ane nomongi eisiiia antau mentama mopesta concoono, tapi jio seilunya."




"Teunga sia'a nonjarita eisiamanya, 'E'endenya eini sia'u nokarajaa tutuu eisiam'a'u ane nonuruk jojoo teparenta ni'oo, tapi siama'u jio nombee eisia'u maampo sambaang tebembe sanu mede'i antau sia'u mopesta concoono tetagu-tagu'u. Tapi watu teunga sanu nomake tedoi eigauk-gauk sanu jio mombosi eini netencile, siama'u nonyambale tebengga sanu mombosi untuk siia!"




"Siamanya nonyimbat, 'Teunga'u, si'oo kalepu concoono sia'u, jojoo teharta'u he'ua tehartamu. Tapi mombosi si'ita moramea, karna tetuai ni'oo naatemo, tapi e'eini netuvuonye. Siia ne'ilang, tapi e'eini najaoko!"

*Eini tejarita nu'Alata'ala lamai siLukas 15:11-32.*


36. Te'alae NiYesus  
Vinenii Terava Nusuruga



Vavalii seeleo, siYesus neubu tolutoo temurit-Nya, siPetrus, siYakobus, ane siYohanes concoono Siia. (Temurit sanu tinope siYohanes eini jio tetoo sanu nombaptis siYesus.) Siira nolala'e eibuut sanu mapangkat antau monggane.



Watu siYesus pepees nonggane, telio niYesus najari narava sima teeleo ane tepakean-Nya najari momeas sima terarat, nelabi nemeas sanu pinogutu nutoo eijuniaa.




Lamai he'ua siNabi Musa ane siNabi Elia nempuut. Tetoo-too eini netuvu monggatustoung jijimpo tegauk eini majari. Siira nejajaritaong concoono siYesus sima te'amateong-Nya sanu kana majari eiYerusalem.




Watu siMusa ane siElia pepees nejajaritaong concoono siYesus, siPetrus nonjarita eisiYesus, "Mombosi tutuu si'ami umai eiri'ini. Patuvaya si'ami mongoroa tolusinarung, sesinarung eiSi'oo, sesinarung eisiMusa ane sesinarung eisiElia." SiPetrus jio mo'otoi tesapa sanu jinaritaa'onya.



Watu siPetrus nonjarita, teru'ong sanu marava nenyau ane nonaub siira ane tesuara lamai teru'ong he'ua nonjarita, "Einimo teUnga'U sanu U'agalani. Siiia mopa'asanang teambokU. Po'inepea Siiia." Tolutoo temurit he'ua nobubuleong ane nopolosuncul eitana.




Lamai he'ua siYesus nondiit siira ane nonjarita, "Inyaa mobule. Pembaungo." Watu siira nonyilig papalit jiongo otoo eiri'ua boi siYesus.




SiYesus ane tolutoo temurit-Nya nenyau lamai tebuut. Lamai he'ua siYesus nonjarita eisiira, "Inyaa noulara eisisee-see tesapa sanu najari eiri'ini. Sia'u sede'i ma'o kana maate ane kana metuvuonye. Notouk he'ua, si'emu maala monjaritaa eitoo-too."

*Eini tejarita nu'Alata'ala lamai siMatius 17:1-9; siMarkus 9:2-8; siLukas 9:28-36.*

37. SiYesus Netuvua  
SiLasarus Lamai Te'amateong



Vavalii seeleo, siYesus nonarima tekareva sima siLasarus nepees movoat. SiLasarus ane rotoo terurusnya bengkel, siMaria ane siMarta, tetagu mombosi niYesus. Watu siYesus ne'eepe tekareva eini, Siia nonjarita, "Tepees eini jio kana monouk nu'amateong, tapi kana mogutu tetoo-too momuji te'Alata'ala ane teUnga-Nya." SiYesus nongagalani tetagu-tagunya he'ua, tapi Siia netaang nomoia eiri'ua e'endenya roeleo.




Notouk roeleo, siYesus nonjarita eimurit-murit-Nya, "Maemo si'ita metencile uma'o teYudea." Temurit-murit nonyimbabat, "Tapi Guru, jiompo meende eini tetoo-too eiri'ua seilu momate si'oo!" SiYesus nonjarita, "Tetagu ni'ita siLasarus, no'oturumo, ane Sia'u kanaboi mombauna'onya."




Temurit-murit-Nya nonyimbat, "BoSiopu, ane siLasarus pepees no'oturu, siia meondok." Touk he'ua siYesus nonjarita tututuu, "SiLasarus naatemo. Sia'u masanang Sia'u jio ampi he'ua watu siia naate, antau si'emu momarcaya eiSia'u."




Watu siYesus najaok eikampung niLasarus, siLasarus naatemo e'endenya apaeleomo. SiMarta uma'o nonjao'i siYesus ane nonjarita, "Guru, ane Si'oo umai eiri'ini, tetuai'u jio naate. Tapi sia'u nomarcaya te'Alata'ala mombenii tesapa sanu nopomongi Ni'oo lamai Siia."




SiYesus nonyimbat, "Sia'u sanu mombauna tetoo sanu naate ane sanu mombee te'otutuvu. Sissee-see sanu nomarcaya eiSia'u metuvu, maampo siia maate. Sissee-see sanu momarcaya eiSia'u jio maate. Si'oo nomarcaya eini?" SiMarta nonyimbat "Oie, Guru! Sia'u nomarcaya Si'oo teMesias, TeUnga nu'Alata'ala."




Lamai he'ua siMaria najaok. Siia nopotu'u mo'osuk tepaa niYesus ane nonjarita, "Guru, ane Si'oo eiri'ini, tetuai'u jio naate." SiYesus no'utanya eisiira, "Eipaio si'emiu nongembea siLasarus?" Siira nonyimbat eiSiiia, "Eikubur. Na'omo ane itai." Lamai he'ua siYesus notumangis.



Tekubur he'ua eilalong sobua telulu nuvatu sima tegoa. Umai tevatu sanu mooge sanu dinulina mongompoti tebamba nupentamaong nugoa he'ua. Watu siYesus najaok eikubur, Siia nongular eisiira, "Dulina tevatu he'ua." Tapi siMarta nongular, "Siia naatemo e'endenya apaeleomo. Siia nemboomo."




SiYesus nonyimbat, "Ane si'emu nomarcaya si'emu kana me'ita te'ababaraka nu'Alata'ala." Karna he'ua siira nondulina tevatu he'ua.



Touk he'ua siYesus nopongaring uma'o tesuruga ane nonjarita, "BoSiama Si'oo mombosi no'inepea'omo Sia'u. Sia'u mo'otoi Si'oo kalepu no'inepea Sia'u, tapi Sia'u nongulara eini karna jojoo tetoo sanu ne'oro eiri'ini, antau siira nomarcaya Si'oo nonuju Sia'u." Touk he'ua siYesus neroroa, "Lasarus, pesuvungo!"




Lamai he'ua siLasarus nesuvung! Siia ulengi nete'alu eilalong nugandis sanu memeas. SiYesus nonuju tetoo-too sanu eiri'ua, "Dului siia molapasa te'alaenya lamai tegandis he'ua ane mope'ebebas siia!" Nabari tetoo nuYahudi nomarcaya eisiYesus karna tegauk sanu mabaraka eini.




Tapi tetopomimpin nu'agama nu'Yahudi me'irihati, siira neincong norancanaa iama'o siira maala momate siYesus ane siLasarus.

*Eini tejarita nu'Alata'ala lamai siYohanes 11:1-46.*


38. SiYesus Ira'op



Sontoung sangkaning, tetoo-too nuYahudi noramea teEleo nuPaska. Eini nolambot iama'o te'Alata'ala nonyalamata'omo tesiopu-siopu niira lamai pevotuanong eiMesir monggatustoung sanu luulu. Kira-kira toluntoung nalabato watu siYesus nompamula nonjarita tejarita nu'Alata'ala eitoo-too ntaninya. SiYesus nongulara eimurit-murit sima Siia seilu moramea tePaska ncoono siira eiYerusalem, ane sima Siia kana nopatei eiri'ua.




Sotoo temurit niYesus tetopenya siYudas. Siia nonanggung jojoo tedoi numurit-murit, tapi siia seilu tedoi ane sasangkaning mongangga tedoi he'ua. Notouk siYesus ane temurit-murit-Nya najaok eiYerusalem, siYudas uma'o eitopomimpin-topomimpin nuYahudi ane nonavari mondulu siira mera'op siYesus eisira. Siia mo'otoi tetopomimpin-topomimpin nuYahudi he'ua jio nongakui siYesus he'ua teMesias ane orancana momate-Nya.




Tetopomimpin-topomimpin nuYahudi, pinimpin te'Imam sanu Mooge, nombayar siYudas tolumpulumbo'a teperak antau mondulu siira mera'op siYesus. Tesaba eini najari sima sanu iramat niNabi Sakharia monggatustoung luulu. SiYudas nosituruk, nongala tedoi he'ua, lamai he'ua uma'o. Siia nompamula nelolo tewatu mondulu siira mera'op siYesus.




EiYerusalem, siYesus noramea teEleo nuPaska concoono temurit-murit-Nya. Watu siira nenginang, siYesus nongala teroti ane nonompig-nompignya. Siia nonjarita, "Alamo ane inango eini. Eini te'alae'U, sanu noveena eisi'emiu. Gauka eini antau molambot Sia'u." Nonjarita sima he'ua, siYesus nongulara te'alae-Nya kana noveena sima tepombree tepombolos siira antau siira jio maate seende-endenya.




Lamai he'ua siYesus nongala tepenginunong ane nonjarita, "Inungo eini. Eini teraa'U lamai Pejanjiong sanu Vuou sanu nojuana antau tedosa ni'emiu no'ampuni. Gauka eini molambot Sia'u tiap ngkaning si'emiu menginung."



Lamai he'ua siYesus nonjarita eimurit-murit-Nya, "Sotoo lamai si'emiu kana mobaluk Sia'u." Temurit-murit netetarigut, ane no'utanya sisee sanu nonggauka tegauk sima he'ua. SiYesus nonjarita, "Sotoo sanu Uvenii songkolo teroti eini, siia monjaati Sia'u." Lamai he'ua Siia nombeemo teroti eisiYudas.



Touk siYudas nongala teroti he'ua, tepuang nuseetan nentama ei'alaenya. SiYudas uma'o mondulu tetopomimpin-topomimpin nuYahudi mera'op siYesus. Watu he'ua teeleo nondoungu.




Touk nenginang, siYesus ane temurit-murit-Nya nelampa uma'o teBuut nuSaitun. SiYesus nongular, "Si'emu jojoo kana molinjo'i Sia'u ndoung eini. Umai netetulis eilalong tebuku nu'Alata'ala, 'Sia'u kana momate tetopomiara tedomba he'ua ane tedomba-domba he'ua kana melinjok nepudadag."




SiPetrus nonyimbat, "Maampo sanu ntaninya molinjo'i Si'oo, sia'u jio!" Lamai he'ua siYesus nonjarita eisiPetrus, "Tepuang nuseetan seilu mopo'orua te'aparcayaong ni'oo, tapi Sia'u nongganea si'oo, Petrus, antau te'aparcayaongmu jio ne'ilang. Maampo sima he'ua, ndoung eini, jiompo temanuk netunturu'u, si'oo jio mongakui tolungkaning sima si'oo mo'otoi Sia'u."




SiPetrus nonjarita eisiYesus, "Maampo sia'u maate, sia'u kana mongakui Si'oo!" Jojoo temurit ntaninya nongular sanu selio-lio.




Lamai he'ua siYesus uma'o concoono temurit-murit-Nya eijo'ong sanu tinope teGetsemani. SiYesus nonuju temurit-murit-Nya monggane antau siira jio manavu eilalong ponyo'araong. Lamai he'ua siYesus uma'o monggane simotoonya.



SiYesus nonggane tolungkaning, "BoSiama'U, ane maala, Sia'u nomongi inyaa nopatuvaya Sia'u menginung tepenginunong nu'asesesa eini. Tapi ane jio umai ojalang ntaninya antau tedosadosa numanusia no'ampuni, patuvaya te'eseseilu-Mu majari." SiYesus tututuu nabalesa ane tesoyo'ot-Nya sima teraa neteek. Te'Alata'ala nonuju sotoo temalaekat mopo'uig Siia.



Tiapngkaning touk nonggane, siYesus netencile eimurit-murit-Nya, tapi siira no'oturu. Watu siYesus netencile tolungkanina'onya, Siia nonjarita, "Pembuang! Tetoo sanu mobaluk Sia'u najaoko."




SiYudas najaok concoono tetopomimpin-topomimpin nuYahudi, tetantara, ane peinconong nutoo. Siira nongomung te'ibut ane tepomondang. SiYudas najaok eisiYesus ane nonjarita, "Salam, Guru," ane nembongi-Nya. Eini tetanda antau tetopomimpin-topomimpin nuYahudi nootoi sisee sanu kanaboi nora'op. Lamai he'ua siYesus nonjarita, "Yudas, si'oo monjaati Sia'u te'akalnya nembongi."



Watu tetantara-tantara nera'op siYesus, siPetrus nonyuvuna te'iabutnya ane nonibas tetelinga nuvotuang nu'Imam sanu Mooge. SiYesus nonjarita, "Ta'upa te'iabut he'ua! Sia'u maala momongi eiSiama'U monuju moribu tetantara temalaekat monyabataa Sia'u. Tapi Sia'u kanaboi monuru'i teSiama'U." Lamai he'ua siYesus nepe'eondok tetelinga nutoo he'ua. Touk siYesus ira'op, jojoo temurit nelnjoko.

*Eini tejarita nu'Alata'ala lamai siMatius 26:14-56; siMarkus 14:10-50; siLukas 22:1-53; siYohanes 18:1-11.*


## 39. SiYesus Inadili




Watu he'ua tanga ndoung. Tetantara-tantara nongomung siYesus eivonua nu'Imam sanu Mooge antau nopo'utanyai nu'Imam sanu Mooge. SiPetrus nonuut pupuri. Watu siYesus inomung eilalong nuvonua, siPetrus boi eiaangnya ane nongomuta te'alaenya ei'osuk nuapi.




Eilalong nuvonua he'ua, tetopomimpin-topomimpin nuYahudi nongadili siYesus. Siira nongomung nabari tesabi sanu nalampoa sima Siia. Tapi, tepesabiong niira jio selio-lio sotoo ane ntaninya, jaok tetopomimpin-topomimpin nuYahudi jio maala mongular Siia osala. SiYesus jio mongular tesapa-sapa.



Ponou'ongnya, te'Imam sanu Mooge nomatas telio niYesus ane nonjarita, "Ulara'omo eisi'ami, Si'oo teMesias, teUnga nuAlata'ala sanu netuvu?"



SiYesus nonjarita, "Sia'umo, ane si'oo kana me'ita Sia'u mongodung concoono te'Alata'ala ane majaok lamai tesuruga." Te'Imam sanu Mooge najari nongoungkul ane nonjeaka tepakeannya ane neroroa eitopomimpin-topomimpin ntaninya, "Si'ita jio parluu tesabi ntaninya. Si'emiu mboto no'inepemo Siia nongulara Siia teUnga nu'Alata'ala. Iama'o monurut si'emiu?"



Jojoo tetopomimpin nuYahudi he'ua nonyimbat te'Imam sanu Mooge, "Siia masipato maate!" Lamai he'ua siira nongompoti temata-Nya, nenyuui-Nya, nombobogi-Nya, ane noncalai-Nya.




Pepees siPetrus netaang eiaang nuvonua, sotoo tebengkel tevotuang ne'ita siPetrus ane nonjarita eisiaa, "Si'oo valii ncoono siYesus!" SiPetrus jio nongakuinya. Lamai he'ua, tebengkel ntaninya nongulara sanu selio-lio, ane siPetrus jio nongakui valii. Teponou'ongnya, tetoo-too nonjarita, "Si'ami mo'otoi si'oo ncoono siYesus karna si'emiu rotoo lamai teGalilea."




SiPetrus nesumpa, inularnya, "Ane sia'u mo'otoi tetoo he'ua, patuvaya te'Alata'ala mongutuk sia'u!" Selengaan, temanuk langkai netunturu'u, ane siYesus negois ane nongongontong siPetrus.




SiPetrus uma'o eiaangnya ane notumangis karna noondong. Pepees he'ua, siYudas, tetoo sanu nobaluk siYesus, ne'ita tetopomimpin-topomimpin nuYahudi nehukum siYesus antau nopatei. SiYudas najari tututuu nonosol ane uma'o nomate numboto.




Modondong titieleo, tetopomimpin-topomimpin nuYahudi nongomung siYesus uma'o eiGubernur nuRomawi, siPilatus. Siira noharap siPilatus mongular siYesus osala ane momarentaa Siia nohukum maate. SiPilatus no'utanya eisiYesus, "Si'oo tepuang nutoo-too nuYahudi?"



SiYesus nonyimbat, "Si'oo sanu nongulara'omo sima he'ua, tapi tepomarenta'U jio tepomarenta eijuniaa. Ane tepomarenta'U lamai tejuniaa eini, temurit-muritU kana megiging molapasa Sia'u. Tapi Sia'u najaok eijuniaa nonjaritaa sanu tutuu sima te'Alata'ala. Jojo tetoo sanu seilu sanu tutuu no'inepea Sia'u." SiPilatus nonjarita, "Tesapa sanu tutuu he'ua?"



Notuk nonjarita ncoono siYesus, siPilatus uma'o eipeinconong nutoo he'ua ane nonjarita, "Sia'u jio ne'ita te'asasala nutoo eini." Tapi tetopomimpin-topomimpin nuYahudi ane tepeinconong nutoo he'ua neroroa, "Salipa Siial!" Nonyimbat siPilatus, "Siia jio osala." Tapi siira neroroa tututuu nelabi noporos. Lamai he'ua siPilatus nonjarita otolungkanina'onya, "Siia jio osala!"



Tapi siPilatus nobule tetoo-too he'ua kana mompamula megiging, karna he'ua siia nonuju tetantara monyalipa siYesus. Tetantara nuRomawi nonyambook siYesus, nepakea tejuba nupomarenta ane temakota sanu pinogutu lamai terui. Siira nolalui Siia. Inular niira, "Itai, tepuang nutoo-too nuYahudi!"

*Eini tejarita nu'Alata'ala lamai siMatius 26:57–27:26; siMarkus 14:53–15:15;  
siLukas 22:54–23:25; siYohanes 18:12–19:16.*

40. SiYesus Sinalipa




Touk tetantara he'ua noncala siYesus, siira nongomung Siia uma'o nosalipa. Siira nonuju Siia nonyumbi tesalip-Nya mboto.




Tetantara he'ua nongomung siYesus eibuut sanu tinopei "tebuut sanu obelinga nuva'i" ane nomaku telima ane tepaa niYesus ei'ayu ponyalipong. Tapi siYesus nongular, "BoSiama, ampuni siira, karna siira jio mo'otoi tesapa sanu ginauka niira." SiPilatus nomarentaa siira nonulisa "Tepuang nutoo-too nuYahudi" eisombo'a tedopi. Tedopi he'ua inembea eiponyalipong eibabok nuva'i niYesus.



Tetantara nongundi antau motilala tepakeean niYesus. Watu siira nonggauka eini, siira nongganai sanu iramala eibuku sanu mapacing monggatustoung luulu, "Siira motilal-tilal tepakeeanU eiilot niira, ane nongundi untuk tepakeeanU."




SiYesus sinalipa eiilot rotoo topongangga. Sotoo lamai siira nongengeng siYesus, tapi sanu ntaninya nonjarita, "Si'oo jio nobule ei'Alata'ala? Si'ita osala, tapi tetoo he'ua jio osala." Lamai he'ua siia nonjarita eisiYesus, "Tuluni, lambot sia'u watu Si'oo majari tepuang." SiYesus nonyimbat siia, "Eleo eini, si'emuu concoono Sia'u eisuruga."



Tetopomimpin-topomimpin nuYahudi ane tetoo-too ntaninya eilalong tepeinconong he'ua notambaka siYesus, Siira nongular eiSiia, "Ane Si'oo teUnga nu'Alata'ala, penyau lamai tesalip he'ua ane salamata te'alae-Mu! Lamai he'ua si'ami momarcaya eiSi'oo."



Lamai he'ua telangit eitana he'ua najari nondoung tutuu, maampo watu he'ua tanga eleo. Telangit najari nondoung eitanga eleo tatarus nondoung e'endenya tolujaang.



Touk he'ua siYesus neroroa, "Notouko! BoSiama, Sia'u nombeena tenyaa'U uma'o eilalong nulima-Mu." Touk he'ua Siia nokunduna teva'i-Nya ane nombeena tenyaa-Nya. Watu Siia naate, najari telindug sanu mooge. Tevatu-vatu mebesek ane mabari tekubur netebo'a ane tetoo-too sanu mapacing sanu naatemo metuvu vavalii.




Lamai te'amateong-Nya, siYesus nombo'a tejalang eitoo-too majaox ei'Alata'ala. Watu tetantara sanu nonjagai siYesus ne'ita jojoo sanu najari, siia nongular, "Tetoo eini jio osala. Siia tutuu teUnga nu'Alata'ala."



Touk he'ua siYusup ane siNikodemus, rot oo tetopomaguru nuYahudi sanu nomarcaya siYesus he'ua siMesias, nomongi tebatang niYesus lamai siPilatus. Siira nongalui te'alae-Nya nepake tegandis ane inembea eilalong nukubur sanu ginauni eivombong nuvatu sima tegoa. Touk he'ua siira nonaub tebamba nupen-tamaong nondulina tevatu mooge.

*Eini tejarita nu'Alata'ala lamai siMatius 27:27-61; siMarkus 15:16-47;  
siLukas 23:26-56; siYohanes 19:17-42.*


41. Te'Alata'ala Netuvua'onye  
SiYesus Lamai Te'Amateong



Touk tetantara nonyalipa siYesus, tetopomimpin-topomimpin nuYahudi sanu jio nomarcaya nonjarita eisiPilatus, "SiYesus, tetopolampa ohe'ua, nongular Siia kana metuvu lamai te'amateong touk tolueleo." Sotoo kanaboi monjaga tekubur-Nya antau monantua temurit-murit-Nya jio maala mongangga tebatang-Nya ane lamai he'ua monjarita Siia netuvumo lamai te'amateong.



SiPilatus nonjarita, "Omungo lasiatoo tetantara ane jagai tutuu tekubur he'ua." Karna he'ua siira nongembe tetanda eivatu eibamba nupentamaong nukubur he'ua ane nonuju tetantara nonjaga eiri'ua antau jio umai sanu maala mongangga tebatang-Nya.



Seeleo touk siYesus kinubur, najaok teEleo nuPengondok, ane tetoo-too nuYahudi jio maala uma'o eikubur eieleo he'ua. Karna he'ua ulengi sasambat touk teEleo nuPengondok, soso'uya tebengkel nesiap uma'o tekubur niYesus mongembea'onye teminya sanu mombonggi eibatang niYesus.



Jio inototoi najari telindug sanu moporos tutuu. Sotoo temalaekat inita sima te'ilat nembu'a lamai tesuruga. Siia nondulina tevatu sanu nongompoti tebamba nupentamaong nukubur he'ua ane nongodung eibabonya. Tetantara sanu nonjaga nobubuleong tutuu ane noguar eitana sima tetoo naate.



Watu tebengkel-bengkel najaok eikubur, temalaekat he'ua nonjarita eisiira, "Inyaa nobule. SiYesus jio eiri'ini. Siia netuvumo lamai te'amateong, sima sanu inular-Nya! Itai eilalong nukubur." Tebebengkel he'ua nongita eilalong nukubur ane nongita eipait tebatang niYesus inembea. Tebatang niYesus jiongo umai eiri'ua!



Touk he'ua temalaekat he'ua nonjarita eibebengkel he'ua, "Uma'omo ane ulara eimurit-murit, 'SiYesus netuvumo lamai te'amateong ane mongaliurui si'emuu uma'o eiGalilea.'"



Tebebengkel he'ua nobubuleong ane nadandalan sanu nooge. Siira nelnjok uma'o eimurit-murit-Nya ane nonjaritaa teKareva sanu Mombosi he'ua.



Watu tebebengkel pepees ejalang uma'o mongulara eimurit-murit-Nya teKareva sanu Mombosi he'ua, siYesus nepopo'itaa te'alae eisiira, ane siira nonyomba-Nya. SiYesus nongular, "Inyaa mobule. Na'omo ane ulara eimurit-muritU uma'o eiGalilea. Siira kana me'ita sia'u eiri'ua."

*Eini tejarita nu'Alata'ala lamai siMatius 27:62–28:15; siMarkus 16:1–11; siLukas 24:1–12; siYohanes 20:1–18.*

42. SiYesus Nopo'uig Temurit-murit-Nya  
Jijiompo Netencile Eisuruga




Watu teeleo siYesus netuvu lamai te'amateong, rotoo temurit niYesus uma'o eikota sanu ntaninya. Watu siira nelampa, siira nonjaritaa sima sanu najarimo eisiYesus. Siira tututuu nomikir siYesus he'ua teMesias, tapi touk he'ua siia pinatei. E'eini tebebengkel nonjaritaa Siia netuvuonye. Rotoo temurit eini neingu.




SiYesus nongosu'i siira ane nompamula nelampa ncoono siira, tapi siira jio mo'otoi Siia he'ua siYesus. Siia no'utanya tesapa sanu nojaritaa niira, ane siira nongulara eiSiia sima jojoo tegauk-gauk sanu jio biasa sanu najarimo laso'uyaeleo ponou'ong. Siira nomikir siira nonjarita eitoo sanu mokurang sanu jiompo umai ne'eepe sima sanu najarimo eiYerusalem.



Lamai he'ua siYesus nongulara mapatas eisiira tesapa sanu inulara ejarita nu'Alata'ala sima teMesias. Siia nolambota eisiira sima tenabi-nabi noramalo teMesias kana masesa ane nopatei, tapi kana metuvu vavalii watu tolueleo. Watu siira najaok eikota sanu tinunggai, teeleo mo'osuko mondoung.




Rotoo he'ua nongundang siYesus momoia concoono siira, karna he'ua Siia nomoia concoono siira. Jjiompo siira nenginang, siYesus nongala songkolo teroti, nonyukur eiSiopu, lamai he'ua nonompignya. Selengaan temata niira netebo'a, ane siira mo'otoi Siia he'ua siYesus. Tapi eiwatu he'ua, Siia selengaan jio inita niira.




Rotoo he'ua nejajaritaong, "He'ua siYesus! He'ua tesabanya teambok ni'ita masanang watu Siia nongulara tejarita nu'Alata'ala eisi'ita!" Selengaan, siira netencile eiYerusalem ane nongulara eimurit-murit-Nya, "SiYesus netuvuonye! Si'ami ne'itamo Siia!"




Watu temurit-murit-Nya pepees nejajaritaong eikamar, jio inototoi siYesus nembu'a eiri'ua concoono siira ane nonjarita, "Te'ombombosiong eisi'emiu jojoo!" Temurit-murit-Nya nonyangka Siia te'alus nutoo naate, tapi siYesus nonjarita, "Nete'uya si'emiu nobule ane nabata-bata? Itai telima ane tepaa'U. Te'alus nutoo naate jio umai te'alaе sima Sia'u." Antau mepopo'itaa Siia jio te'alus nutoo naate, Siia nomongi sanu maala no'inang. Siira nombee Siia sede'i tebau sanu pinogabu ane Siia nengi-nangnya.



SiYesus nongular, "Sia'u nongulara'omo eisi'emu jojoo sanu netetulis sima Sia'u eilalong tejarita nu'Alata'ala kanaboi najari." Lamai he'ua Siia nondulu siira, antau siira mo'otoi tejarita nu'Alata'ala. Siia nonjarita, "Umai netetulis luulu sima teMesias kana masesa, maate, ane metuvu lamai te'amateong watu eieleo totolu."



"Temurit-muritU kana mongulara eijojoo tetoo kanaboi matoba antau monarima tepongampunong nudosa niira. Siira kana monggauka eini nompamula lamai teYerusalem, lamai he'ua uma'o eijojoo tesuku eipapaio. Si'emu majari tesabi sima tesaba-saba eini."



E'endenya apampulueleo ancuna'onya, siYesus nepopo'itaa te'alae-Nya eimurit-murit-Nya nengkaning-ngkaning. Vavalii sangkaning, Siia valii nepopo'itaa te'alae uma'o nelabi limagatustoo watu sanu selio-lio! Siia nomake nabari tecara nepopo'itaa eimurit-murit-Nya Siia netuvuonye, ane Siia nomaguru siira sima tePomarenta nu'Alata'ala.



SiYesus nonjarita eimurit-murit-Nya, "Jojoo te'ababaraka eisuruga ane ejuniaa vineena'omo eiSia'u. Jadi na'omo, jaria'omo temurit-murit lamai jojoo tesuku ane mombaptis siira eilalong nutope nuSiama, nuUnga, ane nu'Alus nu'Alata'ala ane momaguru siira monggauka jojoo tegauk sanu Uparentaal'omo eisi'emi. Lambot, Sia'u kana kalepu concoono si'emi."




Apampulueleo touk siYesus netuvu lamai te'amateong, Siia nonuju temurit-murit-Nya, "Pomoia eiYerusalem jaok Siama'U mombee te'uig watu te'Alus nu'Alata'ala majaok eisi'emu." Lamai he'ua siYesus neteengkat netencile eisuruga, ane teru'ong nongompotinya lamai pe'itaong niira.

*Eini tejarita nu'Alata'ala lamai siMatius 28:16–20; siMarkus 16:12–20; siLukas 24:13–53; siYohanes 20:19–23; teKisah Para Rasul 1:1–11.*


43. Noniang Te'ababari  
Tetoo-too Sanu Nomarcaya




Touk siYesus netencile eisuruga, temurit-murit-Nya nomoia eiYerusalem sima sanu pinarentaa'omo niYesus. Tetoo-too sanu nomarcaya eisiYesus tatarus neincong ane nonggane.



Sontoung sangkaning, 50 eleo touk teEleo nuPaska, tetoo-too nuYahudi noramea teeleo sanu mepenting sanu tinope tePentakosta. EiPentakosta he'ua tetoo-too nuYahudi noramea tehasil nelolu tegando. Tetoo-too nuYahudi lamai jojoo tejuniaa najaok eiYerusalem antau moramea'onya concoono. Tetoung he'ua, tePentakosta iramea sompulueleo touk siYesus neteengkat eisuruga.




Pepees tetoo-too sanu nomarcaya he'ua jojoo neincong concoono, jio inototoi tevonua sanu pinomoiai niira binu'ei nusuara sima tebarat sanu makancang. Lamai he'ua sangaya sima telegang nuapi inita eibabok jojoo nuva'i nutoo sanu nomarcaya he'ua. Siira jojoo pinentamai nu'Alus nu'Alata'ala ane nompamulamo nonjarita eilalong nubasa-basa ntaninya.



Watu tetoo-too eiYerusalem ne'eepes tesuara he'ua, tetoo nabari neincong antau mo'otoi tesapa sanu najari. Watu tetoo-too he'ua ne'eepes tetoo-too sanu nomarcaya he'ua nongulara sima tegauk-gauk nu'Alata'ala sanu mombosi tutuu, siira neherang karna siira ne'eepes he'ua eilalong tebasa niira mboto.



Soso'uya tetoo norait temurit-murit he'ua neilu. Tapi siPetrus ne'o'oro ane nonjarita eisiira, "Po'inepea sia'u! Tetoo-too eini jio neilu! Tegauk eini nongganai tegauk sanu tinulis niNabi Yoel sanu te'Alata'ala nongulara, 'Watu teeleo-eleo ponou'ong, Sia'u kana mombeena te'AlusU eimanusia."




"Hee tetoo-too nu'Israel, siYesus he'ua tetoo sanu nonggauka nabari tegauk-gauk sanu mabaraka nepake te'ababaraka nu'Alata'ala, sima sanu inita ni'emu ane mo'otoimo. Tapi si'emu nonyalipa Siia!"




"Maampo siYesus naate, te'Alata'ala netuvua Siia lamai tetoo-too naate. Eini nongganai sanu iramat, 'Si'oo jio nomatuvaya te'Too sanu Napacing-Mu movook eilalong nukubur.' Si'ami tesabi-sabi te'Alata'ala netuvua'onye siYesus."



"SiYesus eleo eini neteengkat eisabata nu'oanong nu'Alata'ala, te'Siama-Nya. SiYesus nonujumo te'Alus nu'Alata'ala selio-lio sima jinanjia'o-Nya. Te'Alus nu'Alata'ala sanu nonyabaa tesapa sanu si'emiу ne'ita ane ne'eepe e'eini."




"Si'emu nonyalipa siYesus. Tapi papatui mapatas te'Alata'ala nonyabaa siYesus najari teSiopu ane teMesias!"




Tetoo-too sanu no'inepea siPetrus tututuu netetarigut tesaba-saba sanu jinaritaa niPetrus. Karna he'ua siira no'utanya eisiPetrus ane temurit-murit, "Boruru-rurus, tesapa sanu nogauka ni'ami?"



SiPetrus nonyimbat, "Si'emu jojoo kanaboi matobamo ane nobaptis eilalong nutope niYesus Kristus antau te'Alata'ala mongampuni tedosamu. He'uapa Siia valii mombee si'emu tepombee nu'Alus nu'Alata'ala."




Kira-kira toluributoo nomarcaya tejarita niPetrus ane najari temurit-murit niYesus. Siira binaptis ane najari sanggaat lamai tetoo-too sanu nomarcaya eisiYesus eiYerusalem.




Temurit-murit tatarus no'inepea tepangajar nutopongomung-topongomung tekareva. Siira valii nosoincong, nenginang concoono, ane nonggane concoono. Siira masanang nomuji te'Alata'ala concoono ane jojoo sanu umai eisiira pinotilal concoono tetoo-too sanu ntaninya. Jojoo tetoo seilu siira. Seeleo-seeleo, noniang te'ababari nutoo sanu nomarcaya.

*Eini tejarita nu'Alata'ala lamai teKisah Para Rasul 2.*


44. SiPetrus Ane SiYohanes  
Nepe'eondok Sotoo Sanu Kingkido



Vavalii seeleo, siPetrus ane siYohanes uma'o eiVonua nu'Alata'ala. Watu siira nongosu'i tepentamaong nuVonua nu'Alata'ala, siira ne'ita sotoo telangkai sanu noluntoy sanu nomongi-mongi tedoi.




SiPetrus nongongontong tetoo sanu noluntoy he'ua ane nonjarita, "Sia'u jio umai odoi noveena eisi'oo. Tapi tesapa sanu eisia'u uveena eisi'oo. Eilalong nutope niYesus, pe'oro ane pelampa!"




Selengaan, te'Alata'ala nepe'eondok tetoo sanu noluntoy he'ua, ane siia nompamulamo nelampa ane olulumpat, ane nomuji te'Alata'ala. Tetoo-too eitutumbalong nuVonua nu'Alata'ala neherang.




Nabari tetoo nolongkang neincong antau me'ita tetoo sanu pine'eondok he'ua. SiPetrus nonjarita eisiira, "Nete'uya si'emiu neherang atetoo eini neondoko? Si'ami nepe'eondok siia jio karna te'uig atau te'ombombosi ni'ita mboto. Tapi te'uig niYesus ane te'aparcayaong sanu vineena niYesus sanu nepe'eondok tetoo eini."



"Si'emu sanu nomongi teGubernur nuRomawi antau siYesus nopatei. Si'emu nomate tetopombenii nu'otutuvu, tapi te'Alata'ala netuvua Siia lamai te'amateong. Maampo si'emu jio mo'otoi sanu pinogutumo ni'emu, te'Alata'ala nepake tegaukmu nongganai sanu iramal sima teMesias kana masesa ane maate. Karna he'ua eleo eini patoba ane ponguler ei'Alata'ala antau tedosa-dosamu nogagisa."



Tetopomimpin-topomimpin nuVonua nu'Alata'ala he'ua tutuu nongoungkul karna tesapa sanu inulara niPetrus ane niYohanes. Karna he'ua siira nera'op siPetrus ane siYohanes nontamaa siira eipanjara. Tapi kira-kira roributoo nomarcaya tesapa inulara niPetrus, jaok tetoo-too sanu nomarcaya eisiYesus noniang najari kira-kira limaributoo telangkai.



Watu seeleoana'onya, tetopomimpin-topomimpin nuYahudi nongomung siPetrus ane siYohanes eitolo nu'Imam sanu Mooge ane tetopomimpin-topomimpin nu'agama ntaninya. Siira no'utanya eisiPetrus ane siYohanes, "Nepake te'ababaraka nisee si'emu nepe'eondok tetoo sanu nolunttoy eini?"



SiPetrus binu'ei nu'Alus nu'Alata'ala ane nonyimbat siira mabarani, "Tetoo eini sanu ne'oro eitolo ni'emu pine'eondok nu'ababaraka niYesus teMesias. Si'emu nonyalipa siYesus, tapi te'Alata'ala netuvua Siia vavalii! Si'emu jio seilu momarcaya-Nya, tapi jio ocara ntaninya nosalamata boi mepake te'ababaraka niYesus!"



Tetopomimpin-topomimpin netetarigut siPetrus ane siYohanes nonjarita mabarani tutuu karna siira maala ne'ita tetoo-too eini tetoo-too biasa sanu jio osikola. Tapi lamai he'ua siira nolambot tetoo-too eini luulu concoono siYesus. Tetopomimpin-topomimpin nomarenta siPetrus ane siYohanes jio maala momaguruonye sima siYesus. Lamai he'ua siira nomatuvaya siira uma'omo.

*Eini tejarita nu'Alata'ala lamai teKisah Para Rasul 3:1-4:22.*

45. SiStepanus Ane SiPilipus




Watu tetoo-too sanu nomarcaya eisiYesus noniang mabari, umai tetoo tinope siStepanus sanu mondulu momimpin siira. Siia tetoo sanu mombosi, mapande ane nobu'e nu'Alus nu'Alata'ala. SiStepanus nonggauka mabari tegauk sanu mabaraka ane mapande nongulara eitoo-too kanaboi nomarcaya eisiYesus.



Vavalii seeleo, watu siStepanus pepees nomaguru sima siYesus, soso'uya tetoo nuYahudi sanu jio nomarcaya eisiYesus nompamulamo nebabantaong ncoono siStepanus. Siira nongoungkul tutuu ane nalampaoa sima siStepanus eitopomimpintopomimpin nu'agama. Siira nonjarita, "Si'ami ne'eepe siia nonjarita majaat sima siMusa ane te'Alata'ala!" Lamai he'ua tetopomimpin-topomimpin nu'agama nera'op siStepanus ane nongomung siia ei'Imam sanu Mooge ane tetopomimpintopomimpin nuYahudi sanu ntaninya. Eiri'ua tesabi-sabi ntaninya nalampaoa sima siStepanus.




Te'Imam sanu Mooge he'ua no'utanya eisiStepanus, "Tutuu, sanu iraita eini?" SiStepanus nonyimbat ane nolambota siira sima mabari tegauk-gauk sanu mooge sanu ginauka nu'Alata'ala lamai tewatu netuvu si'Abraham jaok tewatu si'Yesus, ane iama'o tetoo-too nu'Yahudi tatarus jio nonuru'i te'Alata'ala atau tetopomimpin sanu tinuju-Nya. Lamai he'ua siia nonjarita, "Si'emu tetoo-too sanu ma'adal teambok ane tetopongeva. Si'emu kalepu jio nonarima te'Alus nu'Alata'ala, sima tesiopu-siopu ni'emu kalepu jio nonarima te'Alata'ala ane nomate tenabi-nabi-Nya. Si'emu valii nonggauka'omo sanu nelabi majaat. Si'emu nomate te'Mesias!"



Watu tetopomimpin-topomimpin nu'agama ne'eepe he'ua, siira nongompoti tetelinga niira ane neroroa moporos. Siira nongomung siStepanus nesuvung lamai tekota ane nomarenggoinya nepake tevatu antau momate siia.



Watu siStepanus mo'osuko maate, siia neroroa, "Siopu Yesus, tarimamo te'alusu." Lamai he'ua siia nopo'u uane neroroaonye, "Siopu, inyaamo morekena tedosa niira eini." Lamai he'ua siia naate.




Sotoo langkai tinope siSaulus nosituru'i ncoono tetoo-too sanu nomine siStepanus ane nonjaga tejuba-juba niira pepees siira nomarenggoi siStepanus. Teeleo he'ua mabari tetoo eiYerusalem nompamulamo nonjaati tetoponuut-toponuut niYesus. Karna he'ua tetoo-too sanu nomarcaya nelinjok ane uma'o eipomoiaong-pomoiaong ntaninya. Tapi maampo sima he'ua, siira tatarus nongulara sima siYesus eipapaio siira uma'o.




Sotoo temurit niYesus sanu tinope siPilipus he'ua sotoo sanu nomarcaya sanu nelinjok lamai teYerusalem watu jinajaati he'ua. Siia uma'o eiSamaria eipaio siia nongulara sima siYesus ane mabari tetoo sinalamata. Vavalii seeleo, sotoo temalaekat nuSiopu nonuju siPilipus uma'o eisobua tejalang eitana sanu jio pinomoiai nutoo. Watu siia lalampa ejalang, siPilipus ne'ita sotoo tetopomarenta sanu mepenting lamai teTana nu'Etiopia nongodung eirodanya. Te'Alus nu'Alata'ala nonuju siPilipus uma'o ane nonjarita concoono tetoo he'ua.




Watu siPilipus mo'osuko teroda he'ua, siia ne'eepe tetoo he'ua nombasa sanu tinulis niNabi Yesaya. Tetoo he'ua nombasa, "Siia inomung sima teunga nudomba antau nopatei, ane sima sambaang teunga nudomba nopooodoy, siia jio nonjarita maampo sababa. Siia ginauka jio na'adil ane jio no'ongkoi. Te'otutuvunya inala lamai siia."



SiPilipus no'utanya eitoo nu'Etiopia he'ua, "Nootoi ni'oo tesapa sanu binasamu?" Tetoo nu'Etiopia he'ua nonyimbat, "Jio. Ane jio umai tetoo sanu mopa'apatasnya eisia'u, sia'u jio maala mo'otoi. Tuluni ane pongodung eisevi'u. SiYesaya nonjarita sima tembotonya atau tetoo ntaninya?"




SiPilipus nongulara eitoo he'ua siYesaya nonjaritaa sima siYesus. SiPilipus valii nomake nabari te'ayat nujarita nu'Alata'ala sanu ntaninya nonjaritaa teKareva sanu Mombosi sima siYesus.



Watu siira nolabati tepomoiaong sanu oogonya, tetoo nu'Etiopia he'ua nongulara, "Itai! He'ua teogo! Maala sia'u nobaptis?" Lamai he'ua siia nomarentaa tesupir mengondoka teroda he'ua.



Lamai he'ua siira nenyau uma'o eitanga nuogo, ane siPilipus nombaptis tetoo nu'Etiopia he'ua. Touk siira nesuvung lamai teogo, te'Alus nu'Alata'ala he'ua nongomung siPilipus uma'o eipomoiaong sanu ntaninya eipaio siia nonarusa nongulara eitoo-too sima siYesus.



Tetoo nu'Etiopia he'ua nonarusa tepelampanya, siia nasanang karna nomarcaya eisiYesus.

*Eini tejarita nu'Alata'ala lamai teKisah Para Rasul 6:8-8:5; 8:26-40.*

46. SiSaulus Nomarcaya EisiYesus




SiSaulus he'ua teunga logas sanu nonjaga tejuba nutoo-too sanu nomate siStepanus. SiSaulus nomikir tetoponuut-toponuut niYesus nonuut tejalang sanu nelingu ane siira nonjanjaati te'Alata'ala. Karna he'ua siia nonjanjaati tetoo-too sanu nomarcaya. Siia uma'o lamai sombonua uma'o sombonua eiYerusalem nera'op telangkai ane tebengkel, ane nentamaa siira eipanjara. SiSaulus nonarima te'isin lamai te'Imam sanu Mooge uma'o eiKota nuDamsik ane mera'op tetoo-too sanu nomarcaya ampi he'ua ane mongomung siira metencile uma'o eiYerusalem.




Watu siSaulus pepees nelampa ejalang uma'o teDamsik, terarat sanu marava lamai tesuruga mevalasaang eipapalitnya, ane siia noguar. SiSaulus ne'eepe sotoo nonjarita, "Saulus! Saulus! Nete'uya si'oo nonjanjaati sia'u?" SiSaulus nonyimbat, "Sisee si'oo, Guru?" SiYesus nonyimbat, "Sia'u siYesus sanu jinajaati ni'oo."




Watu siSaulus nembuang siia jio maala me'ita. Tetagu-tagunya kanaboi nondiiti siia mentama uma'o teDamsik. SiSaulus jio nenginang ane nenginung e'endenya tolueleo.




Umai sotoo temurit sanu tinope si'Ananias eiDamsik. Te'Alata'ala nonjarita eisiiia, "Na'omo eivonua pomoiaong niSaulus. Embea telimamu eibabok niia antau siia maala me'itaonye." Tapi si'Ananias nonjarita, "Guru, sia'u ne'eepemo iama'o tetoo he'ua nonjanjaati tetoo-too sanu nomarcaya." Te'Alata'ala nonyimbat, "Na'omo! Sia'u kana momile siia mongulara tetope'U eitoo-too nuYahudi ane eisuku-suku ntaninya. Siia kanaboi masesa mabari tegauk karna Sia'u."



Karna he'ua si'Ananias uma'o eisiSaulus, nongembea telimanya eibabok nuva'inya, ane nonjarita, "SiYesus, sanu nopopo'itaa te'alaenya eisi'oo ejalangomai, nonuju sia'u eisi'oo antau si'oo maala me'itaonye ane binu'ei nu'Alus nu'Alata'alaa." SiSaulus selengaan maala ne'itaonye, ane si'Ananias nombaptis siia. Lamai he'ua siSaulus nenginang ane majari mo'ugonye.



Selengaan, siSaulus nompamula nokarevaa teKareva sanu Mombosi eitoo-too nuYahudi, inularnya, "SiYesus he'ua teUnga nu'Alata'alai!" Tetoo-too nuYahudi neherang karna tetoo sanu nonyo'araimo momate tetoo-too sanu nomarcaya, e'eini nomarcaya eisiYesus valii. SiSaulus nebabantaong concoono tetoo-too nuYahudi, nepopo'itaa siYesus he'ua teMesias.



Touk laso'uyaeleo e'endenya tetoo-too nuYahudi noguntu teniat momate siSaulus. Siira nongembea tetoo-too eigorbang nukota antau mepate siia. Tapi siSaulus ne'eepe simamo teniat niira he'ua ane tetagu-tagunya nondulu siia nesuvung. Watu ndoungnya siira menyaua siia lamai telulu eitembok nukota eilalong nukaranji.



Touk laso'uyaeleo e'endenya tetoo-too nuYahudi noguntu teniat momate siSaulus. Siira nongembea tetoo-too eigorbang nukota antau mepate siia. Tapi siSaulus ne'eepe simamo teniat niira he'ua ane tetagu-tagunya nondulu siia nesuvung. Watu ndoungnya siira menyaua siia lamai telulu eitembok nukota eilalong nukaranji.




Laso'uyatoo sanu nomarcaya sanu nelinjok lamai te'asesesa ei'Yerusalem uma'o maavar jaok tekota nu'Antiokhia ane nokarevaa sima si'Yesus. Mabari tetoo ei'Antiokhia jio tetoo nu'Yahudi, tapi mabari tutuu nompamula majari tetoo sanu nomarcaya. Si'Barnabas ane si'Saulus uma'o eir'iua antau momaguru sima si'Yesus eitoo-too sanu pa'ali nomarcaya ane mopo'uig tetoo-too sanu nomarcaya eir'iua. Ei'Antiokhia tetoo-too sanu nomarcaya eisi'Yesus nompamula tinope "tetoo-too nu'Kristen."



Vavallii seeleo, watu tetoo-too nu'Kristen ei'Antiokhia pepées nopusaa ane nonggane, te'Alus nu'Alata'ala nonjarita eisiira, "Mongantaa si'Barnabas ane si'Saulus ei'Sia'u. Sia'u nolevamo monggauka tepokarajaong sanu kusus." Karna he'ua tetoo-too nu'Kristen ei'Antiokhia nongganea si'Barnabas ane si'Saulus ane nongmbea telima eibabok niira. Lamai he'ua siira nonuju si'Barnabas ane si'Saulus antau mokarevaa teKareva sanu Mombosi sima si'Yesus eipomoiaong ntaninya sanu mabari. Karna he'ua si'Barnabas ane si'Saulus uma'o ane momaguru tetoo-too lamai laso'uyasuku, ane mabari tetoo nomarcaya eisi'Yesus.

*Eini tejarita nu'Alata'ala lamai teKisah Para Rasul 8:3; 9:1-31; 11:19-26; 13:1-3.*


47. SiPaulus Ane SiSilas EiPilipi




Watu siSaulus nonggauka tepelampa eijojoo tepomoiaong eipomarentaong nuRomawi, siia nompamula nepake tetope nuRomawi, "siPaulus". Vavalii seeleo, siPaulus ane tetagunya siSilas uma'o eiKota nuPilipi antau mokarevaa teKareva sanu Mombosi sima siYesus. Siira uma'o eipipit nubangkalang sanu eiaang nukota. Eipipit nubangkalang he'ua tetoo-too neincong nonggane. Eiri'ua siira netepojaok concoono sotoo tebengkel tetopobaluk tenaus tetopenya siLydia. Siia masanang nonyomba te'Alata'alanya tetoo-too nuYahudi.



Te'Alata'ala nombo'aa teambok niLydia antau nomarcaya tetutuunong sima siYesus, ane siia concoono tetoo-too sanu nomoia eivonuanya binaptis. Siia nongundang siPaulus ane siSilas nomoia eivonuanya, lamai he'ua siira nomoia ncoono siLydia ane tetoo-too eiri'ua.



SiPaulus ane siSilas nengkaning-ngkaning netepojaok ncoono tetoo-too elialong tepongpaneong. Tiapeleo pepees siira nelampa uma'o ampi he'ua, sotoo tevotuang bengkel sanu pinentamai nu'alus sanu majaat nonuut siira. Nepake te'uig nu'alus sanu majaat he'ua siia noramal tegauk-gauk sanu kana majari eitoo, ane siia, tetoporamat, ma'aala mabari tedoi untuk tetoo-too sanu nomiara siia.




Tevotuang bengkel he'ua tatarus neroroa pepees siira nelampa, "Tetoo-too eini tevotuang nu'Alata'ala sanu Mapangkat. Siira nonjaritaa eisi'emuu iama'o nosalamata!" Siia nengkaning-ngkaning nonggauka he'ua jaok siPaulus najari nongoungkul.




Ponou'ongnya vavalii seeleo, watu tevotuang bengkel he'ua nompamula neroroa, siPaulus negois uma'o eisiia ane nonjarita ei'alus sanu majaat sanu eilalong nubengkel he'ua. "Eilalong tetope niYesus Kristus, pesuvung lamai te'alaenya." Selengaan te'alus sanu majaat he'ua nolinjo'i siiia.



Tetopomiara-topomiara tevotuang bengkel he'ua majari nongoungkul tutuu! Ane jio umai te'alus sanu majaat he'ua, siira mo'otoi tevotuang bengkel he'ua jio maala moramal tegauk-gauk sanu kana majari eitoo-too. Tebatuanya tetoo-too jiongo mombayar eisiira antau noulara tesapa sanu kana majari eisiira.



Karna he'ua tetopomiara-topomiara tevтуang bengkel he'ua nongomung siPaulus ane siSilas eitopomimpin-topomimpin nukota lamai teRoma. Tetopomimpin-topomimpin he'ua nonuju nobobogi siPaulus ane siSilas, lamai he'ua ntinamaa eipanjara.




Siira nongembe siPaulus ane siSilas eipomoiaong sanu malalok eipanjara ane tepaa niira binalanggu. Eitanga ndoung, siira nogumbuy nomuji teSiopu.



Jio inototoi, najari telindug ane jojoo tebamba nupanjara netebo'a. Jojoo terante nutoo-too eilalong nupanjara na'alapas.




Lamai he'ua tekapala nupanjara he'ua nembaung, ane watu siia ne'ita tebamba-bamba netebo'amo, siia nobubuleong. Siia nonyangka jojoo tetahanan nelnjoko, jaok siia seilu momate te'alaenya mboto. (Siia mo'otoi tetopomimpin-topomimpin nukota lamai teRoma kana momate siia karna momatuvayaa tetahanan he'ua jojoo nelnjoko.) Tapi siPaulus ne'ita siia ane neroroa, "Hee! Inyaa monylakai te'alaе ni'oo mboto. Si'ami jojoo umai eiril'ini."



Tekapala nupanjara he'ua gugugur watu siaa najaok ei siPaulus ane siSilas ane no'utanya, "Tesapa sanu kana ugauka antau nosalamata?" SiPaulus nonyimbat, "Parcayamo eiSiopu siYesus, ane si'oo ane sorurusmu kana nosalamata." Lamai he'ua tekapala nupanjara he'ua nongomung siPaulus ane siSilas eivonuanya, ane nonambas tepa'it-pa'it niira. SiPaulus nokarevaa teKareva sanu Mombosi sima siYesus eijojo tetoo eivonuanya.



Tekapala nupanjara, telapinya ane teunga-unganya nomarcaya eisiYesus ane binaptis. Lamai he'ua tekapala nupanjara nombee eisiPaulus ane siSilas sanu no'inang ane siira noramea concoono.



Eteleo vavaliimai tetopomimpin-topomimpin nukota nope'ebebas siPaulus ane siSilas ane nomongi eisiira antau molinjo'i tePilipi. SiPaulus ane siSilas nonjao'i siLydia ane lasiatoo ntaninya ane lamai he'ua nolinjo'i tekota he'ua.



SiPaulus ane tetopomimpin-topomimpin nuKristen ntaninya nonggauka tepelampa uma'o eikota mabari, nokarevaan ane nomaguru teKareva sanu Mombosi sima siYesus eitoo-too. Siira valii nonulis mabari tesura antau mopo'uig teambok ane momaguru tetoo-too sanu nomarcaya eigareja-gareja. Lasiasura he'ua najari tebuku-buku eilalong tejarita nu'Alata'ala.

*Eini tejarita nu'Alata'ala lamai teKisah Para Rasul 16:11-40.*

48. SiYesus He'ua TeMesias Sanu Jinanjia



Watu te'Alata'ala nogutu tejuniaa, jojoo he'ua mombosi. Jio umai odosa. Si'Adam ane siHawa me'agagalongan, ane siira magalang ei'Alata'ala. Jio umai sanu mepees atau sanu maate. Te'Alata'ala seilu tejuniaa sima he'ua.



Tepuang nuseetan nonjarita lamai tesaa eijo'ong nu'Eden antau nonipu siHawa. Lamai he'ua siia ane si'Adam nodosamo ei'Alata'ala. Karna siira nogugauk tedosa, jojoo tetoo eijuniaa maala mepees ane jojoo tetoo maala maate.



Karna si'Adam ane siHawa nodosa, tesaba sanu nelabi najaat valii najari. Temanusia najari temusu nu'Alata'ala. Karna he'ua sosotoo lamai watu nopo guungaa umai tegauk nodosa ane siia temusu nu'Alata'ala valii. Tehubungan tetoo-too concoono te'Alata'ala magancing karna tedosa. Tapi te'Alata'ala umai terancana untuk mopo'ombosi tehubungan he'ua.




Te'Alata'ala nojanjia sotoo tebija niHawa kana mopo'orua teva'i nupuang nuseetan, ane tepuang nuseetan kana moma'iti tetojungnya. Eini obatuanya tepuang nuseetan kana momate siYesus, tapi te'Alata'ala kana metuvua'onye Sii. Lamai he'ua teMesias kana mopo'orua te'uig nupuang nuseetan seende-endenya. Mabari ntoung lamai he'ua, te'Alata'ala nongulara siYesus he'ua teMesias, tepuang sanu jinanjia nu'Alata'ala.



Watu te'Alata'ala nopo'orua jojoo tejuniaa nepake teogo buntul, Siiia nonyadliaa tepayangan sanu mooge untuk nonyalamata siira sanu nomarcaya eiSiiia. Tepayangan he'ua tepogurapanong sima siYesus. Sima he'ua valii, jojoo tetoo masipato nopatei karna tedosa-dosa niira, tapi te'Alata'ala nonyadliaa'omo siYesus mopa'asalamat jojoo tetoo sanu nomarcaya eiSiiia.




E'endenya monggatustoung te'imam-imam tatarus nombee tepombee ei'Alata'ala lamai tetoo-too untuk mombolos tehukuman sanu masipato siira monarima karna tedosa niira. Tapi tepombee-pombee he'ua jio maala nonggagis tedosa niira. Te'imam-imam he'ua tepogurapanong sima siYesus. Tapi, siYesus jio nombee tepombee tebinaatang sima te'imam-imam ntaninya. Siiia nombee te'alae-Nya mboto sima tepombee sanu maala monggagis tedosa jojoo tetoo ejuniaa eini. SiYesus he'ua te'Imam sanu Mooge sanu tutuu karna siiia majari tepongonto eiilot te'Alata'ala ane temanusia sanu odosa.



Te'Alata'ala nonjarita eisi'Abraham, "Lamai si'oo, jojoo tesuku ejuniaa kana nobarakai." SiYesus he'ua tebija ni'Abraham. Jojoo tesuku ejuniaa nobarakai niYesus, karna tetoo-too sanu nomarcaya eisiYesus nosalamata lamai tedosa, ane majari tebija ni'Abraham.



Watu te'Alata'ala nonuju si'Abraham nombee teunganya, si'Ishak, simamo tepombee, te'Alata'ala nonyadiaa sambaang tedomba untuk tepombee nombolos si'Ishak. Tedomba sanu sinadiaa nu'Alata'ala he'ua tepogurapanong sima siYesus. Te'Alata'ala nonyadiaa siYesus, teUnga nuDomba nu'Alata'ala, simamo tepombee untuk maate mombolos si'ita.



Watu te'Alata'ala nonjaoka te'abalaan ponou'ong eiMesir, jojoo tetoo nu'Israel kanaboi monyambale sambaang teunga nudomba sanu mombosi ane mongembe teraanya eibingkai nupintu nuvonua niira. Eibabonya, ei'oigi ane ei'oanong. Watu te'Alata'ala ne'ita teraa he'ua, Siia nolabata tevonua-vonua niira ane jio momate teunga-unga sia'a niira. Tegauk eini tinope tePaska.




TeUnga nuDomba nuPaska he'ua tepogurapanong sima siYesus. Siia tututuu jio odosa ane pinatei eiEleo nuPaska. Watu tetoo nomarcaya eisiYesus, teraa niYesus nombayar tedosa nutoo he'ua, ane tehukuman nu'Alata'ala nalabat siia.



Te'Alata'ala nogutu tepejanjiong concoono tetoo-too nu'Israel, tetoo-too sanu pinilei-Nya. SiYesus nongomung tepejanjiong sanu vuou lamai te'Alata'ala. Tetoo-too lamai jojoo tesuku maala momarcaya eisiYesus ane majari tetoo-too sanu pinilei nu'Alata'ala.



SiMusa he'ua sotoo tenabi sanu nonjaritaa tejarita nu'Alata'ala. Sima siMusa, siYesus he'ua valii sotoo tenabi, tapi siYesus he'ua nelabi mooge. Siia jio boi nongulara tetutuunong nu'Alata'ala, Siia he'ua tetutuunong nu'Alata'ala sanu metuvu.



Te'Alata'ala nojanjia eiPuang siDaud sotoo tebijanya kana momarenta simamo tepuang eibabok tetoo-too nu'Alata'ala seende-endenya. SiYesus he'ua tebija tePuang siDaud sanu najari tepuang sanu jinanjia he'ua.



SiDaud he'ua tepuang nu'Israel, tapi siYesus he'ua tepuang jojoo eijuniaa! Siia kana majak vavalii ane momarenta tepomarenta-Nya ma'adil ane membombosiong seende-endenya.

*Eini tejarita nu'Alata'ala lamai teKejadian 1-3,6, 14,22; teKeluaran 12,20; 2 siSamuel 7; te'Ibrani 3:1-6,4:14-5:10,7:01-8:13,9:11-10:18; teWahyu 21.*


49. Tepejanjiong Sanu Vuou Nu'Alata'ala




Sotoo temalaekat nongulara sotoo terandaa tinope siMaria sima sila kana moguungaa teUnga nu'Alata'ala. Karna he'ua watu siia ulengi marandaa, siia noguungaa teunga langkai ane nonopei-Nya siYesus. Karna he'ua siYesus he'ua temanusia ane teUnga nu'Alata'ala.



SiYesus nonggauka nabari tegauk sanu mabaraka sanu nepopo'itaa Siia umai te'ababaraka lamai te'Alata'ala. Siia nelampa eibabok nuogo, nengondoka tebarat, nepe'eondok nabari tetoo sanu nepees, nombugo te'alus sanu majaat, nogutu tetoo naate netuvuonye, ane nomainang limaributoo boi nepake limabua teroti ane robua tebau.



SiYesus valii teguru sanu mombosi, ane Siia nonjarita mabaraka karna Siia he'ua teUnga nu'Alata'ala. Siia nomagurua eisi'emu kanaboi mongagalani tetoo-too ntaninya selio-lio sima si'emu mongagalani te'alae ni'emu mboto.



Siia valii nomagurua eisi'emu kanaboi mongagalani te'Alata'ala nelabi lamai tesapa-sapa, sima te'akakayamu.



SiYesus nonjaritaa teoli nuPomarenta nu'Alata'ala nelabi lamai tesapa-sapa eijuniaa. Mepenting tutuu tetoo majari tetoo nuPomarenta nu'Alata'ala. Ane seilu mentama eilalong tePomarenta nu'Alata'ala, si'emu kanaboi nosalamata lamai tedosamu.




SiYesus nomagurua lasiatoo kana nonarima Siia ane nosalamata, tapi tetoo-too ntaninya jio. Siia nonjaritaa lasiatoo sima tetana sanu mombosi. Siira nonarima teKareva sanu Mombosi sima siYesus ane sinalamata. Tetoo-too ntaninya sima tetana sanu ma'adal eijalang, eipaio tevu'u nujarita nu'Alata'ala jio mentama ane jio mohasila tevua. Tetoo-too he'ua jio seilu tetutuunong sima siYesus ane jio mentama eipomarenta-Nya.




SiYesus nomagurua sima te'Alata'ala tututuu mongagalani eitoo-too sanu odosa. Siia seilu mongampuni siira ane monjaria siira teunga-unga-Nya.




SiYesus valii nongulara te'Alata'ala nengkeles tedosa. Watu si'Adam ane siHawa nonggauka tedosa, tegauk he'ua inana jojoo tebijanya. Karna he'ua, jojoo tetoo eijuniaa odosa ane no'antaa lamai te'Alata'ala. Ane sima he'ua, jojoo tetoo najarimo temusu nu'Alata'ala.



Tapi te'Alata'ala nongagalani tutuu jojoo tetoo eijuniaa eini jaok Siia nombeena teUnga-Nya sotootooana'o-Nya antau sisee-see sanu nomarcaya eisiYesus jio nohukum karna tedosanya tapi kana metuvu ncoono Siia seende-endenya.




Karna tedosamu, si'emu osala ane masipato maate. Te'Alata'ala masipato nongoungkul eisi'emu, tapi watu siYesus naate eisalip, Siia nonarima tehukuman ni'emu.



SiYesus jiompo odosa, tapi Siia nomile hinukum ane naate simamo tepombee sanu mapacing antau monggagis tedosamu ane tedosa jojoo tetoo eijuniaa. Karna siYesus nombeemo te'alaenya mboto, te'Alata'ala maala mongampuni jojoo tedosa, maala valii tedosa sanu majaat tutuu.




Tegauk-gauk sanu mombosi jio maala monyalamata si'emu. Jio umai sanu maala nogauka antau mopo'ombosi tehubungan ncoono te'Alata'ala. Boi siYesus sanu maala monggagisa tedosa-dosamu. Si'emu kanaboi momarcaya siYesus he'ua teUnga nu'Alata'ala, ane Siia naate eisalip nombolos si'emu, ane te'Alata'ala netuvua Siia lamai te'amateong eieleo totolua'onya.




Te'Alata'ala kana monyalamata jojoo tetoo sanu momarcaya eisiYesus ane monarima Siia simamo teSiopu niira. Tapi Siia jio monyalamata sisee-see sanu jio momarcaya eiSiia. Jio no'ita si'emu nakaya atau nopukur, telangkai atau tebengkel, meisi atau molumbi, atau eipaio si'emu momoia. Te'Alata'ala mongagalani si'emu ane seilu si'emu momarcaya eisiYesus jaok si'emu maala majari teunga-Nya.




SiYesus noleva si'emu momarcaya eiSiia ane nobaptis. Si'emu momarcaya siYesus he'ua teMesias, teUnga nu'Alata'ala? Si'emu momarcaya si'emu tetopodosa ane masipato nohukum nu'Alata'ala? Si'emu momarcaya siYesus naate eisalip antau tedosamu nogagisa?



Ane si'emiу nomarcaya eisiYesus ane tesapa sanu ginauka'o-Nya eisi'emiу, si'emiу tetoo nuKristen! Te'Alata'ala nongomungo si'emiу nesuvung lamai tepomarenta mondoung nupuang nuseetan ane nongembea si'emiу eilalong nupomarenta marava nu'Alata'ala. Te'Alata'ala nongalamo tegauk-gauk sanu meisи ane odosa ane vineena'omo eisi'emiу te'eseseilu sanu vuou jaok si'emiу seilu monggauka sanu mombosi.



Ane si'emiу tutuu nomarcaya eisiYesus, te'Alata'ala nongam-punimo tedosamu karna tesapa sanu ginauka niYesus. E'eini, si'emiу simamo tetagu mo'osuk nu'Alata'ala, jio simamo temusu.




Ane si'emuu tetagu nu'Alata'ala ane tevotuang niYesus, si'emuu seilu monuut tepangajar niYesus. Maampo si'emuu he'ua tetoo nuKristen, si'emuu ulengi noso'raai monggauka tedosa. Tapi te'Alata'ala nesetia ane nonjarita, ane si'emuu nongakui tedosa-dosamu, Siia kana mongampuni si'emuu. Siia kana mombee si'emuu te'uig jio monggauka tedosa.




Te'Alata'ala nongulara eisi'emuu monggane, megurui tejarita-Nya, monyomba-Nya concoono tetoo nuKristen sanu ntaninya, ane mongulara eitoo ntaninya tesapa sanu ginauka'o-Nya eisi'emuu. Jojoo tesaba eini mondulu si'emuu metuvu eilalong nuhubungan ni'emuu ncoono Siia.

*Eini tejarita nu'Alata'ala lamai teRoma 3:21–26 5:1–11; siYohanes 3:16; siMarkus 16:16; teKolose 1:13–14; 2 teTesalonika 5:17–21; 1 siYohanes 1:5–10.*

50. SiYesus Kana Momarenta Tejuniaa Sanu Vuou




Kira-kira roribuntoung, teKareva sanu Mombosi sima siYesus teMesias nepudadago. Tetoo-too sanu nomarcaya eisiYesus noniang te'ababarinya. SiYesus nojanji Siia kana metencile watu teponou'ong nujuniaa.



Pepees si'ita metaang te'ajajaok niYesus, te'Alata'ala seilu si'ita metuvu mapacing ane moongko eiSiia. Watu siYesus umai eijuniaa Siia valii nongulara, "Temurit-muritU kana mokarevaa teKareva sanu Mombosi sima tePomarenta nu'Alata'ala eijojoo tesuku nutoo, touk he'ua teponou'ongnya kana majao."



Nabari tesuku sanu ulengi jiompo ne'eepe sima si'Yesus. Jijiompo Siila netencile eisuruga, si'Yesus nombeena teparenta eitoo-too nuKristen mokareva teKareva sanu Mombosi eisiira sanu jiompo ne'eepe. Siia nonjarita, "Na'omo, pa'ajarimo temurit-murit lamai jojoo tesuku!"



Si'Yesus valii nonjarita, "Sotoo tevotuang jio nelabi nooge lamai tetopomiara. Sima tetopomimpin-topomimpin nujuniaa eini nengkeles ei'Sia'u, si'emi kana nosesai ane nopatei niira karna Sia'u. Maampo ejjuniaa eini si'emi kana ma'aala te'asesesa, tapi po'uig karna Sia'u nondaaga tepuang nuseetan, sanu momarenta tejuniaa eini! Ane si'emi tataap mesetia jaok teponou'ong, si'emi kana nosalamata nu'Alata'ala."



SiYesus nonjaritaa eimurit-murit-Nya tejarita sanu mondulu mongulara sima tesapa sanu majari eitoo-too watu ponou'ong nujuniaa he'ua. Siia nonjaritaa, "Sotoo nongambura tevu'u sanu nombosi eijo'ongnya. Tapi pepees siia no'oturu, temusunya najaok ane nongambura tevu'u nuvumbu eiolot nuvu'u sanu mombosi, ane lamai he'ua nelampa."




"Watu tetutudaong he'ua netuvu, tevotuang-votuang no'utanya eitogunya, 'Mangge, si'oo nongambur tevu'u sanu mombosi eijo'ong he'ua. Nete'uya ogio eilalongnya?' Tetogunya he'ua nonyimbat, 'Sotoo temusu sanu nonggauka'onya.'"




"Tevotuang-votuang he'ua nonyimbut eitogunya, 'Maala si'ami mombuvut tegio he'ua?' Tetogunya nonjarita, 'jio. Ane si'emu monggauka'onya, si'emu kana mombuvut sanggaat lamai tegando valii. Petaang tewatunya melolu ane incona tegio antau norampuni, tapi omungo tegando eilalong nupongembeoungu."



Temurit-murit jio mo'otoi tebatuanya tejarita he'ua, karna he'ua siira no'utanya eisiYesus antau siia mopa'apatas he'ua eisiira. SiYesus nonjarita, "Tetoo sanu nongambur tevu'u sanu mombosi he'ua teMesias. Tejo'ong he'ua tejuniaa. Tevu'u sanu mombosi he'ua tetoo-too nuPomarenta nu'Alata'ala.




"Tegio he'ua tetoo-too sanu nonuru'i tepuang nuseetan. Temusu sanu nongambur tevu'u nuvumbu he'ua tepuang nuseetan. Tepelolu he'ua teponou'ong nujuniaa, ane tetopelolu he'ua temalaekat."




"Watu teponou'ong nujuniaa, jojoo tetoo sanu majari tetoponuut nupuang nuseetan kana noincona ane norampaka eilalong nututuonong nuapi, eipaio tetoo-too notumangis ane nekokoita tengisi. Lamai he'ua tetoo-too sanu mondolong kana orarat sima teeleo eilalong tePomarenta nu'Alatala, tesiamana niira."



SiYesus nonjarita valii sima watu Siia netencile eijuniaa jijiompo teponou'ong nujuniaa. Siia kana metencile eijuniaa mepake tecara sanu selio-lio watu Siia uma'o. Siia mepake te'alae sanu maala no'ita ane makaok eiru'ong eilangit. Watu Siia metencile, jojoo tetoo nuKristen sanu naatemo kana metuvu lamai te'amateong ane monjao'i-Nya eiolong.




Lamai he'ua tetoo-too nuKristen sanu ulengi netuvu kana noengkat concoono siira eiolong ane tetoo-too nuKristen sanu metuvu lamai te'amateong eikokua. Siira concoono siYesus eiri'ua.



SiYesus nojanji mombee temakota nu'otutuvu eijojoo tetoo sanu nomarcaya eiSiia. Siira kana netuvu seende-endenya concoono te'Alata'ala eilalong nu'ombombosiong.



Tapi siira sanu jio nomarcaya eisiYesus kana no'adili nu'Alata'ala. Siia kana morampaka siira eilalong nunaraka. Einaraka, seende-endenya tetoo-too tatarus notumangis ane nekokoita tengisi niira karna nepees. Siira norampuni nuapi sanu jio umai maate-ate ane siira tatarus no'inang nugonggoloang.



Watu siYesus metencile, Siia kana tututuu mopo'orua tepuang nuseetan ane tepomarentanya. Siia kana morampaka tepuang nuseetan eilalong nunaraka eiri'ua siia kana ma'arampunong seende-endenya, concoono jojoo tetoo sanu nomile nonuut siia ane jio nonuru'i te'Alata'ala.



Tejuniaa eini kinutuko ane nopo'orua. Tapi te'Alata'ala kana mogutu tesuruga sanu vuou ane tejuniaa sanu vuou sanu mombosi tutuu.



SiYesus ane tetoo-too-Nya kana momoia ejuniaa sanu vuou, ane Siia momarenta jojoo sanu metuvu seende-endenya. Siia kana monggagisa jojoo tejuu numata ane jiongo umai te'asesesa, te'o'ondong, tetangis, te'ajajaat, tepees atau te'amateong. Siia kana momarenta tepomarenta-Nya mepake te'ombombosiong ane ma'adil, ane Siia kana concoono tetoo-too-Nya seende-endenya.

*Eini tejarita nu'Alata'ala lamai siMatius 24:14; 28:18; siYohanes 15:20,16:33; teWahyu 2:10; siMatius 13:24–30,36–42; 1 teTesalonika 4:13–5:11; siYohanes 1:12; siMatius 22:13; siYakobus 1:12; teWahyu 20:10,21:01–22:21.*

## **Mondulu!**

Si'ami seilu mogutu tebuku eini eilalongjojoo *tebasa ejuniaa* ane si'oo maala mondulu! Te'eseseilu eini maala majari. Si'ami nomikir, ane jojoo tetoo-too nuKristen mokaraja concoono ane mombatua ane mombee tebuku eini.

## **Mombee Mabebas**

Mombee tebuku eini eitoo-too ntaninya. Jojoo teversi sanu digital maala no'ala online. Karna si'ami nepake teisin sanu mabebas, si'oo maala mobaluk tebuku eini eipapaio ejuniaa ane jio porlu mombayar tesapa-sapa eisi'ami! Mombasa ntaninya sima eini ei (<http://openbiblestories.com>.)

## **Mongulara!**

Mongala Open Bible Stories sima tevideo-video ane sanu maala no'embe eihp eilalong tebasa-basa ntaninya ei (<http://openbiblestories.com>.) Ei tesitus web, si'oo maala notuluni mombatua Open Bible Stories eilalong tebasani'oo.

